

ማቶሲ ፻ፊ ዓ ኑ ኅዳ ዮሱስ ኪርስቶስ ሚሺራዥ ቃላ ጊዶ ቆፋ

ማቶሳ ሚሺራዥ ቃላይ፥ ዮሱስ ኪርስቶሲ ቡሮፔ ያናይሳ ሲንሳሲዲ ኢዛ ጊሽ ዮቴቲዳ ዴሬ አሻናዴይ ኢዛ ጊዲዳይሳኔ ያሲ ካሴ ጋልዓ ጫቆ ማፃፋን ባ ዴሬዛስ ኢሚዳ ሂዶታ ቃላ ኩንሲዳይ ኢዛ ባጋራ ጊዲዳይሳ ዮቴዛ ሚሺራዥ ቃላራ ዴስ። ሄሲካ ሄ ሚሺራዥ ቃላይ፥ ዮሱስ ኪርስቶሲ ኢስታ ጊዶን ዮሌቲ ዲጪዳ አይሁዳ አሳስ ፃላላ ጊዶንታ አላሜ አሳስ ኩሜሳሳ።

ማቶሳ ሚሺራዥ ቃላይ፥ ዳሮፔ ናጌቴሳን ጊጌቲዳ ማፃፋ። ማፃፋዚ ኮይሮፔ ዮሱሳስ ዮሌቴሳ ጊሽ ዮቶ ዶሚዲ ኢዛ ሂንቃቴ ጊሺኔ ኢዚ ፓጩቲዳ ፓጩዛ ሎኔሲ ዮቴዳፔ ጉቶ ኢዚ ጋሊላ ዴሬን ሳባኪዳይሳ፥ ታማርሲዳይሳኔ አሳ ሃርጌሬ ፓሲዳይሳ ቆንጨሴስ። ቃሴካ ዮሱሲ ጋሊላ ዴሬፔ ዮሩሳላሜ ቢዳይሳ፥ ኢዚ ሃይሳ ሃ አላሜዛ ቦላ ዴዲዳ ዴዎ ጊሺኔ ሃ አላሜዛ ቦላ ጋምዲዳ ዉርሴሳ ሳይሳን ዉርሴሳ ሳሚንታን ሃኒዳ ሃኖታ ጊሽ ዮቴስ። ሄይቲካ ዮሱሲ ካቁቲዳይሳ፥ ሃይቂዳይሳኔ ሃይቆፔ ዴንዲዳይሳ።

ሃ ሚሺራዥ ቃላዚ፥ ዮሱሲ ያሳ ምጋ ቢርሻናስ ኢዛስ ኅዳቴሲ ዲዛዴኔ ያሳ ካዎቴሳ ጊሽ ታማርሲዛ ጊታ አስታማሬ ሂስቲ ሺሼስ። ኢዛ ቲሚርቴዛፔ ዳሪዛ ባጋይ ኢቻሹ ዱማ ዱማ ኪፊሴን ሻኬቴስ።

1. ያሳ ካዎቴሳን ዲዛይታ ሃኖ፥ ኢስታ አሶ፥ ኢስታ ሼኔ፥ ኢስቲ ሃናና ማላ ኢስታስ ቤሲዛዚኔ ኢስታስ ቤሲዛ ዉርሴሳ ኤፃ ሻኪ ኤሪሲዛ ዙማ ቦላ ሳባኪዳ ቃላ (ሼምፖ 5-7)

2. ታማኔ ናምዑ ኢዛ አሽካራቲ ሚሺራዥ ቃላ ዮታናስ ኪቴቲ ቢሺን ኢስታስ ኢሜቲዳ ምጋታ (ሼምፖ 10)

3. ያሳ ካዎቴሳ ጊሽ ሺቂዳ ዱማ ዱማ ሌሚሶታ (ሼምፖ 13)

4. ዮሱሳ ምስቲ ካላናኮኔ ኢስታስ ጌላና ማላ ኢሜቲዳ ቲሚርቴ (ሼምፖ 18)

5. ሃይሳ ሃ ዎዴዛ ዉርሴሳ ጊሺኔ ያሳ ካዎቴሳይ ያናይሳ ጊሽ ኢሜቲዳ ቲሚርቴ (ሼምፖ 24-25)

- ሃ ማፃፋይ አይኪዳ ኩሜሳ ቆፋ
- ዮሱስ ኪርስቶስ ዮሌቴሳ ዛርኬኔ ኢዛ ዮሌቴሳ 1: 1-2: 23
- ፃማቂዛ ዮሃኒሳ አሶ 3: 1-12
- ዮሱሳ ፃማቂቴሲኔ ኢዛ ፓጩቴሳ 3: 13-4: 11
- ዮሱሲ ጋሊላን አሶ ዶሚዴስ 4: 12-18: 35

ዮሴፊ ጋሊላጥ ዮሩሳላሜ ቡስ 19:1-20:34

ዮሴፊ ወርሴሳ ሳሚንታን ጋኪዳ ሜቶታ 21:1-27:66

ዮሴፊ ሃይቆጥ ዴንዲ ቤቲዴስ 28:1-20

ዮሴፊ ኪርስቶስ ዮሴታ ዛርኬ

(ሉቃ 3:23-38)

¹ ዳዉቴ ና፥ አብራሃም ና ጊዲዳ ዮሴፊ ኪርስቶስ ዮሴታ ዛርኬ ሃይሳፌ ካሊዛይሳ፤

² አብራሃምይ ዩሳቃ ዮሊዴስ፤ ዩሳቂ ያቆቤ ዮሊዴስ፤ ያቆቤይ ዮሁዳኔ ኢዛ ኢሻታ ዮሊዴስ፤ ³ ዮሁዳይ ቲማሪፕ ፋሬሳኔ ዛራ ዮሊዴስ፤ ፋሬሳይ ኤስሮሜ ዮሊዴስ፤ ኤስሮሜይ አራሜ ዮሊዴስ፤ ⁴ አራሜይ አሚናዳቤ ዮሊዴስ፤ አሚናዳቤይ ኔዓሶኔ ዮሊዴስ፤ ኔዓሶኔይ ሳሎሞኔ ዮሊዴስ፤ ⁵ ሳሎሞንካ ቦኔዜ ኤራዓቢፕ ዮሊዴስ፤ ቦኔዜይ ኡሩቲፕ ኢዮቤዴ ዮሊዴስ፤ ኢዮቤዴይ ኢሴዮ ዮሊዴስ፤ ⁶ ኢሴዮይ ካዎ ዳዉቴ ዮሊዴስ፤ ዳዉቴይ አሪዮ ማቼይፌ ሶሎሞኔ ዮሊዴስ።

⁷ ሶሎሞንካ ሮቢዓሜ ዮሊዴስ፤ ሮቢዓሜይ አቢያ ዮሊዴስ፤ አቢያይካ አሳፌ ዮሊዴስ፤ ⁸ አሳፌይ ዮሳፒዩ ዮሊዴስ፤ ዮሳፒዩይ ኢዮራሜ ዮሊዴስ፤ ኢዮራሜይ አዚያ ዮሊዴስ፤ ⁹ አዚያይ ኢዮዓታሜ ዮሊዴስ፤ ኢዮዓታሜይ አካዜ ዮሊዴስ፤ አካዜይ ሂዚቃሴ ዮሊዴስ፤ ¹⁰ ሂዚቃሴ ሚናሴ ዮሊዴስ፤ ሚናሴይ አሞዌ ዮሊዴስ፤ አሞዌይካ ዮሲያሳ ዮሊዴስ፤ ¹¹ ዮሲያሲ ባቢሎኔ ዲዎ ሳይስ ኢኮኛኔኔ ኢዛ ኢሻታ ዮሊዴስ።

¹² ባቢሎኔ ዲዎፕ ጉዮ ኢኮኛኔይ ሳላቲያሌ ዮሊዴስ፤ ሳላቲያሌይካ ዜሩባቤሌ ዮሊዴስ፤ ¹³ ዜሩባቤሌይ አቢዮዴ ዮሊዴስ፤ አቢዮዴይ ኤሊያቄሜ ዮሊዴስ፤ ኤሊያቄሜይ አዛሬ ዮሊዴስ፤ ¹⁴ አዛሬይ ሳዶቄ ዮሊዴስ፤ ሳዶቄይ አኪሜ ዮሊዴስ፤ አኪሜይካ ኤሊዮዴ ዮሊዴስ፤ ¹⁵ ኤሊዮዴይ አላዛሬ ዮሊዴስ፤ አላዛሬይ ማታኔ ዮሊዴስ፤ ማታኔይ ያቆቤ ዮሊዴስ፤ ¹⁶ ያቆቤይካ ኪርስቶስ ጌቱቲዳይሳ ዮሴፊ ዮሊዳ ማራሞ ኤካና ጊጊሲዳ ዮሴፌ ዮሊዴስ። *

¹⁷ ሄሳ ጊሽ አብራሃምፕ ዩዲ ዳዉቴ ጋካናስ ታማኔ አይዱ ዮሴታ፤ ቃሴ ዳዉቴፕ ባቢሎኔ ዲዎ ዎዴ ጋካናስ ታማኔ አይዱ ዮሴታ፤ ባቢሎኔ ዲዎፕ ኪርስቶስ ዮሴታ፤ ጋካናስ ታማኔ አይዱ ዮሴታ፤ ጊዴስ።

ዮሴፊ ኪርስቶስ ዮሴታ

* 1:16 ኪርስቶስ ኪርስቶስ ጉሲ “ሜሲኔ” ዎይኮ “ቲዩቲዳይሳ” ጉሳ።

18 ዮሱስ ኪርስቶስ የሌቲሳ ታሪኬይ ሃይሳፌ ካሊ ዲዛይሳ፤ ኢዛ አያ ማራማ ዮሴፌስ ጊጌታ ዲሺን ኢዚ ኢዚራ ጋይቶንታ ዊሎ አያናን ቃንሳታዳ ቤታዱስ። * 19 ኢዞ ጊጊሲዳ ዮሴፌይ ዊሎ አስ ጊዲዳ ጊሽ ማራሞ አሳ ሲንሳን ቆንጩ ኬሶንታ ቆታራ አጋናስ ባ ዎዝናራ ቃቺዴስ። 20 ሃይሳ ኢዚ ቆፒሺን ያሳ ኪታንቻይ አጉሞራ ኢዛስ ቆንጩዲ “ዳዉቱ ና ዮሴፌ! ኔ ጊጊሲዳ ማራማ ቃንሳቲዳይ ዊሎ አያናን ጊዲዳ ጊሽ ኢዞ ኔሶ ኤፋናስ ባቦፋ። 21 ኢዛ አቱማ ና ዮላና፤ ኢዚ አሳ ናጋራፔ አሻናዴ ጊዲዳ ጊሽ ኢዛ ሱንሳ ኔ ‘ዮሱሳ’ ጋ ሱንሳና” ጊዴስ። *

22-23 ጎዳይ ናቤ ኢሳያሳ ዱናን “ሄኮ! ጌላጾይ ቃንሳታና፤ አቱማ ናዛ ዮላና፤ ናዛ ሱንሳይካ አማኑዔላ ጌቱታና፤ ሄሳ ቢርሼሲካ ‘ዮሲ ኑናራ ዴስ’ ጌቱቲዲ ዓፌቲዳይሲ ፖሌታና ማላ ሃይሲ ወሪካ ሃኒዴስ” ጊዴስ። *

24 ዮሴፌይካ ዲስኮፌ ቤጊዲ ጎዳ ኪታንቻይ ኢዛ አዛዚዳ ማላ ማራሞ ባሶ ኤፌዴስ።

25 ጊዶ አቲን ባዳ ኢዛ ኮይሮ ናዛ ዮላና ጋካናስ ኢዞ ኤኪቤና። ዮሌቲዳ ጉሳ ናዛ ሱንሳ “ዮሱሳ” ጊዴስ። *

2

አዋ አርሼይ ሞኪዛ ባጋፌ ዩዳ ኤራንቻታ

1 ካዎ ሄርዶሳ ዎዴ ዮሱሲ ቤቴሌሜ ዮሁዳን ዮሌቲዳፔ ጉዩ አዋ አርሼይ ሞኪዛ ባጋፌ ኤራንቻቲ ዮሩሳላሜ ዩዲ 2 “ዮሌቲዳ አይሁዳ ካዎይ አዋን ዲዜ? አዋ አርሼይ ሞኪዛ ባጋራ ኢዛ ያሊንቴዛ ቤዩዲ ኢዛስ ጎይናና ዩዶስ” ጊዲ አይቺዳ።

3 ካዎ ሄርዶሲ ሄሳ ሲይዲ ዳጋሚዴስ፤ ዮሩሳላሜን ዲዛ አሳይ ወራ ኢዛራ ዳጋሚዴስ። 4 ኢዚካ ቄሴታ ሃላቃታኔ ዎጋ ታማርሲዛይታ ኡባ ሸሺዲ “ኪርስቶሲ አዋን ዮሌታኔ?” ጊዲ አይቺዴስ።

5-6 ኢስቲካ ኢዛስ “ናቤይ ‘ዮሁዳ ቢታን ዲዛሬ ሃኔ ቤቴሌሜ! ታ ዴሬ ኢስራዔሌ ናጊዛዴይ ኔፔ ኬዛና ጊሽ ሃንኮ ዮሁዳ ሃሪዛይታፔ አዛንካ ጉዓካ’ ጊዲ ዓፌዳ ጊሽ ኢዚ ቤቴሌሜ ዮሁዳን ዮሌታና” ጊዲ ዮቲዳ። *

* 1:18 ሉቃ 1:27 * 1:21 ሉቃ 1:31 * 1:22-23 ኢሳ 7:14 * 1:25 ሉቃ 2:21 * 2:5-6 ሚክ 5:2

7 ሄሳፌ ጉዩ ሄርዶስ ሄ ኤራንቻታ ጌማራ ዌይጊሲዲኔ ኢስታ ሃሳይሲዲ ያሊንቴዚ ኢስታስ ቤቲዳ ዎዴዮ ሻኪ ኤሪዴስ።

8 ኤራንቻታ ቤቴሌሜ ዩዲዲ “ቢዲ ጉሳ ናዛ ኮዩቴ፥ ታካ ባዳ ኢዛስ ጎይናና ማላ ዴሚዳ ማላ ሃ ታኮ ሲሚዲ ኢዚ አዋን ዲዛኮን ታስ ዮቴቴ” ጊዴስ።

9 ኤራንቻቲካ ካዎይ ኢስታስ ጊዳይሳ ሲዩዳፔ ጉዩ ሲሚ ቢዳ፤ አዋ አርሼይ ሞኪዛ ባጋራ ኢስታስ ቤቲዳ ያሊንቴይ ኢስታ ካሌሲዲ ጉሳ ናዚ ዲዛሶ ጋሲዴስ። 10 ኢስቲ ያሊንቴዛ ቤዩዳ ዎዴ ዳር ኡፋዮቴዳ። 11 ኬሴ ጌሊዲ ጉሳ ናዛ ኢዛ አዮ ማራሚራ ዴሚዲኔ ጉልባቴዲ ኢዛስ ጎይኒዳ፤ ባ ሳዪኔ ሳዪኔ ዶይዲ ዎርቃ፥ ኤፃኔኔ ካርቤ ጊዛ ሚሽ ኢዛስ ኢሚዳ።

12 ኢስቲ ሄርዶሳኮ ሲሞንታ ማላ አጉሞን ኬሂ ናጌታና ማላ ጌቴቲዳ ጊሽ ሃራ ኦጌራ ባ ዴሬ ሲሚዳ።

ጊብዔ ቢታ ቤቴ ቡስ

13 ኤራንቻቲ ቢዳፔ ጉዩ ጎዳ ኪታንቻይ ዮሴፌስ አጉሞራ ቤቲዲ “ሄርዶስ ጉሳ ናዛ ዎዳና ኮዩዛ ጊሽ ኔ ሲማና ዎዴ ታ ኔና ኤሪሳና ጋካናስ ዴንዳዳ ጉሳ ናዛ አዩይራ ኤካዳ ዱጌ ጊብዔ ቢታ ባቃታዳ ሄን ዳሻ” ጊዴስ።

14 ሄሳ ጊሽ ዮሴፌይ ዴንዲዲ አዩዮ ናዛራ ኤኪዲ ጊዶሳራ ዱጌ ጊብዔ ቢታ ቢዴስ። 15 ሄርዶስ ሃይቃና ጋካናስ ሄን ዴዲዴስ። ሄሳንካ “ታ ናዛ ታ ጊብዔ ቢታፌ ዌይጋዲስ” ጊዲ ጎዳይ ካሴ ናቤ ዱናን ሃሳዩዳይሲ ፖሌቲዴስ። *

16 ኤራንቻቲ ኢዛ ባሌሲዳይሳ ኤሪዳ ዎዴ ሄርዶስ ኬሂ ሃንቁቲዴስ። ኤራንቻቲ ኢዛስ ካሴ ዮቴዳ ማላ ባ አስ ኪቲዲ ናምዑ ላይሳኔ ናምዑ ላይሳ ኩሞንታይታ ቤቴሌሜኒኔ ቤታሌሜ ዩሾን ዲዛ ጉሳ አቲማ ናይታ ኡባ ዎዲሲዴስ።

17-18 ሄሳን
“ዮሆይኔ ጊታ ዋሶ ጊሪሳይ ኤራማን ሲዮቴዴስ፤
ኢራዔላ ባ ናይታስ ዮካዱስ፤
ናይቲ ዉሪ ዉሪዳ ጊሽ
ሚናናስ ዳንዳዮንታ ኢፃዱስ”
ጌቴቲዲ ናቤ ኤርማሳን ዮቴቲዳይስ ፖሌቲዴስ። *

ጊብዔፔ ናዚሬቴ ሲሞ

19 ሄርዶስ ሃይቂዳፔ ጉዩ ጎዳ ኪታንቻይ አጉሞራ ዮሴፌስ ጊብዔ ቢታን ቤቲዲ፥ 20 “ዴንዳዳ ጉሳ ናዛኔ ኢዛ አዩዮ ኤካዳ ኢስራዔሌ ቢታ ሲማ፤ ናዛ ዎዳና ኮዩዛይቲ ሃይቂዳ” ጊዴስ።

* 2:15 ሆሴ 11:1 * 2:17-18 ኤር 31:15

21 የሴፌይ ዴንዲዲ ናዛ አዩይራ ኤኪዲ ኢስራዔል ቢታ ሲሚዴስ።

22 ጊዶ አቲን አርካላዎሲ ባ አዋ ሄርዶሳ ሶን ዩሁዳን ካዎቲዳይሳ ሲይዲኔ ሄ ባናስ ባቢዴስ፤ ጎዳይ አጉሞራ ኢዚ ሄ ቦንታ ማላ ዮቲዳ ጊሽ ጋሊላ አወራጃ ቢዴስ። 23 ናዚሬቱ ጌቲቲዛ ካታማዮ ቢዲ ሄን ዱስ አይኪዴስ። ሄሳንካ ካሴ ናቤታን “ናዚሬቱ አስ ጌቲታና” ጌቲቲዲ ካሴቲዲ ሲንሳፌስ ሃሳዩቲዳይሲ ኩሚዴስ። *

3

ፃማቂዛ ዮሃንሳ ሳባኮ

(ማር 1:1-8፤ ሉቃ 3:1-18፤ ዮሃ 1:19-28)

1-2 ሄ ዎዴ ፃማቂዛ ዮሃንሲ አሳስ “ሳሎ ካዎቲሴ ማቲዳ ጊሽ ኢንቴ ናጋራፔ ሲሚቴ” ጊ ሳባኪሼ ዩሁዳ ባዞራ ዩዴስ። *

3 “ጎዳ አጌ አሲቱ፥ ዎጋ አጌዛካ ሎዔሲቱ ጊሼ ባዞ ቢታን ዋሲዛ ቃላ”

ጌቲቲዲ ካሴ ናቤ ኢሳያሳን ዮቲቲዳይሲ ዮሃንሳ ጊሻሳ። *

4 ዮሃንሲ ጋሜላ ኢሲኬፌ ኦሴቲዳ ማይዎ ማይዔስ። ባ ዌሳን ዳፎ ጊዩስ፤ ኢዚ ሚዛ ቁማይ ዴጌራ ኤሳኔ ቦሌ። * 5 ዩሩሳላሜፔ፥ ኩሜሳ ዩሁዳፔኔ ዮርዳኖሴ ሻፋ ማታን ዲዛ ዴሬ አሳይ ወሪ ዮሃንሳኮ ዎዲዲ፥ 6 ባ ናጋራካ ኢዛስ ፓዊሼ ዮርዳኖሴ ሻፋን ኢዛ ኩሼን ፃማቂቲዴስ።

7 ዳሮ ፋርሳዌቲኔ ሳዱቃዌቲ ኢዚ ፃማቂዛሶ ዩሼን ቤዩዲ ዮሃንሲ “ኢንቴኖ ሽሻቶ! ኢንቴ ሲንሳራ ዲዛ ሃንቆፌ አታና ማላ ኢንቴና አኒ ቤሲዴ?” * 8 ኢንቴ ኢንቴ ናጋራፔ ሲሚዳይሳ ቤሲዛ አሶ አሲቱ። 9 “ኑ አዋይ አብራሃሜይ ኑስ ዴስ” ጊዛይሳን ኢንቴርካ ኢንቴና ባሌሶፍቱ፤ ታ ኢንቴስ ያሲ ሃይታ ሹቻታፔ አብራሃሜስ ና አሲ ዴንሳናስ ዳንዳዩስ ጋይስ። * 10 ሄኮ ካልታይ ቃንፃናስ ሚሳታ ጋርሳን ጊጌቲ ኡቲዴስ፤ ሄሳ ጊሽ ሎዎ አይፌ አይፎንታ ሚሲ ወሪ ቃንፃታናኔ ታማን ዩጌታና። * 11 ታኒ ማርቱሳስ ሃሳን ፃማቃይስ፤ ሃራይ አቶ ሺን ታ ኢዛ ጫማ ቶካናስ ቤሶንታዴይ ታፔ አዲዛ ሚኖይ ጉዩራ ያና፤ ኢዚካ ዊሎ አያናኒኔ ታማን ኢንቴና ፃማቃና። 12 ካስ ሱራጊዛ ፒሳይ ኢዛ ኩሼን ዴስ፤ ኢዚካ

* 2:23 ማር 1:24፤ ሉቃ 2:39፤ ዮሃ 1:45 * 3:1-2 ማቶ 4:17፤ ማር 1:15 * 3:3 ኢሳ 40:3 * 3:4 2ካዎ 1:8 * 3:7 ማቶ 12:34፤ 23:33 * 3:9 ዮሃ 8:33 * 3:10 ማቶ 7:19

ባ ካላ ባሌዛ ፒቲ ጌሻና፤ ባ ጊስቴዛካ ካላ ዲዔን ቆላና፤ ሃፓ ጊዲኮ ቶፖንታ ታማን ፁጋና” ጊዴስ።

ዮሱሲ 9ማቁቲዴስ
(ማር 1:9-11፤ ሉቃ 3:21-22)

13 ሄ ዎዴ ዮሱሲ ዮሃንሳን 9ማቁታናስ ጋሊላፔ ዮርዳኖሴ ሻፋ ቢዴስ። 14 ጊዶ አቲን ዮሃንሲ “ሃይሲ ሃኔና፤ ታኒ ኔናን 9ማቁታና ቤሲሺን ኔኒ ዋናዳ ታኮ ያይ?” ጊዲ ኢዛራ ማርሼቲዴስ።

15 ዮሱሲካ “አይኮይ ባዋ፣ ኤሮ ጋርኪ? ሃይሳ አሲዲ ኑኒ ሂሎቴስ ኡባ ፖላናስ ኑስ ቤሲስ” ጊዴስ። ዮሃንሲካ ኢዛ ቆፋ ኤሮ ጊ ኤኪዴስ። 16 ዮሱሲ 9ማቁቲዲ ሃላፌ ኬዚዳ ማላ ሄራካ ሳሎይ ዶዮቲን ሶሳ አያናይ ሃራጴ ካፎ ሚሳቲዲ ኢዛ ቦላ ዎዲሺን ቤዶዴስ። 17 ሳሎፔካ “ታኒ ኢዛን ኡፋዮቲዛ ናዚኔ ታ ሲቂዛ ታ ናዚ ሃይሳ” ጊዛ ቃላይ ሲዮቲዴስ። *

4

ዮሱሲ ፓጩቲዴስ
(ማር 1:12-13፤ ሉቃ 4:1-13)

1 ሄሳፌ ጉዬ ሂሎ አያናይ 9ላዔን ፓጩታና ማላ ዮሱሳ ዱጌ ባዞ ቢታ ኤፊዴስ። * 2 አይዱ ታሙ ጋላሲኔ አይዱ ታሙ ቃማ ሶሚዳፔ ጉዬ ዮሱሲ ጋፊዴስ። 3 ፓጩዛይሲ ዮሱሳኮ ሺቂዲ “ኔ ሶሳ ና ጊዲኮ አኔ ሃይታ ሹቻታ ኡኬስ ጊዳና ማላ አዛዛ” ጊዴስ።

4 ዮሱሲካ “አሲ ሶሳ ዱናፔ ኬዚዛ ቃላንፔ አቲን ካላን 9ላ ዴና” ጌቲቲ 9ፌቲዴስ” ጊዲ ኢዛስ ዛሪዴስ። *

5 ቃሴካ 9ላዔይ ዮሱሳ ጌሻ ካታማዮ ኤፊ ሶሳ ኬላ ቁስቴ ቦላ ኬሲዲ፤ 6 “ኔ ሶሳ ና ጊዲኮ አኔ ሃይሳፌ ዱጌ ጉፓ፤ አይሲ ጊኮ ‘ኔ ቶሆይ ሹቻን ዱጴቶንታ ማላ ኪታንቻቲ

ባ ኩሼራ ኔና አይኪ ዴንላና ማላ ኔ ጊሻ

ሶሲ ባ ኪታንቻ ኪታና’ ጌቲቲ 9ፌቲዴስ” ጊዴስ። *

7 ዮሱሲካ “ጌሻ ማፍን ‘ኔ ጎዳ ሶሳ ፓጩፋ’ ጌቲቲ 9ፌቲዴስ” ጊዲ ዛሪዴስ። *

8 ቃሴካ 9ላዔይ ዮሱሳ ኬሂ ዶቃ ዙማ ቦላ ኬሲዲ ሳሎ ጉፓንሶን ዲዛ ካዎቴላ ቦንቾዛራ ኡባ ኤሂ ቤሲዲ፤ 9 “ኔ ኩንዳዳ ታስ ጎይኒኮ ሃይሳ ኡባ ታ ኔስ ኢማና” ጊዴስ።

* 3:17 ሜዴ 22:2፤ ማቶ 12:18፤17:5፤ ማር 1:11፤ ሉቃ 9:35 * 4:1 ኢብ 2:18፤ 4:15 * 4:4 ዛሬ 8:3 * 4:6 ማዛ 91:11-12 * 4:7 ዛሬ 6:16

10 ዮሱሲ “ሃይሶ ገላጌ! ታ ሲንሳፊ ሃካ! ‘ኔኒ ኔ ጎዳስ ያሳስ ጎይና፤ ኢዛስ ገላላ አዛዜታ’ ጌቴቴ ጌሻ ማግፋን ገፊቴደስ” ጊደስ። *

11 ሄሳፊ ገላጌይ ኢዛ አጊዲ ቢደስ፤ ኪታንቻቴካ ዩዲ ኢዛ ማዲዳ።

ዮሱሲ ሳባኮ አይኪደስ
(ማር 1:14-15፤ ሉቃ 4:14-15)

12 ዮሱሲ፥ ዮሃንሲ ቃሼቴዳይሳ ሲይዲ ጌዴ ጋሊላ ሲሚደስ።
* 13 ናዚሬቴ ካታማ አጊዲ ዛቢሎኔ ኒፍታሌሜ ሄራን አባ ማታን ዲዛ ቂፊርናሆሜ ካታማን ዱስ አይኪደስ። *

14-16 “ሄሳን ዛቢሎኔኔኔ ኒፍታሌሜ ቢታን፥ ዮርዳናሴፔ ሄ ፒንሳን አባ ሳንቄራ ኤፊዛ አጌ ማታን ዲዛ አይዛቤ ጊዲዳ ጋሊላ ደሬ አሳይ፥

ዲማን ዲዛ ደሬይ ዎልቃማ ፖፖ ቤዩደስ። ሃይቆ ኩዋ ጊዶን

ዲዛ ደሬስ ፖፖይ ፖዒደስ” ጌቴቴዲ ናቤ ኢሳያሳ ዱናን ካሴቴዲ ሃሳዩቴዳይሲ ፖሌቴደስ።

17 ዮሱሲ ሄ ዎዴፔ ሃ ሲሚን “ሳሎ ካዎቴሲ ማቴደስ፥ ማርታ ጌሊቴ” ጊዲ ሳባኮ አይኪደስ። *

ኮይሮ ዮሱሳ ካሊዳይታ ዪይጌቴሳ
(ማር 1:16-20፤ ሉቃ 5:1-11)

18 ዮሱሲ ጋሊላ አባ ሳንቄራ አዲሼ ናምዑ ኢሻንታ፤ ሄይቴካ ጴፅሮሳ ጌቴቴዛ ሲሞናኔ ኢዛ ኢሻ ኢንዲራሳ ቤዩደስ። ኢስቴካ ሞሌ አይኪዳይታ ጊዲዳ ጊሽ ሞሌ አይኪዛ ጌቴ አባን ዩጊሼ ደቴስ። 19 ዮሱሲ ኢስታ “ሃ ዩቴ! ታና ካሊቴ! ታ ኢንቴና አስ አይኪዛ አስ ኬሳና” ጊደስ። 20 ኢስቴ ሄራካ ሞሌ አይኪዛ ጌቴዛ ዩጊ አጊዲ ዮሱሳ ካሊዳ።

21 ጉስ ሲንሴ ቢሼ ሃራ ናምዑ ኢሻንታ ዛቢዶሳ ና ናምዓታ ያቆቤኔ ዮሃንሳ ቤዩደስ፤ ኢስቴካ ባ አዋ ዛቢዶሳራ ዎጎሎ ጊዶን ሞሌ ጌቴ ሎዔሴቴስ። ዮሱሲካ ኢስታ ዪይጊን፤ 22 ኢስቴ ሄራካ ዎጎሎዛኔ ባ አዋ አጊዲ ካሊዳ።

ዮሱሲ ሃርጊዛይታ ፓላደስ
(ሉቃ 6:17-19)

* 4:10 ዛሬ 6:13 * 4:12 ማቶ 14:3፤ ማር 6:17፤ ሉቃ 3:19-20 * 4:13
ዮሃ 2:12 * 4:17 ማቶ 3:2

23 ዮሱሲ አይሁዳታ ኢስታ ዎሳ ኪሳን ታማርሲሼኔ ካዎቴሳ ሚሺራሾ ቃላ ሳባኪሼ ቃሴ ዴሬ ጊዶን አይ ሃርጌይካ ሳኪዛይታ ፓሲሼ ኩሜሳ ጋሊላን ዩዩዴስ። * 24 ሄሳ ጌዶን ሎዎ ናሾይ ኩሜሳ ሶሪያ ቢታን ሲዮቲዴስ፤ ዴሬይካ ዱማ ዱማ ሳኮን ዳር ዋዩቲዛይታ፣ ዳይዳንሲ ኢስታን ጌሊዳይታ፣ ቦላፌ ቢታን ዩጊዛ ሃርጌይ ዲዛይታኔ ሲሊዳይታ ኢዛኮ ኤሂን ኡባካ ፓሲዴስ። 25 ሄሳፌ ዴንዲዳይሳን ጋሊላፕ፣ ታሙ ካታማታፕ፣ ዩፋሳላሜፕኔ ዩሁዳፕ፣ ዮርዳኖሴ ሻፋ ፒንሳፌ ዩዳ ዳር አሳይ ኢዛ ካሊዴስ። *

5

ዮሱሲ ዙማ ቦላ ታማርሲዳ ቲሚርቴ

1 ዳር ዴሬይ ሺቁዳይሳ ቤዩዲ ዮሱሲ ፑዴ ዙማ ቦላ ኪዚ ኡቲዴስ፤ ኢዛ ካሊዛይቲካ ኢዛኮ ዩዳ። 2 ኢዚካ ኢስታ ሂዘጊ ታማርሶ አይኪዴስ፤

ቱማ አንጆ ዴማና አሳቲ
(ሉቃ 6:20-23)

- 3 “አያናን ባና ካዉሺዛይቲ አንጆቲዳይታ፤ አይሲ ጊኮ ሳሎ ካዎቴሳ ኢስታሳ።
- 4 ቃዴቲዛይቲ አንጆቲዳይታ፣ አይሲ ጊኮ ኢስቲ ሚኔታና። *
- 5 አሽኪቲ አንጆቲዳይታ፤ አይሲ ጊኮ ኢስቲ ቢታ ላታና። *
- 6 ዒሎቴሳ ጋፌቲዛይቲኔ ሳሞቲዛይቲ አንጆቲዳይታ፤ አይሲ ጊኮ ኢስቲ ካላና። *
- 7 አሳስ ሎዎ አሲዛይቲ አንጆቲዳይታ፤ አይሲ ጊኮ ኢስታስካ ሎዎይ አሴታና።
- 8 ዎዚና ዒሎቲ አንጆቲዳይታ፤ አይሲ ጊኮ ኢስቲ ዎሳ ቤያና።
- 9 ሳርቴሳ አሲዛይቲ አንጆቲዳይታ፤ አይሲ ጊኮ ኢስቲ ዎሳ ናይታ ጌቴቲ ዔይጌታና።

* 4:23 ማቶ 9:35፤ ማር 1:39 * 4:25 ታሙ ካታማፕ ጊሪኬ ቃላ ሃሳዩዛይቲኔ አይሁዳ ጊዶንታ ዴሬቲ ኢሲፌ ዲዛሶይ ታሙ ካታማታ ጌቴቴስ። ሄ ካታማታፕ ዳር ባጋቲ ጌሊላ አባፌ አዋ አርሼይ ጌልዛሶ ባጋራኔ ፑዴሃ ባጋራ ኡሻቻ ቦላ ዴቴስ። * 5:4 ኢሳ 61:2 * 5:5 ማዛ 37:11 * 5:6 ኢሳ 55:1-2

10 ዲሎቴሳ ጊሽ ጎዴቲዛይቲ አንጂቲዳይታ፤

አይሲ ጊኮ ሳሎ ካዎቴሲ ኢስታሳ። *

11 “ታ ጌዶን አሳይ ኢንቴና ጫዬኮ፣ ጎዲኮኔ ኢታ ዮዖ ዎርዶራ ኢንቴ ቦላ ሃሳዬኮ ኢንቴ አንጂቲዳይታ። * 12 ኢንቴ ሳሎን ዴማና ዋጋይ ኬሂ ጊታ ጊዲዳ ጊሽ ኡፋይሳን ጉፒቴ። ኢንቴፌ ሲንሳን ዲዛ ናቤታካ ሄሳሶ ጎዲዳ። *

ማዒኔኔ ፖዖ ሴሚሶ

(ማር 9:50፤ ሉቃ 14:34-35)

13 “ኢንቴ ሃ ቢታ አሳስ ማዒኔ ማላ። ማዒኔይይ ባ ማልዎቴሳ ዩዲዛ ጊዲኮ ጌዴ ካሬ ዩጌቲዲ ዩዴቴሳፌ አቲን፣ ዛሪዲ ዴማናስ ዳንዳዩዜ? * 14 ኢንቴ ዴሬስ ፖዖ። ዙማ ቦላ ዲዛ ካታማያ ቆቴታናስ ዳንዳዎኩ። * 15 አሲ ያምፔ አይሲዲ ኬሳን ዲዛ አሳ ኩሜሳስ ፖዳና ማላ ዶቃሶን ዎሴስ አቲን ጌማ ሶን ዎሲ ኤሬና። * 16 ሄሳሶካ አሳይ ኢንቴ ሎዖ አሶ ቤዩዲ ሳሎን ዲዛ ኢንቴ አዋ ቦንቻና ማላ ኢንቴ ፖዖይ አሳ ሲንሳን ፖዖ። *

ሙሴ ዎጋ ጊሽ

17 “ታኒ ሙሴ ዎጋኔ ናቤታ ቃላ ሻራና ዩዳ ኢንቴስ ሚሳቶፓ፤ ፖላናስ ያዲስ አቲን ሻራናስ ያቤኬ። 18 ታ ኢንቴስ ቱሙ ጋይስ፤ ሳሎይኔ ሳሳይ አዳና ጋካናስ ሙሴ ዎጋይ ወሪ ፖሌታና አቲን ዎጋፔ ኢሲ ፒዳሌይካ ዎይኮ ቁሪኛካ ሻሬቱኩ። * 19 ሄሳ ጊሽ አኒካ ሃ አዘዞታፔ ጉዲዛሮ ጊዲኮካ አሶንታ ዩጊ አዲኮ፣ ሃንኮይታካ ዩዲ አዳና ማላ ታማርሲኮ ሳሎ ካዎቴሳን ሄሳዴይ ጉስ ጌቴቲ ያይጌታና፤ ጊዶ አቲን ሃይታ አዘዞታ ኦሲ ፖሊሼ ሃንኮይታ ፖላና ማላ ታማርሲኮ ሄሳዴይ ሳሎ ካዎቴሳን ጊታ ጌቴታና። 20 ታ ኢንቴስ ጋይስ፣ ኢንቴ ዲሎቴሲ ፋርሳዌታፔኔ ሙሴ ዎጋ ታማርሲዛይታ ዲሎቴሳፔ አዶንታ አጊኮ ሳሎ ካዎቴስ ጌላና ዳንዳዩኬታ።

አስ ዎዳናስ ቤሴና

21 “ካሴ አሳታስ ‘ዎዶፓ፤ ዎዲዳዴ ቦላ ፒርዴታና’ ጌቴቲዳይሳ ኢንቴ ሲዩዴታ። * 22 ታ ቃሴ ኢንቴስ ጊዛይ ባ ኢሻ ቦላ አጌይ ባይጉዳ ሃንቁቲዛይ ቦላ ፒርዴታና፤ አኒካ ባ ኢሻ ‘ናፓይ’ ጊዛይይ

* 5:10 1ጴፀ 3:14 * 5:11 1ጴፀ 4:14 * 5:12 2ታር 36:16፤ ሃዋ 7:52
* 5:13 ማር 9:50፤ ሉቃ 14:34 * 5:14 ዮሃ 8:12፤ 9:5 * 5:15 ማር 4:21፤ ሉቃ 8:16፤ 11:33 * 5:16 1ጴፀ 2:12 * 5:18 ሉቃ 16:17 * 5:21 ኬሳ 20:13፤ ዛሬ 5:17

ዱላታ ሲንሳን አይሹታና። ‘ኤያይ’ ጊዛዴ ጋናሜ ታማ ፐርዲይ ናጌስ።²³ ሄሳ ጊሽ ነኒ ያርሾ ሺሺዛሶን ያሳስ ያርሻና ጊሺን ኔ ኢሻይ ኔ ቦላ ሚሹቲዳዚ ኔስ ቆፔቲኮ።²⁴ ኔ ያርሺዛይሳ ሄን ያርሾሶን አጋጋዳ ኮይሮ ባዳ ኔ ኢሻራ ጊጋ፤ ሄሳፌ ጉዩ ሲማዳ ኔ ያርሾዛ ያሳስ ሺሻ።

²⁵ “ኔና ሞቲዳ ኔ ሞርኬይ ኔ ቦላ ፐርዲሶንታ ማላ፣ ፐርዲዛ ዳናይ ቃፔዛይሳስ ኔና አሲ ኢሞንታ ማላ፣ ቃሾ ኬሳን ኔ ዎዶንታ ማላ ቡሮ አጌ ቦላ ዳሼ ኔ ሞርኬራ ኤሌላ ጊጋይቻ።²⁶ ታ ኔስ ቱሙ ጋይስ፤ ኢዚ ፐርዲሲ ወርሲዳ ጊዲኮ ወርሲሳ ሳንቲዮ ቃንፃና ጋካናስ ቃሾፔ ቢርሼታካ።

ላይማታናስ ቤሴና

²⁷ “‘ላይማቶፓ’ ጊዛይሳ ኢንቴ ሲዩዴታ። * ²⁸ ታኒ ጊዲኮ ኢንቴና ሂዝጋይስ፤ ማጫሳ አሞ አይፌራ ጸሊዳዴይ ወሪ ባ ዎዝናን ኢዚራ ላይማቲዴስ።²⁹ ናጋራ አሳናስ ኔ ኡሻቻ አይፌይ ኔስ ጋሶ ጊዲኮ ኔፔ ኬሳ ዎራ ዩጋ፤ ኔ አሳቴሳይ ኩሜስ ጌዴ ጋናሜ ታማን ዩጌታናፔ ኔ አሳቴሳፌ ኢሲና ፓጩኮ ሎዎ።³⁰ ኔ ኡሻቻ ኩሼይ ናጋራ አሳስ ጋሶ ጊዲኮ ኔፔ ቃንፃ ዲጋ፤ ኔ አሳቴሳይ ኩሜስ ጋናሜን ዩጌታናይሳፌ ኔ አሳቴሳፌ ኢሲ ቢሊቴይ ኔስ ፓጩ ጊዲኮ ሎዎ።

³¹ “‘ማቾ አንጄ ዩዲዛይይ ፐርማ ዋራቃታ ኢዚስ ኢማና ቤሴስ’ ጌቱቲዴስ። * ³² ታኒ ቃሴ ኢንቴና ሂዝጋይስ፣ ሃራ አሳራ ላይማቲሺን ቤዮንታ ዲሼ ባ ማቾ አንጄዛይይ ወሪ ኢዛ ላይማታና ማላ አሴስ። ሄሳሶካ አንጄቲዳሮ ኤኪዛዴይካ ላይማቲዳ ማላ ቆዴቴስ። *

ጫቆ ጊሽ

³³ “ካሴ አሳታስ ‘ዎርዶ ጫቆፋ፤ ያሳ ሲንሳን ኔ ጫቂዳይሳ ናጋ’ ጌቱቲዳይሳ ኢንቴ ሲዩዴታ። * ³⁴ ታ ቃስ ኢንቴና አይኮካ ጫቆፍቴ ጋይስ፤ ሳሎይ ያሳስ ኡቲዛ አልጋ ጊዲዳ ጊሽ ሳሎን ጫቆፍቴ። * ³⁵ ቢታይ ያሳ ቶሆይ ዩዲዛሶ ጊዲዳ ጊሽ ቢታንካ ጫቆፍቴ። ዎጋ ካዎ ካታማ ጊዲዳ ጊሽ ዩሩሳላሜንካ ጫቆፍቴ። * ³⁶ ኢንቴ ሁዔንካ ጫቆፍቴ፤ ኢንቴ ሁዔ ቢናናፔ ኢሲኔዮካ ቦስ ዎይኮ ካሬስ ሂስታናስ ዳንዳዩኬታ።³⁷ ሄሳ ጊሽ ኢንቴ ኢንቴ

* 5:27 ኬሳ 20:14፤ ዛሬ 5:18 * 5:31 ማቶ 19:7፤ ማር 10:4 * 5:32 ማቶ 19:9፤ ማር 10:11-12፤ ሉቃ 16:18፤ 1ቆሮ 7:10-11 * 5:33 ሉዌ 19:12፤ ታይ 30:2፤ ዛሬ 23:21 * 5:34 ያቆ 5:12፤ ማቶ 23:22 * 5:35 ኢሳ 66:1፤ ማዛ 48:2

ጊደን ሃሳዩቲሺን ኢንቴ ሃሳያይ “ኤ” ጋናዝ ጊዲኮ “ኤ” ጊቴ “አካይ” ጋናዝ ጊዲኮ “አካይ” ጊቴ፤ ሄሳፌ ካሬ ጊዲዳይ ወራ ኢታ አሳፔ ዪዛዛ።

ሃሎ ኬሶ ጊሽ
(ሉቃ 6:29-30)

38 “አይፌ ጊሻስ አይፌ አቻ ጊሻስ አቻ” ጌቴቲዳይሳ ኢንቴ ሲዩዴታ። * 39 ታ ቃሴ ኢንቴስ ጊዛይ ኢታ አሲዳዴራ ኤቆቶፐፐቴ፤ ጊዶ አቲን ኔስ ኡሻቻ ሻጋላ ባቂዛዴስ ሃንኮይሳካ ዩሻ ቤሳ። 40 ኢሲ አሲ ኔ ጊዶራ ማይዲዳይሳ ኔፔ ኤካናስ ኔና ሞቲኮ ቦላራ ማይዲዳይሳካ ጉጃዳ ኢዛስ ኢማ። 41 ኢሲ አሲ ኔና ኢሲ ሳቴ ኦጌ ኔ ባና ማላ ዎልቃሲኮ ኢሲፌ ናምዑ ዳኮ ጊዳና ኦጌ ኢዛራ ባ። 42 ኔና ዎሲዛዴስ ኢማ፤ ኔፔ ታልዔ ኤካናስ ኮዪዛዴስ ዞኮ ዛሮፓ።

43 “ኔ ላጌ ሲቃ፤ ኔ ሞርኬ ኢፃ’ ጌቴቲዳይሳ ሲዩዴታ። 44 ታ ቃስ ኢንቴና ኢንቴ ሞርኬታ ዶሲቴ፤ ኢንቴና ጎዲዛይታስ ዎሲቴ ጋይስ። 45 ኢንቴ ሄሳሶ አሲኮ ኢንቴ ሳሎ አዋስ ናይታ ጊዳና። ኢዚ አዋ አርሼ ኢታታሲኔ ሎዎታስ ኢሲ ቦላ ጋሲ ኢጫስ። ኢራካ ዒሎታሲኔ ናጋራንቻታስ ኢሲ ቦላ ቡኪሲስ። 46 ኢንቴና ዶሲዛይታ ሃላ፤ ኢንቴ ዶሲኮ ኢንቴስ አዛ ጎዓይ ዲዜ? ቃራፃ ቃንጊሲዝይቲ ሄሳሶ አሴቴኔ? 47 ኢንቴ ኢሻታ ሃላ ኢንቴ ሳሮቲኮ ሃንኮይታፔ አዛን ሎዔቲ? አማኖንታይቲካ ሄሳሶ አሴቴስ። 48 ሄሳ ጊሽ ኢንቴ ሳሎ አዋይ ዎሶይ ባይንዳይታ ጊዲዳ ማላ ኢንቴካ ዎሶይ ባይንዳይ ጊዲቴ። *

6

ማንቆስ ማዶ ኢዋ

1 “አሲ ኢንቴና ቤያና ማላ አሳ ሲንሳን ሎዎ አሶንታ ማላ ናጌቴቴ፤ ሄሳሶ አሲኮ ኢንቴ ሳሎ አዋፔ ጎዓ ዴጫኬታ። * 2 ኢንቴ ማንቆታስ ማዶ ኢጫዛ ዎዴ አሲ ታና ቤዮ ጊዲ አሳ ሲንሳን ቦንቹታናስ አጌኒኔ አይሁዳ ዎሳ ኪሳን ፁሩምባ ፑኒሲዛ ቆዴፔ ቆሞን ሃኒዛይታሶ አሶፍቴ። ታ ኢንቴስ ቱሙ ጋይስ፤ ኢስቲ ባ ዋጋ ኡባ ሃን ኤኪቹዳ። 3 ኢንቴ ማንቆታስ ኢጫሺን ኡሻቻ ኩሼይ አሲዛ ሃዲሪሳ ኩሼይ ኤሮፖ። 4 ኢንቴ ኢዋይ ጊማን ጊዶ፤ ቆታን አሴቲዳይሳ ቤዪዛ ኢንቴ አዋይካ ኢንቴ ዋጋ ኢንቴስ ኢማና።

* 5:38 ኬሳ 21:24፤ ሌዌ 24:20፤ ዛሬ 19:21 * 5:48 ሌዌ 19:2፤ ዛሬ 18:13
* 6:1 ግጥ 23:5

ዎሳ ጊሽ
(ሉቃ 11:2-4)

5 “ኢንቴ ዎሲሼ ቆዴፔ ቆሞን ሃረዛይታ ማላ ሃኖፒቴ፤ ኢስቲ ኣሲ ቤያና ማላ ኣይሁዳ ዎሳ ኬሳታኒኔ ኣይዱ ኣጌ ቦላ ኤቂዲ ዎሳናስ ዶሴቴስ። ታ ኢንቴስ ቱሙ ጋይስ፤ ኢስቲ ኩሜሳ ዋጋ ኤኪቺዳ። * 6 ኔ ዎሳና ጌሊዛ ኔ ኪፊሌ ጌላ፤ ካሬካ ኔ ቦላ ጎርዳዳ ጌማን ዲዛ ኔ ኣዋኮ ዎሳ። ጌማን ኦሴቲዳይሳ ቤዪዛ ኔ ኣዋይ ኔ ኦሶ ማላ ኔስ ኢማና።

7 “ኣማኖንታ ኣሳይ ኢሲ ቃላ ዛሪ ዛሪ ዎሲኮ ኢስታስ ሲዮቲዛ ሚሳቲን ኢስቲ ዛሪ ዛሪ ጊዛይሳሶ ኢንቴካ ዎሲሼ ኢሲ ቃላ ዛሪ ዛሪ ጎፒቴ። 8 ጊዶ ኣቲን ኢንቴ ኣዋይ ኢንቴ ዎሳናፔ ካሴቲዲ ኢንቴስ ኣዚ ኮሺዛኮኔ ኤሪዛ ጊሽ ኢንቴ ኢስታ ሚሳቶፒቴ። 9 ኢንቴ ዎሲሼ

‘ሳሎን ዲዛ ኑ ኣዋዉ!
ኔ ሱንሲ ኣንጄቶ።

10 ኔ ካዎቴሲ ሃዮ፤
ኔ ሼኔይ ሳሎን ጊዲዳ ማላ ሳዓንካ ሃኖ።

11 ሃቺስ ጊዲዛ ካስ
ኑስ ሃቺ ኢማ።

12 ኑ ኑና ቆሂዳይታስ ኣቶ ጊዛ ማላ
ኔካ ኑ ቆሆ ኑስ ኣቶ ጋ።

13 ኢታፔ ኑና ኣሻ ኣቲን ኑና ፓጩን ጌልሶፋ፤
ቦንቾይ ሜርፔ ሜርና ጋካናስ ኔይሳ። ኣሚን’
ጊ ዎሲቴ።

14 “ኢንቴ ኢንቴና ቆሂዳይታስ ኣቶ ጊኮ ኢንቴ ሳሎ ኣዋይ ኢንቴስ ኣቶ ጋና። 15 ቃሴ ኢንቴ ኣሳ ናጋራ ኣቶ ጎንታ ኢጊኮ ኢንቴ ኣዋይካ ኢንቴ ናጋራ ኣቶ ጌና።

ዎማ ጊሽ

16 “ኢንቴ ዎማ ዎሚሼ ቆዴፔ ቆሞራ ዎሚዛይታሶ ሹሎፍቴ። ኢስቲ ባ ዎሚዛይሳ ኣሲ ኤራና ማላ ባ ኣይፌሶ ኢሴቴስ። ታ ቱሙ ጋይስ፤ ሄሳሶ ኦሲዛይቲ ባ ዋጋ ኩሜስ ኤኪቺዳ። 17 ኔኒ ዎማ ዎማሼ ኔ ኣይፌሶ ሜጩታ፥ ኔ ሁዔ ቲዮታ። 18 ሄሳሶ ኔ ዎሚኮ ጌማን ዲዛ ኔ ኣዋይ ዓላላ ኤሪዛዚኔ ኣሲ ኣኒካ ኤርንታ ቆታን ጊዳና። ቆታን ኦሴቲዳይሳ ቤዪዛ ኔ ኣዋይካ ኔ ዋጋ ኔስ ኢማና።

* 6:5 ሉቃ 18:10-14

ሳሎን ዲዛ ሃር
(ሉቃ 12: 33-34)

19 “ቢላይ ሚዛሶን ቡቂዲኔ ሺይዲ ሞሬተዛሶን ካይሶይ ቦኪዲ ካይሳናስ ዳንዳዩዛሶን፤ ሃ ቢታ ቦላ ኢንቴስ ሚሼ ሺሾፍቴ። *

20 ጊዶ አቲን ቢላይ ማናስ፤ ቡቂዲ ዎይኮ ሺይዲ ሞሬቶንታሶን፤ ካይሶይ ቦኪ ኤካና ዳንዳዩንታሶን ሄን ሳሎን ኢንቴስ ሚሼ ሺሼቴ። 21 ኔ ሚሻይ ዲዛሶን ኔ ዎዘናይ ሄን ዴስ።

22 “አይፌይ አሳቴሳስ ፖፖ፤ ሄሳ ጊሽ ኔ አይፌይ ፓፃ ጊዲኮ፤ ኔ ኩሜሳ አሳቴሳይካ ፖፖ ጊዳና። 23 ኔ አይፌይ ሃርጋንቻ ጊዲኮ፤ ኔ ኩሜሳ አሳቴሳይካ ዱማ ፃላ ጊዳና። ሂስቲኮ ኔናን ዲዛ ፖፖይ ዱማ ጊዲኮ፤ ቃሴ ዱማይ ዋኒዳ ጊርድ ጊዳ ዱማ ጊዳንዴ።

24 “ኢሲ አሲ ናምዑ ጎዳስ አሳና ዳንዳዩና። ኢሳ ኢዲዲ ናምዳንጎዳ ደሳና፤ ዎይኮ ኢሳ ቦንቺዲ ናምዳንሳ ሌቃና፤ ዶሳሲኔ ሚሻስ ናምዳታስ ጋሲ አሳናስ ዳንዳዩቴና።

ዳር ቆፖፍቴ

25 “ሄሳ ጊሽ ታ ኢንቴና ኢንቴ ዱሳ ጊሽ አይ ሚኖ? አይ ኡዩኖ? አይ ማይዲኖ? ጊዲ ሂርጎፍቴ ጋይስ። ሽምፖይ ቁማፔ፤ አሾይ ማይፖፔ አዴኔ? 26 አኔ ሳሎ ካፎታ ያሊቴ! ዜሬቴና፤ ማዬቴና፤ ዲዲን ቆሌቴና ሺን ኢንቴ ሳሎ አዎይ ኢስታ ሚዜስ። ኢንቴ ኢስታፊ ኬሂ አዴኬቴ? 27 አኔ ኢንቴፊ ዳር ዋይቲዲ ባስ ኢሜቲዳ ላይሳ ቦላ ሃራ ኢሲ ጋላስ ጉጃና ዳንዳዩዛ አሲ ዲዜ? *

28 “ቃሴ ማይፖ ጊሽ አዛስ ሂርጊቴ? አኔ ሮ ዴንባን ዲዛ ጨሻታ ያሊቴ፤ ዳቡሬቴና ዎይኮ ሱቁቴና። 29 ሄሳ ጊሽ ታ ኢንቴና ጊዛይ ሃራይ አቶ ሺን ካዎ ሶሎሞኒካ ባ ቦንቾራ ሃ ጨሻታፔ ኢሲኔይ ማላ ሎፖ ማይዲቤና። 30 ኢንቴኖ ፓጩ አማኖይ ዲዛይቶ! ሃቺ አሳ አይፌን ቤቲዲ ዎንቶ ታማን ዎዳና ማታ ሃይሳሶ ማይዚዛ ዶሲ ኢንቴና ሄሳፊ ሎዲሲ አሲ ማይዛናስ ዳንዳዩኔ? 31 ሄሳ ጊሽ ኑ አይ ማኔ? አይ ኡያኔ? አይ ማይዳኔ? ጊዲ ሂርጎፍቴ። 32 ሃንኮ አማኖንታ አሳይ ሃይሳ ዴማናስ ዳር ቆፔስ። ሃይሲ ዉሪ ኢንቴስ ኮሺዛይሳ ኢንቴ ሳሎ አዎይ ኤሬስ። 33 ሃራፔ ሲንሳቲዲ ዶሳ ካዎቴሳ ያሎቴስ ኮዩቴ፤ ሃይቲ ዉሪ ኢንቴስ ጉጂታና። 34 ሄሳ ጊሽ ዎንቶስ ኬሂ ቆፖፍቴ፤ ዎንቶ ሜቶይ ዎንቶስ አቆ፤ ኢሲ ኢሲ ጋላሳይ ባሲ ጊዲዛ ሜቶራ ዴስ።

* 6:19 ያቆ 5:2-3 * 6:27 ባስ ኢሜቲዳ ላይሳ ቦላ ሃራ ኢሲ ጋላስ ጉጃና ዳንዳዩዛ አሲ ዲዜ? ጊዛይሳ ኢሲ ኢሲ ጊሻ ማፃታ ቢርሼሳን “ባሲ ዲዛ አዱሳቴሳ ቦላ ኢሲ ዋዳ ፔዴ ጉጃናስ ዳንዳዩዛ አሲ ዲዜ?” ጊዛዚ ዴስ።

7

ሃራ አሳ ቦላ ፐርዳናስ ኮሼና

(ሉቃ 6:37-42)

1 “ኢንቴ ቦላ ፐርዳናቶንታ ማላ ሃራ አሳ ቦላ ፐርዶፍቴ።
 2 ኢንቴ ፐርዲዳ ማላ ኢንቴ ቦላካ ፐርደታና። ኢንቴ ማኪዳ ሚሻራ ኢንቴስ ማኪታና። * 3 ኔ አይፌን ዲዛ ጊታ ሚላ ቤዮንታ ዳሼ ኔ ኢሻ አይፌን ዲዛ ቁሪ ቡራ አዛስ ያላይ? 4 ኔ አይፌን ጊታ ሚሲ ዲሺን ኔ ኢሻ ‘አኔ ታ ኔ አይፌፔ ቁሪ ቡራዮ ኬሳይስ’ ጋናስ ዋና ዳንዳያይ? 5 ኔኖ ቆዴፔ ቆሞን ሃኒዛይሶ ካሴታዳ ኔ አይፌን ዲዛ ጊታ ሚላ ኬሳይቻ። ሄሳፌ ካላዳ ኔ ኢሻ አይፌን ዲዛ ቡራ ኬሳናስ ሎዔላ ያላንዳሳ። 6 ባ ቶሆን ዩዶንታ ማላኔ ሲሚዲ ኢንቴና ሳሂ ዳኬሬሶንታ ማላ አንጄቲዳይሳ ካናታ ሲንላን ዩንፍቴ፤ ቃሴ ኢንቴ ዎርቃካ ጉዱንሳታ ሲንላን ዩንፍቴ።

ዎሲቴ፣ ኮዩቴ፣ ቆዒቴ

(ሉቃ 11:9-13)

7 “ዎሲቴ ኢንቴስ ኢሜታና፤ ኮዩቴ ኢንቴ ዴማና፤ ካሬ ቆዒቴ ኢንቴስ ዶዩታና። 8 ዎሲዳ ኡባስ ኢሜታና፤ ኮዩዛ አሲ ዴማና፤ ቆዒዛዴስ ካሬይ ዶዩታና። 9 ኢንቴ ጊዶሬ ኢሳዴስ ናይ ኡኬስ ዎሲኮ ሹቸ ኢሚዛ አዋይ ዳንዴ? 10 ዎይኮ ሞሌ ዎሲኮ ሹሽ ኢሚዛዴይ ዳንዴ? 11 ሂስቲን ኢንቴ ኢታታ ጊዲ ኡቲዲ ኢንቴ ናይታስ ሎዎ ሚሽ ኢሞ ኤሪዛይታ ጊዲኮ ኢንቴ ሳሎ አዋይ ኢዛ ዎሲዛይታስ ዋኒዲ አዲዛ ሎዎ ሚሽ ኢሜኔ? 12 ሄሳ ጊሽ ሃራ አሲ ኢንቴስ አላና ማላ ኢንቴ ኮዩዛይሳ፣ ኢንቴካ ሃራታስ አሲቴ። ሙሴ ዎጋይ ናቤቲ ሃይሳን ኮዩቴስ። *

አሆ ፔንጌኔ ፁንሳ ፔንጌ

(ሉቃ 13:24)

13 “ፁንሳ ፔንጌራ ጌሊቴ፤ ዳዮሶ ኤሬዛ አጌይ ጊታ፤ ፔንጌይካ አሆ፤ ዳሮ አሳይ ሄ ፔንጌዛራ ጌሌስ። 14 ዴዎስ ጋሲዛ አጌይ ጊዲኮ ፁንሳ፤ ፔንጌይካ ፁንሳ፤ ጌላናይቲካ ጉሳታ ያላላ።

ዎርዶ ናቤታ

(ሉቃ 6:43-44)

15 “ኢስታስ ጊዶ ባጋይ ካና ሱይቴ ማላ ጊዲ ኡቲዲኔ ዶርሳ ኢቴ ማይዲዲ ኢንቴ ጊዶ ጌሊዲ ጊዶራ አሲዛ ዎርዶ ናቤታፔ ናጌቲቴ። * 16 ኢንቴ ኢስታ፣ ኢስታ አሶን ኤራንዴታ። አጉንሳ

* 7:2 ማር 4:24 * 7:12 ሉቃ 6:31 * 7:15 ካና ሱይቴ ኢሲ ኢሲ ባጋ ጋሞሶ ቃላን ሱዲሜ ጌቴቴስ።

ዎራፔ ዎይኔይ፥ ኪንዲቾ አጉንሳፌ ባላሴ አይፌይ ማፄቲዜ?
 17 ሃሳሳክ ሎዎ ሚሲ ወሪ ሎዎ አይፌስ፤ ኢታ ሚሲካ ኢታ አይፌ
 አይፌስ። 18 ሎዎ ሚሲ ኢታ አይፌ አይፋናስ ዳንዳዮንታይሳ
 ማላ ኢታ ሚሲ ሎዎ አይፌ አይፋናስ ዳንዳዮና። 19 ሎዎ አይፌ
 አይፎንታ ሚሲ ወሪካ ቃንጌታናኔ ታማን ዩጌታና። * 20 ሄሳ ጊሽ
 ኢንቴ ኢስታ ኢስቲ አይፊዛ አይፌን ሻኪ ኤራና። *

21 “ሳሎን ዲዛ ታ አዋ ሽኔ ፖሎንታ ዲሼ ታና ‘ጎዶ! ጎዶ!’
 ጊዛይ ወሪ ሳሎ ካዎቴስ ጌሌና። 22 ሄ ጋላስ ዳሮቲ ‘ጎዶ! ጎዶ! ኑኒ
 ኔ ሱንሳን ቲንቢቴ ዮቲቤኮኒ? ኔ ሱንሳን ዳይዳንሳ ኬሲቤኮኒ? ኔ
 ሱንሳን ዳሮ ማላታ አሲቤኮኒ?’ ጋና። 23 ሄ ዎዴ ታ ኢስታስ ‘ታ
 ኢንቴና ሙሌካ ኤሪኬ! ኢንቴ ኢታቲ ታፔ ሃኪቴ’ ጋዳ ቆንጩራ
 ታ ኢስታስ ዮታና።

ኬሴ ኬዲዛ ኤያኔ ኤራ አሳ ሎሚሶ
 (ሉቃ 6:47-49)

24 “ሂስቲኮ ሃይሳ ታ ቃላ ሲይዲ አሶን ፔይሺዛዴይ ባ ኬሴ ዛላ
 ቦላ ኬዲዛዴ ሚሳቴስ። 25 ዴዎ ኢራይ ቡኪን፤ ሃሮይካ ሃሮቲዴስ፤
 ጫርኮይካ ጫርኪዴስ፤ ኬሳካ ሱጊዴስ ሺን ዛላ ቦላ ኬፄቲዳ ጊሽ
 ኩንዲቤና።

26 “ሃይሳ ታ ቃላ ሲይዲ አሶንታዴይ ጊዲኮ ባ ኬሴ አጩ ቦላ
 ኬዲዳ ኤያ አሳ ማላ። 27 ዴዎ ኢራይ ቡኪን ሃሮይካ ሃሮቲዴስ፤
 ጫርኮይካ ጫርኪዴስ፤ ሄ ኬሳካ ሱጊዴስ፤ ኬሳይካ ኢታ ኩንዴስ
 ኩንዲዴስ” ጊዴስ። 28 ዮሱሲ ታማርሲ ወርሲን አሳይ ኢዛ
 ቲሚርቴዛን ማላሌቲዴስ። 29 ጋሶይካ ሙሴ ዎጋ ታማርሲዛይታ
 ማላ ጊዶንታ ኢዚ ጎዳቴሳ ዲዛ አሳ ማላ ታማርሲዴስ።

8

ዮሱሲ ኢንቺራቻ ሃርጌይ አይኪዳ አዴዛ ፓሲዴስ
 (ሉቃ 6:37፥41-42)

1 ዮሱሲ ዙማ ቦላፌ ዎዲን ዳሮ ዴሬይ ኢዛ ካሊዴስ። 2 ኢሲ
 ኢንቺራቻ ሃርጌይ ዲዛዴይ ዮሱሳኮ ሺቂዲ ኢዛ ሲንሳን ጉልባቲዲ
 “ጎዶ! ኔ ኮይኮ ታና ፓሳናስ ዳንዳዮሳ” ጊዴስ * 3 ዮሱሲ ባ
 ኩሼ ዮዲዲ “ታ ዶሳዲስ፤ ፓዳ!” ጊን አዴዚ ሄ ሃርጌዛፔ ሄራካ
 ፓዲዴስ። 4 ቃሴካ ዮሱሲ አዴዛ “ኔ ፓዲዳይሳ አናስካ ዮቶፓ፤

* 7:19 ማቶ 3:10፤ ሉቃ 3:9 * 7:20 ማቶ 12:33 * 8:2 ኢንቺራቻ ጊሻ
 ማፄይ ቆንጩሲዛ ማላ አሳቴሳ ቦላ ቦላራ ጋልባን ኬዚዛ ዱማ ዱማ ሃርጌታ ኡባ
 ቤሴስ።

ጊዶ አቲን ባዳ ኔና ቁሴስ ቤሳ። ኢስቲ አዛዚዳ ያርሾዛ ጋላ፤ ሄሲካ ኢስታስ ማርካ ጊዳና” ጊዴስ።

ዮሱሲ ማቶ ሃላቃዛ አሽካራ ፓሲዴስ
(ሉቃ 7:1-10)

5 ዮሱሲ ቂፊርናሆሜ ጋኪዳ ማላ ማቶ ሃላቃይ ኢዛኮ ሺቂዲ ኢዛ ሂዝጊ ዎሲዴስ። 6 “ጎዶ! ታ አሽካራይ ኬሂ ሳኬቲዲ ኬላን ኢቺዲ ዴስ” ጊዴስ።

7 ዮሱሲካ ኢዛስ “ታ ባዳ ፓላና” ጊዴስ። 8 ማቶ ሃላቃይ ኢዛስ ዛሪዲ “ታ ኔና ታ ኬሴ ጌልሳናስ ቤሲዛዴ ጊዲኬ፤ ጊዶ አቲን ኔ ሃን ዳዳ ኢሲ ቃላ ሃላ ጊኮ ታ አሽካራይ ፓሃና። 9 ታስካ ታና አዛዚዛ ሃላቃቲ ታፔ ቦላራ ዴቴስ፤ ቃሴካ ታስ አዛዜቲዛ ዎታዳራቲ ታፔ ጋርሳራ ዴቴስ፤ ኢስታፊ ኢሳ ‘ባ!’ ጊኮ ቤስ፤ ቃሴ ኢሳ ‘ሃዶ!’ ጊኮ ዮስ፤ ታ አሽካራ ‘ሄሳ አላ!’ ጊኮ አሴስ” ጊዴስ።

10 ዮሱሲ ኢዛ ዛርዛን ማላሌቲዲ ባና ካሊዛይታስ “ታ ኢንቴስ ቱሙ ጋይስ፤ ሃራይ አቶሺን ኢስራዌሌታ ጊዶን ሃይሳ ማላ አማኖይ ዲዛዴ ኢሳዴካ ዴማቤኬ። 11 ታ ኢንቴስ ዮታይስ፤ ዳርቲ አዎ አርሼይ ሞኪዛ ባጋፊኔ ዉሊዛ ባጋፊ ያና። ሳሎ ካዎቴላ ማዳን አብራሃሜንታራ ዩሳቃንታራኔ ያቆቤንታራ ኢሲፊ ኡታና። * 12 ሳሎ ካዎቴሲ ኢስታስ ጊዳና ቤሲዛ አሳቲ ሄን ካሬ ዱማን ዩጌታና። ሄንካ ዮሆይኔ አቻ ጋርጩኝ ጊዳና” ጊዴስ። *

13 ዮሱሲካ ማቶ ሃላቃስ “ኔ ባ ኔ አማኖ ማላ ኔስ ሃኖ” ጊዴስ፤ አሽካራዚ ሄራካ ፓዲዴስ።

ዮሱሲ ዳርታ ፓሲዴስ
(ማር 1:29-34፤ ሉቃ 4:38-41)

14 ዮሱሲካ ቡሮ ጳፅሮሳ ኬሴ ጌልሺን ጳፅሮሳ ቦሎቴያ ሚሾ ሃርጌ ሳኬታዳ ኢቺዳሮ ቤዩዴስ። 15 ኢዚ ኩሼ ዮሱሲ ቦቺን ሚሾ ሃርጌይ አጊዴስ። ኢዛካ ዴንዳዳ ዮሱሳ ሞካዱስ።

16 ሄ ጋላሳ አማሪስ ዳይዳንሲ አይኪዳ ዳሮ አሳታ ዮሱሳኮ ኤሂዳ። ኢዚካ ቱና አያናታ ባ ቃላራ ኢስታፊ ኬሲዴስ፤ ሃርጋንቻታካ ኡባ ፓሲዴስ። 17 ኢሳያሲ “ኢዚ ኑ ሃርጌ ኤኪዴስ፤ ኑ ሳኮካ ቶኪዴስ” ጊዳ ቃላይ ሃይሳን ፖሌቲዴስ።

18 ዳሮ አሳይ ኢዛ ጊዶሲዳይሳ ቢዩዲ ዮሱሲ አሳ አባፊ ሄ ፒንሰ ፒናና ማላ አዛዚዴስ። 19 ሄሳ ዎዴ ኢሲ አይሁዳ አማኖ

* 8:11 ሉቃ 13:29 * 8:12 ማቶ 22:13፤ 25:30፤ ሉቃ 13:28

ታማርሲዛዴይ ኢዛኮ ሺቂዲ “አስታማሬ! ኔ ቢዛሶ አዋካ ታ ኔና ካላና” ጊዴስ።

20 ዮሱሲካ ኢዛስ ዛሪዲ “ዎርካናታስ አላይ ዴስ፤ ሳሎ ካፎታስ ኬሲ ዴስ፤ ታስ አሳ ናስ ጊዲኮ ሁዔ ጌላሲዛሶይ ባዎ” ጊዴስ።

21 ኢዛ ካሊዛ ኢሲ ሃራ አሲ ቃሴ “ጎዶ! ኮይሮ ባዳ ታ አዎ ሞጎ?” ጊዴስ። † 22 ኢዚ ቃሴ “ሃይቂዳይቲ ባ ሃይቁሰ ሞጌቶ፤ ኔኔ ጊዲኮ ታና ካላ” ጊዴስ።

ዮሱሲ አባ ዳምባላ ጮው ሂስቲዴስ

(ማር 4:35-41፤ ሉቃ 8:22-25)

23 ሄሳፌ ጉዬ ዮሱሲካ ዎጎሎን ጌሊን ኢዛ ካሊዛይቲካ ኢዛራ ኢሲፌ ቢዳ። 24 ቆፖንታ አባ ጊዶን ዳምባላይ ዴንዲዲ ዎጎሎዮ ሚታና ጋካናስ ኢስታ ዋይሲዴስ። ሄሲ ወሪ ሃኔሺን ዮሱሲ ዲስኪዴስ። 25 ኢዛ ካሊዛይቲ ኢዛ ቤጎሲዲ “ጎዶ! ኑ ዳዮስ፤ ኑና አሻ!” ጊዳ።

26 ዮሱሲካ ኢስታ “ኢንቴና አማኖይ ፓጪዳይቶ! አዛስ ሃይሳ ማላ ባቤቲ?” ጊዴስ። ሄሳፌ ዴንዲዲ ጫርኮዛኔ አባ ዳምባላ ኢዚ ሃንቂን ሄራካ ሲርጽ ጊዴስ።

27 ኢስቲካ “ሃይሲ አባይኔ ጫርኮይካ ኢዛስ አዛዜቲዛዴይ ኢዚ ዋኒዳዴ?” ጊዲ ማላሌቲዳ።

ቴና አያናፔ ፓጊዳ ናምዑ አሳታ

(ማር 5:1-20፤ ሉቃ 8:26-39)

28 ኢዚ አባ ፒኒዲ ጌርጌሴኖኔ ጌቴቲዛ ዴሬ ጋኪዳ ማላ ዳይዳንሲ አይኪዳ ናምዑ አስ ዳይቲ ባ ዲዛ ዱፎፔ ኬዚዲ ኢዛራ ጋጊዳ። አሲ ሄ አጌዛራ አዳናስ ዳንዳዮቶንታ ማላ አሳስ ዳሮ ኬሂ ሜቶ ጊዲ ዴቴስ። 29 ኢስቲካ “ዎሳ ናዉ! ኔስ ኑናራ አዛ ኢሲፌቴስ ዲዜ? ኑ ዎዴይ ጋኮንታ ዲሺን ኑና ፀጋና ያዲ?” ጊዲ ዋሲዳ።

30 ሄን ኢስታፌ ጉስ ሃኪዲ ዳሮ ጉዱንሳ ዉዴይ ኢሲ ቦላ ሄሜቴስ። 31 ዳይዳንሳቲ ዮሱሳ “ኔ ኑና ኬሳና ጊዲኮ ሃይታን ዳሮ ጉዱንሳታን ኑ ጌላና ማላ ኑስ ፒቃዴ ኢማ” ጊዲ ዎሲዳ።

32 ዮሱሲካ ኢስታ “ቢቴ!” ጊዴስ። ዳይዳንሳቲካ ኢስታፌ ኬዚዲ ጉዱንሳታን ጌሊዳ። ጉዱንሳቲ ዉሪካ ባ ዲዛሶ አፎራ ቢቻርሼ አባን ጌሊዲ ሃሳን ሚቴቲዲ ሃይቂዳ።

33 ጉዱንሳ ሄሚዛይቲ ኤሌሲዲ ካታማይ ዲዛሶ ቢዲ ጉዱንሳይ ሃኖይሳኔ ዳይዳንሲ ኢስታ አይኪዳ አሳታ ቦላ ሃኒዳይሳ ኡባ አሳስ

† 8:21 ታ አዎ ሞጎ? ኢዛ አዎይ ሃይቃና ጋካናዉ ሄሚዲ ሃይቂኮ ሞጊ ያናስ ዲዛ ኢዛ አሞዛ ቤሲዛ ሚሳቴስ።

ዮሐንስ።³⁴ ካታማ አሳይ ዉሪ ዮሱሳራ ጋጋናስ ኬዚደስ። ዮሱሳ ቤዩዲኔ ኢስታ ዴሬ ዮዲ ባና ማላ ኢዛ ዎሲዳ።

9

ጉንዳ አደዛ ፓዎ

(ማር 2:1-12፤ ሉቃ 5:17-26)

¹ ሄሳፌ ጉዮ ዮሱሳ አባ ቦላ ዎንሎራ ፒኒዲ ካሴ ባ ዲዛ ካታማ ዩደስ። ² ሄን ኢሲ ጉንዳ አደዛ፤ አሳይ ሃላራ ቶኪዲ ዮሱሳኮ ኤሂደስ። ዮሱሳካ ኢስታ አማኖ ቤዩዲ ጉንዳ አደዛ “አይኮይ ባ፤ ሃይሶ ናዞ! ኔ ናጋራይ አቶ ጌቴቲደስ” ጊደስ። *

³ ሄ ዎዴ ሙሴ ዎጋ ታማርሲዛይቲ “ሃይሲ ዶሳ ጫሻ” ጊዲ ባ ዎዝናን ቆፒዳ።

⁴ ዮሱሳ ኢስታ ቆፋ ኤሪዲ “ኢንቴ ዎዝናን ኢታ ዮዎ አዛስ ቆፕቲ?” ⁵ “ኔ ናጋራይ አቶ ጌቴቲደስ” ጉሳፌኔ ‘ዴንዳዳ ባ!’ ጉሳፌ አዋይሲ ካዉሼ? ⁶ ጊዶ አቲን አሳ ናስ ቢታ ቦላ አሴ ናጋራፕ ማራሪሽ ሼኔይ ዲዛይሳ ኤራና ማላሳ” ጊዲ ጉንዳ አደዛ “ዴንዳ! ኔ ሃላ ኤካዳ ይዴ ኔሶ ባ” ጊደስ። ⁷ ጉንዳ አደዛኪካ ዴንዲዲ ባሶ ቢደስ። ⁸ ዴሬይካ ሄሳ ቤዩዲ ማላሌቴሳኒኔ ባቦን ኩሚዲ ሃይሳ ሲሪ ጎዳቴሲ አሳስ ኢሚዳ ዶሳ ጋላቲደስ።

ዮሱሳ ማቶሳ ዪይጊደስ

(ማር 2:13-17፤ ሉቃ 5:27-32)

⁹ ዮሱሳ ሄፕ ዴንዲዲ ቢሼ ኢሲ ማቶሳ ጌቴቲዛዴይ ቃራፃ ቃንፂሲዛሶን ኡቲዳይሳ ቤዩዲ “ታና ካላ!” ጊን፤ ዴንዲዲ ኢዛ ካሊደስ።

¹⁰ ዮሱሳ ማቶሳሶን ማዳ ቦላ ዲሺን ዳሮ ቃራፃ ቃራፂዝይቲኔ ናጋራንቻቲ ኢዛኮ ዮዲ ኢዛራኔ ኢዛ ካሊዛይታራ ኢሲፌ ማናስ ኡቲዳ። ¹¹ ፋርሳዌቲ ሄሳ ቤዩዲ ዮሱሳ ካሊዛይታ “ኢንቴና ታማርሲዛይሲ ቃራፃ ቃንፂሲዛይታራኔ ናጋራንቻታራ ዎስቲ ኢስታራ ኢሲፌ ካሳ ሚዜ?” ጊ አይቺዳ።

¹² ዮሱሳካ ኢስቲ ጊዛይሳ ሲይዲ ኢስታ “አኪሜይ ኮሺዛይ ሳኬቲዳይታስ አቲን ሳኬቶንታ ፓፃታስ ጊዴና። ¹³ ሄሳ ጊሽ ‘ኢንቴ ቤዲ ያርሾ ጊዶንታ ማሮቴሳ ዶሳይስ’ ጊዛ ቃላ ቢርሼሳ ታማራቴ። ናጋራንቻታ ዪይጋና ያዲስ አቲን ፂሎታ ዪይጋናስ ያቤኬ” ጊደስ። *

* 9:2 ሃላ፤ ኢሲ ኢሲ ባጋ ጋሞሶ ቃላን ሃላ ጉሲ ዛጳ ጉሳ። * 9:13 ማቶ 12:7

ዩሱሳ ካሊዛይቲ የማ የሞንታ ጋሶ

(ማር 2:18-22፤ ሉቃ 5:33-39)

14 ግማቂዛ ዮሃንሳ ካሊዛይቲ ዩሱሳኮ ዩዲ “ኑኒኔ ፋርሳዌቲ የሚሸን ኔና ካሊዛይቲ አዛሰ የሚጮኑ?” ጊ አይቺዳ።

15 ዩሱሱ ኢስታስ “ሚሸራ ላጌቲ ሚሸራዚ ኢስታራ ዲሸን ሙዝታና ቤሲዜ? ሚሸራይ ኢስታፌ ኤኬታና ዎዴይ ያና፤ ኢስቲ ሄ ዎዴ የማና።

16 “ጋልዓ ማይዎ ቦላ አራሳ ዎሶ ዎሲ ሲኪዛ አሲ ዴና። ጋልዓ ቦላ አራሳ ዎሲ ሲኪኮ አራሳዚ ጋላዓዛ ፔዴሬሲዲ ሃ ዳሲ ዳሪሳና። 17 አኒካ አራሳ ዎይኔ ጫጄ ጋልዓ ሉካሞን ጉጄና። ጉጄዛ ጊዲኮ ሉካሞዚ ዱቃና፤ ዎይኔ ጫጄዚካ ጉካና፤ ሉካሞዚካ ንዓይ ባይንዳዚ ጊዳና። ጊዶ አቲን አራሳ ዎይኔ ጫጄይ አራሳ ሉካሞዛን ጉጄቴስ። ሄሳ ማላራ ዎይኔ ጫጄዚኔ ሉካሞዚ ሎዎ ናጌቲዲ ጋምዓና” ጊዴስ። †

የዲሮሳ ናዮኔ ዩሱሳ አፋላ ማጫራ ቦቺዳ ማጫሳዮ

(ማር 5:21-43፤ ሉቃ 8:40-56)

18 ዩሱሱ አሳ ሃሳይሶን ዲሸን ኢሲ ሹሜይ ኢዛ ሲንሳን ኩንዲዲ “ታስ ና ዳራ ሃይቃና ጋወስ። ኢዛ ጋዓ ዳና ማላ ያዳ ኔ ኩሼ ኢዚ ቦላ ዎሳርኪ?” ጊን፤ 19 ዩሱሱ ዴንዲዲ ኢዛራ ቢዴስ፤ ዩሱሳ ካሊዛይቲካ ኢዛራ ቢዳ።

20 ታማኔ ናምዑ ላይሳ ኩሜሳ ኢዚፔ ሱሲ ጉኪዛ ኢሲ ማጫሲ ዩሱሳፔ ጉዮራ ያዳ ኢዛ አፋላ ማጫራ ቦቻዱስ። * 21 ኢዛ ሄሳ አሲዳይ “ታ ኢዛሰ አፋላ ማጫራ ቦቺዳኮ ጋዓና” ጊዛ አማኖይ ኢዚ ዎዝናን ዲዛ ጊሽ ቦቻዱስ።

22 ዩሱሱካ ጉዮ ሲሚ ያሊዲ ማጫሳዮ “አይኮይ ባ፥ ታ ናዩ፤ ኔና ኔ አማኖይ ፓሲዴስ” ጊን ማጫሳዮ ሄራካ ጋዓጋዱስ።

23 ዩሱሱካ ሹሜዛ ሶ ማታ ጋኪሸን ዴሬይ ዛዮራኔ ዲንኬራ ዋሲሼ ዩኪዛይሳ ቤዒዲ፤ 24 “ኪቺቲ! ናዎ ዲስካዱስ አቲን ሃይቃቤኩ” ጊን ኢስቲ ኢዛ ቦላ ሚጪዳ። 25 ዴሬይ ወሪ ኪሳሬ ኪዚን ኢዚ ኪሴ ጌሊዲ ናይ ኩሼ አይኪዴስ፤ ናዎካ ዴንዳ ኤቃዱስ። 26 ኢዛ ንባቴሲ ሄ ዴሬ ኡባን ሴቴቲዴስ።

ዩሱሱ ዱና ዱዴዛኔ ቆቂታ ፓሲዴስ

27 ዩሱሱካ ሄፔ ቢሸን ናምዑ ቆቂቲ “ዳዉቴ ናዉ! ኑና ማራሪኪ!” ጊዲ ዋሲሼ ኢዛ ጌዶ ካሊዳ።

† 9:17 ሉካሞ፥ ኢሲ ኢሲ ባጋ ጋሞሶ ቃላን አጎሮ ጉሳ። * 9:20 ታይ 15:38፤ ዛሬ 22:12

28 ቆቆቲካ ዮሱሲ ጌሊዳ ኬሳ ኢዛ ካሊዲ ጌሊዳ። ዮሱሲካ ኢስታ “ታ ኢንቴ አይፌ ፓሳና ዳንዳዲዛይሳ አማኔቲ?” ጊዲ አይቺዴስ። ኢስቲካ “ኤ፥ ጎዶ!” ጊዳ።

29 ሄሳፌ ጉዬ ዮሱሲ ኢስታ አይፌ ቦቺዲ “ኢንቴ አማኖ ማላ ኢንቴስ ሃኖ!” ጊዴስ። 30 ኢስታ አይፌይካ ያሊዴስ። ዮሱሲካ “ሃይሳ አኒካ ኤሮንታ ማላ” ጊዲ ሚንሲ ዮቲዴስ።

31 ጊዶ አቲን ኢስቲ ቢዲ፥ ሄራ ኡባሶን ዮሱሳ ጊሽ ዎሬሲዳ። 32 ኢስቲ ሄፔ ኬዚሺን ዳይዳንሲ አይኪዳ ኢሲ ዱና ዱዴ አስ ዮሱሳኮ ኤሂዳ። 33 ዳይዳንሳዚ ኬዚዳፔ ጉዬ ሄ ዱና ዱዴ አይዚ ሃሳያ አይኪዴስ፤ ዴሬዚካ ማላሌቲዲ “ሃይሳ ማላ ሃኖይ ኢስራዴሌ ቢታን ሃኒን ኑ ቤዬ ኤሮኮ” ጊዳ።

34 ጊዶ አቲን ፋርሳዌቲ ዛሪዲ ኢዛ “ዳይዳንሲ ኬሲዛይ ዳይዳንሳታ ሃላቃና” ጊዳ። *

ዮሱሲ አሳስ ሚቼቲዴስ

35 ዮሱሲ አይሁዳታ ዎሳ ኬሳን አይሁዳታ ታማርሲሼኔ ያሳ ካዎቴሳ ሚሺራቾ ቃላ ዮቲሼ ቃሴካ ሃርጌ ኡባፌ አሳ ፓሲሼ ጉታታን ጉታታን ዩዩዴስ። * 36 አሳይ ወሪ ሄሚዛይይ ባይንዳ ዶርሳ ማላ ኬሂ ሜቶቴቲዲ ያሊዛይ ባይንዳዴ ጊዲዳይሳ ቤዩዳ ዎዴ ኢስታስ ዳሮ ሚሼቲዴስ። * 37 ባና ካሊዛይታስካ “ማፃ ጋኪዳ ካሳይ ዳሮ ሺን ማፂ ሺሺዛይቲ ጉሳታ። 38 ሄሳ ጊሽ ካሳ ጎዳይ ካሳኮ አሳንቻታ ዩዳና ማላ ዎሲቲ!” ጊዴስ።

10

ዮሱሳ ካሊዛ ታማኔ ናምዓታ ኪቴቴሉ
(ማር 3:13-19፤ ሉቃ 6:12-16)

1 ዮሱሲ ባና ካሊዛ ታማኔ ናምዓታ ባኮ ያይጊዲ፥ ኢስቲ ቱና አያናታ ኬሳና ማላ ቃሴካ ሳኮፔኔ ሃርጌፌ ፓሳና ማላ ኢስታስ ጎዳቴሉ ኢሚዴስ። 2 ታማኔ ናምዑ ሃዋሬታ ሱንሳይ ሃይሳፌ ካሊዛይሳ፤ ኮይሮ ጳፅሮሳ ጌቴቲዛ ሲሞና፥ ኢዛ ኢሻ ኢንዲራሳ፥ ዛቢዶሳ ና ያቆቤኔ ኢዛ ኢሻ ዮሃኒሳ፥ 3 ፒሊጶሳኔ ባርቴሌሞሳ፥ ቶማሳኔ ቃራፃ ሺሺዛ ማቶሳ፥ ኢልፊዮሳ ና ያቆቤኔ ታዶሳ፥

* 9:34 ግቶ 10:25፤ 12:34፤ ማር 3:22፤ ሉቃ 11:15 * 9:35 ግቶ 4:23፤ ማር 1:39፤ ሉቃ 4:44 * 9:36 ማር 6:34

4 ባ ባጋስ ሚሼቴዛ ሲሞናኔ ጉዩፔ ዩሱሳ ሃይቆስ አሲ ኢሚዳ አስቆሮንቶ ዩሁዳ። *†

5 ሃይታ ታማኔ ናምዓታ ኡባ “ጌዴ አይዛቤታ ጋስ ቦፒቴ፤ ሳማሪያ አሳ ካታማ ጌሎፒቴ። 6 ጊዶ አቲን ኢስራዔል ዴራ ጋርሳፌ ዳዩዳ ዶርሳታኮ ቢቴ። 7 ቢዲኔ ‘ሳሎ ካዎቴስ ማቲዴስ!’ ጊዲ ሳባኪቴ። * 8 ሃርጋንቻታ ፓሲቴ፤ ሃይቂዳይታ ሃይቆፔ ዴንሲቴ፤ ኢንቺራቻ ሃርጊዛይታ ጌሺቴ፤ ዳይዳንሳታ ኬሲቴ፤ ኢንቴ ሜላ ኤኪዳይሳ ሜላ ኢሚቴ፤ 9 ዎርቃ፤ ቢራ ዎይኮ ሃርቂማላ ጊዲን ኢንቴ ኪሴን አይኮፍቴ። 10 አሳንቻስ ሃቺስ ሃቺስ ጊዲዛዚ ኮሺዛ ጊሽ ኢንቴ ኦጌስ ጊዲ ሺንቄ፤ ኮሾንታ ማይዎ፤ ጫማ ዎይኮ ጉፌ ኤኪ ቦፒቴ። *

11 “ኢሲ ካታማ ዎይኮ ኢሲ ጉታ ኢንቴ ጌሊዛ ዎዴ ኢንቴና ሞካናዴ ኮዩ ዴሚዲ ኢዛ ኬሳን ሺምፒቴ፤ ሄፔ ኬዛና ጋካናስ ሄን ዲሺቴ። 12 ኢንቴ አና ኬሲካ ጌሊሼ ‘ሳሮ’ ጊቴ። 13 ሄ ኬሳይ ሳሮታይ ቤሲዛ ኬሴ ጊዲኮ ኢንቴ ሳሮታይ ሄ ኬሳስ ጊዶ፤ ሶርታይ ቤሶንታ ኬሴ ጊዲኮ ኢንቴ ሳሮታይ አጊዲ ኢንቴስ ሲሞ። 14 አይ አሲካ ኢንቴና ሞኪ ኤካናሲኔ ኢንቴ ጊዛ ሲያናስ ኮዮንታዴ ጊዲኮ ሄሳዴ ኬሳፌ ዎይኮ ሄ ካታማፔ ኬዚሼ ኢስታ ቦላ ዩዛ ጎሜፔ ኢንቴ አቲዳይሳስ ማርካ ጊዳና ማላ ኢንቴ ቶሆ ቦላ ዲዛ ጉዱላ ፒቴዲ ኬዚቴ። * 15 ታ ኢንቴስ ቱሙ ጋይስ፤ ፒርዳ ጋላስ ሄ ካታማይ ቦላ ጋካና ፒርዳይ ሶዶሜ ቦላን ጋሞራ ቦላ ጋኪዳ ፒርዳፌ ዴዎ ጊዳና። *

16 “ታ ኢንቴና ዶርሳ ማላ ካና ሱይቴታ ጊዶራ ኪታይስ። ሄሳ ጊሽ ሾሻ ማላ ጨንጫታኔ ሃራጴ ማላ አሽኬታ ጊዲቴ። * 17 አሳይ ኢንቴና አይኪዲ ፒርዲዛ ዱላታስ ሺሻና፤ አይሁዳቲ ባ ዎሳ ኬሳን ኢንቴና ጋራፋና፤ ሄሳ ጊሽ ኢስታፌ ናጌቴቴ። * 18 ታ ጌዶን ዴሬ ሃሪዛይታኮኔ ካዎታኮ ኢንቴና ኤፋና፤ ኢስታ ሲንሴኒኔ አማናንታ አሳታ ሲንሳን ኢንቴ ማርካ ጊዳና። 19 ኢንቴና ኢስቲ አይኪዛ

* 10:4 ባ ባጋስ ሚሼቴዛ ሲሞና ሃይሲ ሃ ሱንሳይ ጉጂቴዳይ ኢሲ ኢሲ አሳቲ ኢዚ ባ ሃይማናቴዛስ ሚሼቴዛ ጊሻሳ ጌቴስ። ሃራቲ ቃሴ ኢዚ ኢሲ አሳ አይሉቴሳፌ ኬሲዛ ኢሲ ዲርጂቴ ጊዶን ዲዛ ጊሻሳ ጌቴስ። † 10:4 አስቆሮንቶ ሃይሳ ሃ ቃላ ጊሽ ሺቂዛ ናምዑ ቆፋቲ ዴቴስ፤ ኢሶይ ዩሁዳይ አስቆሮንቶ ጊዛ ዴሬፔ ዩዳይሳ ቤሳናስ ጎጴቲሺን ሃራይቲ ቃሴ ዩሁዳ፤ ዎርዳንቻኔ ባሌሲዛይሳ ጊዲ ጫያናስ ጎጴቲዛ ሱንሳ ጌቴስ። * 10:7 ሉቃ 10:4-12 * 10:10 1ቆሮ 9:14፤ 1ፂም 5:18 * 10:14 ሃዎ 13:51 * 10:15 ማቶ 11:24 * 10:16 ሉቃ 10:3 * 10:17 ማር 13:9-11፤ ሉቃ 12:11-12፤ 21:12-15

ዎዴ ኑ አይ ጊ ሃሳዩኖ? ዎዝጊ ዛሮ ኢሚኖ? ጊ ሂርጎፍቴ። ሄ ዎዴ ኢንቴ ጋናዚ ኢንቴስ ኢሜታና። ²⁰ ኢንቴናን ሃሳያናይ ኢንቴ አዋ አያናፔ አቲን ኢንቴና ጊዴኬታ።

²¹ “ኢሻይ ባ ኢሻ ሃይቆስ አሲ ኢማና፤ አዋይ ባ ና ቦላ፥ ናይቲ ባና ዩሊዳይታ ቦላ ማካላቴላን ዴንዲዲ ሃራ አሳን ዎዲሳና። ²² ታ ጊሽ አሲ ዉሪካ ኢንቴና ኢፃና። ጊዶ አቲን ዉርሴስ ጋካናስ ሚቅኒ ኤቂዳይ ኢዚ አታና። * ²³ አሳይ ኢንቴና ኢንቴ ዲዛ ሄራፔ ጎዲኮ ሃራሶ ኪቺቴ! ታ ኢንቴስ ቱሙ ጋይስ፤ ኢንቴ ኢስራጌሌ ካታማ ኡባ ጋኮንታ ዲሺን ታ አሳ ናይ ያና።

²⁴ “አሽካራይ ጎዳፔ ዎይኮ ካሊዛዴይ ካሌሲዛዴፌ አደና። * ²⁵ ታማሪይ ባና ታማርሲዛይሳ ማላ ዎይኮ አሽካራይ ጎዳ ማላ ጊዲኮ ሄሲ ኢዛስ ጊዳና። ኬላ አዋ ‘ቢዴሊዜቡላ’ ጊኮ ሶ አሳ አይሲ ሄሳፌ ኢታ ጌቴኔ! *

²⁶ “ሄሳ ጊሽ ኢስታስ ባቦፍቴ፤ ጌሜቲዳይ ቆንጮንታ ቆቴቲዳይ ጌሽ ኬዞንታ አቴና። * ²⁷ ታ ኢንቴስ ዲማራ ዮቲዳይሳ ፖፖን ሃሳዩቴ፤ ሃይሳን ሲዩዳይሳ ቆንጮን ሃሳዩቴ። ²⁸ አሾ ዎዲኮፌ አቲን ሼምፖ ዎዳናን ዳንዳዮንታይታስ ባቦፍቴ፤ ሄሳፌ አሾኔ ሼምፖ ጋሲ ጋናሜ ታማን ዳይሳናስ ዳንዳዩዛይሳስ ባቢቴ። ²⁹ ኢሲ ሳንቴን ባይዜቲዛ ናምዑ ሲኔ ካፎታፔ ኢሲኒያካ ኢንቴ ሳሎ አዋ ሼኔይ ባይንዳ ጮ ኩንዳ አቱኩ። † ³⁰ ሃራይ አቶ ሺን ኢንቴ ሁዔ ቢናናይካ ታዩቦን ዴስ። ³¹ ሄሳ ጊሽ ባቦፍቴ። ዳሮ ሲኔ ካፎታፔ ኢንቴ ዋጋይ አዲ ቦንቼቲዳዛ።

³² “አሳ ሲንሳን ታስ ማርካቲዛዴስ ታካ ሳሎን ዲዛ ታ አዋ ሲንሳን ኢዛዴስ ማርካታና። ³³ ቃሴ አሳ ሲንሳን ታና ካዲዳይ ታካ ሳሎን ዲዛ ታ አዋ ሲንሳን ኢዛ ካዳና። *

³⁴ “ታ ቢታ ቦላ ሳሮቴስ ኤሃናስ ዩዳ ኢንቴስ ሚሳቶፖ፤ ማሻ ኤሃናስ አቲን ሳሮቴስ ኤሃናስ ያቤኬ። ³⁵ ታኒ ዩዳይ ና አዋፔ፥ ማጫ ና አዩፔ፥ ና ማሻ ቦሎቴፔ ሻካናሳ። ³⁶ አሳስ ሞርኬይ ሶ አሳ ጊዳና።

³⁷ “ታፔ አሲዲ ባ አዋ ዎይኮ ባ አዮ ሲቂዛዴይ ታስ ጊዳናስ ቤሴና። ታፔ አሲዲ ባ አቱማ ና ዎይኮ፥ ማጫ ና ሲቂዛዴይ ታስ ጊዳናስ ቤሴና። ³⁸ ባ ማስቃሌ ቶኪዲ ታና ካሎንታ አሲ ታስ

* 10:22 ማቶ 24:9፤ ማር 13:13፤ ሉቃ 21:17 * 10:24 ሉቃ 6:40፤ ዮሃ 13:16፤ 15:20 * 10:25 ማቶ 9:34፤ 12:24፤ ማር 3:2፤ ሉቃ 11:15 * 10:26 ማር 4:22፤ ሉቃ 8:17 † 10:29 ሲኔ ካፎ ኢሲ ኢሲ ባጋ ጋሞሶ ቃላን ሲኔ ጊዛይሲ ጋሼ ካፎ ጉሳ። * 10:33 2፲፱ 2:12

ጊዳናስ ቤሴና። * 39 ባ ሼምፖ አሻናስ ኮዬዛዴይ ዳይሴስ፤ ባ ሼምፖ ታ ጊሽ አሲ ኢሚዛዴይ አሼስ። *

40 “ኢንቴና ሞኪ ኤኪዛዴይ ታናካ ሞኪ ኤኬስ። ታና ሞኪ ኤኪዛዴይ ታና ኪቴዳዴካ ሞኪ ኤኬስ። * 41 ኢሲ ናቤ ናቤቴላን ሞኪ ኤኪዛዴይ ሄ ናቤዛ ዋጋ ዴማና። ዓሎ አስ ኢዛ ዓሎቴላ ጊሽ ሞኪ ኤኪኮ ሄ ዓሎዛ ዋጋ ኤካና። 42 ሄሳ ጊሽ ታ ኢንቴስ ቱሙጋይስ፤ እኒካ ሃይታ ጉሳታፕ ታና ካሊዛዴ ጊዲዳ ጊሽ ኢሲ ፀ-ዓ ኢርፃ ሃላ ኡሺኮ ሂኒስካ ዋጋይ ዳዩና” ጊዴስ።

11

ፃማቂዛ ዮሃንሲ ኪቴዳ አሳታ

(ሉቃ 7:18-35)

1 ዩሱሲካ ባና ካሊዛ ታማኔ ናምፀ- አሳታስ አዛዞ ኢሚ ወርሲዳፕ ጉዩ ታማርሳናሲኔ ሳባካናስ ጋሊላን ዲዛ ካታማታ ቤዴስ።

2-3 ዮሃንሲ ቃሾ ኬላን ዲሼ ኪርስቶሳስ አሊዛ ሃናታ ሲይዲ ባና ካሊዛይታ ኢዛኮ ዩዲዲ “አሲ አሺዛዴይ ያና ጌቴቴዳይ ኔኔዩ? ሃራ ናጊኖ?” ጊዴ አይቺዴስ።

4 ዩሱሲካ ዛዴዲ “ቢዲ ኢንቴ ሲዳይሳኔ ኢንቴ ቤዩዳይሳ ዮሃንሳስ ዮቴቴ። 5 ቆቆቴ ያሌቴስ፤ ዎቤቴ ሃሙቴቴስ፤ ኢንቸራቻ ሃርጊዛይቴ ፓዳቴስ፤ ቱሌቴ ሲዩቴስ፤ ሃይቀዳይቴ ሃይቆፕ ፓዲ ዴንዴቴስ፤ ማንቆታስ ሚሺራቾ ቃላይ ዮቴቴስ። 6 ታናን ዱጴቶንታዴይ አንጄቴዳዴ” ጊዴስ።

7 ዮሃንሳ ካሊዛይቴ ቤዳፕ ጉዩ ዩሱሲካ አሳስ ዮሃንሳ ጊሽ “አይ ቤያናስ ዱጌ ባዞ ቤዴቴ? ጫርኮይ ቃሲዛ ሾምቦቆ ቤያናስ ዩዴቴ? 8 ዎይኮ አይ ቤያናስ ኬዚዴቴ? ሎዎ ማይዎ ማይዲዲ ሎዲ ኡቴዳዴ ቤያና ዩዴቴ? ሎዎ ማይዎ ማይዲዲ ሎዲዛይቴ ካዎታ ኬላን ዴቴስ። 9 ሂስቴን አይ ቤያና ኬዚዴቴ? ናቤ ቤያና ኬዚዴቴ? ኤ። ታ ኢንቴስ ጋይስ ናቤፕ አዲዛይሳ ቤያናሳ።

10 ኔ ባና አኔ ኔስ ጊጊሳናዴ ኔፕ ካሴታ ታ ኔስ ኪታና ጌቴቴዲ ኢዛ ጊሽ ካሴ ዓፌቴዳዴይ ኢዛኮ!”

ጊዴስ። 11 ታ ኢንቴስ ቱሙጋይስ፤ ማጫሳፕ ዩሌቴዳ አሳፕ ፃማቂዛ ዮሃንሳ ሚሳቴዛ አሲ ቤታ ቦላ ዴንዲቤና። ጊዲኮካ ያሳ ካዎቴላን አስ ኡባፌ ላፋ አሲ ዮሃንሳፕ አዳና።

* 10:38 ማቶ 16:24፤ ማር 8:34፤ ሉቃ 9:23 * 10:39 ማቶ 16:25፤ ማር 8:35፤ ሉቃ 9:24፤ 17:33፤ ዮሃ 12:25 * 10:40 ማር 9:37፤ ሉቃ 9:48፤ ዮሃ 13:20

12 “ግማቂዛ የሃረሳ ዎዴፕ ሃ ሲሚን ሃረ ጋካናስ ሳሎ ካዎቴሳያ ዳሮ ባዪታ ቦላ ዳዉስ። ሚኖ አሳቲ ሃላ ኢዞ ዴማና። 13 ናቤቲካ ሙሴ ዎጋይካ ዉሪ የሃረሳ ዎዴ ጋካናስ ቡሮፕ ሃናናይሳ የቲዳ።

14 ሂስቲኮ ኢንቴ ኤካና ኮይኮ ኢዚ ያና ጌቴቲዳ ኤላሲ ኢዛኮ! *

15 ሲዱዛ ሃይሲ ዲዛ አስ ሲዮ!

16-17 “ሃይሳ ሃ ዎዴ አሳ አዛን ሌሚሶ? ጊያን ኡቲዲ ባ ላጌታ ‘ኑ ኢንቴስ ዲሲ ዲዲን ኢንቴ ዱርቤኬታ! ዮሆ ዚላልስ ዚላሲን ዮኪቤኬታ!’ ጊዛ ናይታ ሚሳቴቴስ። 18 የሃረሲ ሙሳፌኔ ኡሻፌ ናጌቲዲ ዬዳ ጊሽ ‘ኢዚ ዳይዳንሳራ ዴስ’ ጊዳ። 19 ታ አሳ ናይ ማሼኔ ኡያሼ ዬን ‘ሃይሲ ሚዲ ካሎንታ አሳ፣ ኡሻንቻ፣ ቃራፃ ሺሺዛይታሲኔ ናጋራንቻታስ ላጌኮ!’ ጊዳ። ጊዶ አቲን ያሳ ኤራቴሲ ባ አሶን ዲላዱስ” ጊዴስ።

አማኖንታ ኢዲዳ ጊሽ ዋላሴቲዳ ካታማታ
(ሉቃ 10:13-15)

20-21 ሄሳፌ ጉዬ ዮሱሲ ኢዚ ማላታታ አሲዳ ካታማ አሳይ ማሮቴላን ጌሎንታ አጊዳ ጊሽ “ኩራዚኔኔ ቤቴሳይዳ! ኢንቴና አዬ አና! ኢንቴ ቦላ አሴቲዳ ማላታይ ዲሮሴ ቦላኔ ሲዶና ቦላ አሴቲዳኮ ኢስቲ ማቃ ማይዲዲኔ ቢዲንሳን ኡቲዲ ቤኔ ቤኔ ማሮቴላን ጌላናኮሺን። * 22 ሄሳ ጊሽ ታኔ ኢንቴስ ጊዛይ ፒርዳ ጋላስ ኢንቴፌ አዲ ዲሮሴሲኔ ሲዶናስ ቂፃቴይ ካዉያና።

23 “ሃኔ ቁሬርናሆሜ ፑዴ ሳሎ ዶቁ ዶቁ ጋናስ ኮያዲ? ጊዶ አቲን ኔኔ ዱጌ ሲዶሴ ዎዳንዳሳ፤ ኔ ቦላ አሴቲዳ ማላታይ ሶዶሜን አሴቲዳኮ ሶዶሜይ ሃቺ ጋካናስ ዳናኮሺን። 24 ሄሳ ጊሽ ታ ኔና ጊዛይ ፒርዳ ጋላስ ቂፃቴይ ኔፕ ሶዶሜስ ካዉያና” ጊዴስ። *

ኪርስቶሲ ኢሚዛ ሼምፖ
(ሉቃ 10:21-22)

25 ሄ ዎዴ ዮሱሲ “ሳሎኔ ሳዓ ጎዶ! ታ አዋዉ! ሃይሳ ዳሮ ኤራንቻታፔኔ ጨንጫታፔ ቆታዳ ቂሪ ናይታስ ኔ ቆንጨሲዳ ጊሽ ታ ኔና ጋላታይስ። 26 ታ አዋዉ! ኤ ሃይሲ ኔ ሲንሳን ሎዶ ኔ ሼኔ ጊዲዲ ቤቲዴስ።

27 “ዉሪካ ታ አዋፕ ታስ ኢሜቲዴስ፤ አዋፕ አቲን ናዛ ጊሽ ኤሪዛ አስ ባዋ፤ ቃሴ ናዛፔኔ ናዚ ባ ሼኔን ቆንጨሲዳ አሳፕ ሃራይ አዋ ኤሪዛ አስ ባዋ። *

* 11:14 ማቶ 17:10-13፤ ማር 9:11-13 * 11:20-21 ማቃ ጊዛይሲ ኢሲ ኢሲ ባጋ ጋሞሶ ቃላን ዋሮ ጌቴቴስ። * 11:24 ማቶ 10:15፤ ሉቃ 10:12 * 11:27 ዮሃ 3:35፤ 1:18፤ 10:15

28 “ቶሆዬ ዴዲዳይቶ፥ ዳቡሪዳይቶ ኢንቴ ወራሪካ ታኮ ሃ ዩቴ፤ ታካ ኢንቴስ ሼምፖ ኢማና። 29 ታ ቃምባራ ቶኪቴ፤ ታፕካ ታማሪቴ፤ ታኒ ታ ምዝናን አዳኔ አሽኪ፤ ኢንቴ ሼምፖስ ኢንቴ ሼምፖ ዴማና። 30 ታ ቃምባራይ ሻይኮኔ ታ ቶሆይ ካወሻ” ጊዴስ።

12

ሳምባታ ጊሽ ሺቂዳ አይሾ (ማር 2:23-28፤ ሉቃ 6:1-5)

1 ሄሳፌ ጉዩ ዩሱሲ ሳምባታ ጋላስ ካሳ ጊዶራ አዲ ቢዴስ። ኢዛ ካሊዛይቲካ ጋሬዳ ጊሽ ቲያ ዱሲዲ ሺጊቺ ሙስ አይኪዳ።
 2 ፋርሳዌቲ ሄሳ ቤዩዲ ዩሱሳ “ሄኮ ኔና ካሊዛይቲ ሳምባታ ጋላስ አሴታናስ ቤሶንታይሳ አሴቴስ” ጊዳ።
 3 ኢዚካ ኢስታስ ዛሪዲ “ዳወቴይኔ ኢዛራ ዲዛ አሳቲ ጋሬዳ ምዴ ኢዚ አይ አሲዳኮኔ ናባቢቤኬቲ? 4 ያሳ ኬሴ ጌሊዲ ቁሴታፕ አቲን ዳወቴይኔ ኢዛራ ዲዛይቲ ቦቻናስ ቤሶንታ ዱማቲዳ ኡኬስ ሚዴስ። 5 ቃሴ ቁሴቲ ሳምባታ ሻሪዲ ያሳ ኬሳ ጊዶን አሶ አሴኮ ሞሮ ጊዶንታይሳ ሙሴ ምጋፕ ናባቢቤኬቲ? 6 ጊዲኮካ ታ ኢንቴስ ጊዛይ ያሳ ኬሳፌ አዲዛዴይ ሃን ዴስ። 7 ‘ታኒ ያርሾ ጊዶንታ ማሮቴስ ዶሳይስ’ ጊዛ ቃላይ አይ ጉሲኮኔ ኢንቴ ኤሪዛኮ ዒሎታ ቦላ ፐርዴኬታኮሺን። * 8 አሳ ናይ ሳምባታስ ጎዳ” ጊዴስ።
 9 ሄፕ ኢዚ ጌዴ አዲሼ አይሁዳታ ምሳ ኬሳን ጌሊዴስ። 10 ሄንካ ኢሲ ኩሼ ሲሊዳዴይ ዴስ። ዩሱሳ ሞታናስ ጋሶ ኮይዲ “ሳምባታ ጋላስ ፓላናስ ቤሲኬ?” ጊዲ ኢዛ አይቺዴስ።
 11 ኢዚካ ኢስታ “ኢንቴፌ ኢሳዴ ዶርሲ ሳምባታ ጋላስ አላን ጌሊኮ ባ ዶርሳ ኢዚ ጌሊዲ አላፌ ጎቺ ኬሲ ኤሬኔ? * 12 ሂስቲኮ አሲ ዶርሳፌ ኬሂ አዴኔ? ሄሳ ጊሽ ሳምባታ ጋላስ ሎዎ አሶይ ዲጌቴና” ጊዴስ። 13 ቃሴካ አዴዛ “ኔ ኩሼ ፐዲሳ!” ጊዴስ፤ አዴዚካ ባ ኩሼ ፐዲሲን ሂንኮ ኩሼዛ ማላ ፓፃ ጊዲዴስ። 14 ጊዶ አቲን ፋርሳዌቲ ሄፕ ኬዚዲ፥ ዩሱሳ ምስቲ አይኪ ምዳናኮኔ ባ ጊዶን ዞሬቲዳ።

ያሲ ዶሪዳ አሽካራ

15 ዩሱሲ ኢስታ ቆፋ ኤሪዲ ሄፕ ሃራሶ ሼርዒ ጊዴስ። ዳሮ ዴሬይ ኢዛ ካሊዴስ፤ ሃርጋንቻታካ ኡባ ፓሲዴስ። 16 ኢዚ አናኮኔ አሳስ ዮቶንታ ማላ ኢስታ አዛዚዴስ። 17-21 ሄሲካ ሃኒዳይ ናቤ ኢሳያሳን

* 12:7 ማቶ 9:13 * 12:11 ሉቃ 14:5

“ታ ዶሪዳይኔ
 ታ ኢዛን ኡፋዮቲዛ ታ ናይ ሃይሳኮ!
 ታ አያናፕ ታ
 ኢዛ ቦላ ዎላና፤
 ኢዚካ አማኖንታ ዴሬታስ ቱሙ ፐርዳ አዋጃና፤
 ማርሼቴና፤ ዎይኮ ዋሴና፤
 ኢዛስ ቃላይካ ካሬን ሲዮቴና፤
 ቱማ ፐርዳ ዎኖስ ጋላና ጋካናስ
 ዲንጩቲ ኡቲዳ ሾምቦቆካ ሜንሴና፤
 ጩዋቲዛ ሙቃዳካ ቶይሴና፤
 አይዛቤቲ ኢዛ ኡፋይሳን ናጋና”
 ጌቴቲ ዮቴቲዳ ቲንቢቴ ቃላይ ፖሌታና።

ዮሱሳኔ ቢዔሊዜቡላ
 (ማር 3:20-30፤ ሉቃ 11:14-23)

22 ሄሳፌ ጉዩ ዳይዳንሲ አይኪን ሄላናሲኔ ሃሳያናስ ዳንዳዮንታ ኢሲ አስ ዮሱሳኮ ኤኪ ዩዳ። ዮሱሲካ ኢዛ ፓሲን አዴዚ ሄላናሲኔ ሃሳያናስ ዳንዳዩዴስ። 23 አሳይ ወሪካ ማላሌቲዲ “ሃይሲ አዴዚ ዳዉቴ ናሻ?” ጊዴስ።

24 ጊዶ አቲን ፋርሳዌቲ ሄሳ ሲዩዳ ዎዴ “ሃይሲ አዴዚ ዳይዳንስ ኬሲዛይ ዳይዳንሳ ሃላቃ ቢዔሊዜቡላ ዎልቃን ሃላ ጊዳናስ ቤሴስ” ጊዳ። *

25 ዮሱሲካ ኢስታ ቆፋ ኤሪዲ “ባ ጊዶን ኢሶይ ኢሳፌ ሻኬቲዛ ካዎቴሲ ወሪካ ኩንዳና፤ ባ ጊዶን ሻኬቲዛ ካታማይ ዎይኮ ኬሳ አሲ ሚኔና። 26 ሃላዔይ ሃላዔ ኬሲዛ ጊዲኮ ሃላዔይ ባ ጊዶን ሻኬቲዴስ ጉሳ። ሄሳሶ ሃኒኮ ኢዛ ካዎቴሲ ዋኒ ሚናና ዳንዳዩዜ?

27 ታኒ ቢዔሊዜቡላ ዎልቃን ኬሲዛ ጊዲኮ ኢንቴ ናይቲ አዛ ዎልቃን ኬሳኔ? ሄሳ ጊሽ ኢንቴ ናይቲ ኢንቴ ቦላ ፐርዳና።

28 ጊዶ አቲን ታኒ ዳይዳንስ ኬሲዛይ ዎሳ አያናን ጊዲኮ ዎሳ ካዎቴሲ ኢንቴኮ ዩዴስ ጉሳ።

29 “ዎይኮ ኢሲ አስ ዎልቃራ ዲዛዴ ኬሴ ጌሊዲ ሚሼ ቦንቃና ኮይኮ ካሴቲዲ ሄ ዎልቃራ ዲዛ አዴዛ አይኪ ቃቾንታ ዎስቲ ቦንቃኔ? ቃቾዳፕ ጉዩ ቦንቃና ዳንዳዩስ።

30 “ታናራ ጊዶንታዴይ ታናራ ኤቁቴስ፤ ታናራ ኢሲፌ ሺሾንታ አሲ ወሪካ ላሌስ። * 31 ሄሳ ጊሽ ታ ኢንቴስ ቱሙ ጋይስ፤ ናጋራ አሶይኔ ጫሺ ወሪ አሳስ አቶ ጌቴታና ሺን ሂሎ አያና ጫዩዳይይ ማሬቴና። 32 አይ አሲካ አሳ ና ቦላ ሃሳዩዛ

* 12:24 9:34፤ 10:25 * 12:30 ማር 9:40

ኢታ ቃላ ጊሽ ማሬታና ሺን፣ ጊሎ አያና ቦላ ሃሳዬዛ ኢታ ቃላይ ጊዲኮ ሃይሳ ሃ ዎዴን ጊዲን ዎይኮ ቡሮ ያና ዎዴን ጊዲን ማሮይ ዴና። *

ሎዎ ሚሲ ሎዎ አይፌን ኤሬቴስ
(ሉቃ 6: 43-45)

³³ “ሚሲ ወሪ አይፌን ኤሬቴዛይሳ ማላ ኢንቴ ሎዎ አይፌ ዴማናስ ኢንቴስ ሎዎ ሚሲ ዶ፤ ኢንቴስ ኢታ ሚሲ ዲዛ ጊዲኮ ኢንቴ ኢታ አይፌ ኤካና። * ³⁴ ኢንቴና ማርኬራ ዲዛ ሾሻቶ! ኢንቴ ኢታታ ጊዲ ኡቴዲ ዎስቲ ሎዎ ሃሳያናስ ዳንዳዬቴ? ኡሎ ጊዶን ኩሚዳዚ ዱናራ ሃሳዬቴስ። *

³⁵ “ሎዎ አሲ ባ ዎዝናን ኩንሲ ዎሲዳ ሎዎ ቆፋፕ ሎዎ ሃሳዬስ፤ ኢታ አሲካ ባ ዎዝናን ኩንሲ ዎሲዳ ኢታቴሳፌ ኢታ ዮዎ ኬሴስ። ³⁶ ጊዶ አቲን ታ ኢንቴስ ጊዛይ አሳይ ባ ሃሳዬዳ ሃዳ ቃላ ኡባ ጊሽ ፐርዳ ጋላስ ወሪካ አይሼታና። ³⁷ ጋሶይካ ኔ ቃላፕ ዴንዲዳይሳን ኔ ጊላዳ አታና ኔ ቃላፕ ዴንዲዳይሳን ኔ ቦላ ፐርዴታና” ጊዴስ።

ማላታ ቤያናስ ሺቂዳ አይሾ
(ማር 8: 11-12፤ ሉቃ 11: 29-32)

³⁸ ሄሳፌ ጉዬ ኢሲ ኢሲ ሙሴ ዎጋ ታማርሲዛይቲኔ ፋርሳዌቲ ዩሱሳ “አስታማሬ! ኑ ኔፕ ማላሊሲዛ ማላታ ቤያናስ ኮዮስ” ጊዳ። *

³⁹ ኢዚ ኢስታስ ዛሪዲ “ሃ ኢታኔ ሳይማ ዩሌታይ ማላታ አይቼስ፤ ጊዶ አቲን ናቤ ዮናሳ ማላታፕ አቲን ሃራ ማላታይ ኢሜቴና። * ⁴⁰ ዮናሲ ጊታ ሞሌ ኡሎ ጊዶን ሄሹ ቃማኔ ሄሹ ጋላስ ጋምዲዳ ማላ አሳ ናይካ ሄሹ ጋላሲኔ ሄሹ ቃማ ቢታ ጋርሳን ጋምዳና። ⁴¹ ናናዌ አሳይ ፐርዳ ጋላስ ሃይሳ ሃ ዩሌታራ ዴንዲዲ ሃ ዩሌታ ቦላ ፐርዳና፤ ጋሶይካ ናናዌ አሳይ ዮናሳ ማርካቴሳን ማርቴስ ገሊዳ ጊሻሳ። ሄኮ ዮናሳፕ አዲዛዴይ ሃን ዴስ። ⁴² ዱጊሃ ዴሬ ካዎያ ሶሎሞኔ ኤራቴስ ሲያናስ ቢታ ጋዋፕ ዴንዳዳ ዩዳ ጊሽ ፐርዳ ጋላስ ኢዛ ሃይሳ ዩሌቴሳራ ዴንዳዳ ሃ ዩሌቴሳ ቦላ ፐርዳና። ሄኮ ሶሎሞኔፕ አዲዛዴይ ሃይሳን ዴስ።

⁴³ “ቴና አያናይ አሳፕ ኬዚዲ ሼምፖ ዴማናስ ሃሲ ባይንዳ ሜላ ቢታን ዳቡሬስ። ጊዶ አቲን ባ ኮዬዛ ሼምፖ ዴሜና። ⁴⁴ ሄሳፌ ቃሴ ካሴ ታ ዲዛሶ ሲማ ባና ጊዲ ቤኒሶ ኢዚ ሲሚሺን ካሴ ኢዚ ዲዛሶይ አይኮይኔ ባይንዳ ሜላ ኬሴ ጊዲዲ ጌዩዳይሳኔ ጊጌቲ

* 12:32 ሉቃ 12:10 * 12:33 ማቶ 7:20፤ ሉቃ 6:44 * 12:34 ማቶ 3:7፤ 23:33፤ 15:18፤ ሉቃ 3:7፤ 6:45 * 12:38 ማቶ 16:1፤ ማር 8:11፤ ሉቃ 11:16 * 12:39 ማቶ 16:4፤ ማር 8:12

ዲዛይሳ ዴሜስ።⁴⁵ ሄሳፌ ቢዲ ሃራ ባፔ ኢቲዛ ላፑን ኢታ አያናታ ባናራ ኤኪዲ ዩስ። ኢስቲካ ሄ አዴዛን ጌሊዲ ዴግና። ሄ አዴዛስ ካሴ ዱሳፌ ጉዩ ዱሳይ ኢታ ጊዳና። ሃይሳ ኢታ ዩሌቴሳስካ ሄሳ ማላ ሃናና” ጊዴስ።

ዩሱሳ አዩዮኔ ኢዛ ኢሻታ
(ማር 3:31-35፤ ሉቃ 8:19-21)

⁴⁶ ዩሱሲ አሳስ ዮቲሺን ኢዛ አዩዮኔ ኢሻቲ ኢዛ ዮቻና ኮይዲ ካሬን ኤቂዳ።⁴⁷ ኢሲ ኢሲ “ሄኮ ኔ አያኔ ኔ ኢሻቲ ኔና ሃሳዩሳናስ ካሬን ኤቂዲ ኔና ኮዩቴስ” ጊዴስ። *

⁴⁸ ዩሱሲካ “ታ አያ ኦኔ? ታ ኢሻቲቸ፣ ኢስቲ ኦናንቴ?” ጊዴስ።⁴⁹ ባ ኩሼራ ባና ካሊዛይታኮ ማላቲዲ “ታ አያኔ ታ ኢሻቲ ሃይታንታ።⁵⁰ ሳሎን ዲዛ ታ አዋ ሽኔ አሊዛይቲ ዉሪካ ታስ ኢሻ፣ ሚቾኔ አዮ” ጊዴስ።

13

ዜሬሳ ዜሪዛዴ ሌሚሶ
(ማር 4:1-9፤ ሉቃ 8:4-8)

¹ ሄ ጋላሲ ዩሱሲ ኬሳፌ ካሬ ኬዚዲ አባ ሳንቄን ኡቲዴስ።
² ዳሮ ዴሬይ ኢዛ ዩዩ አዲ ጊዶሲዳ ጊሽ አሳ አባ ጋፃን አጊዲ ዎሳሎ ጊዶ ጌሊ ኡቲዲ፣ *³ ዳሮ ዮዶ ሌሚሶራ “ኢሲ ጎሻንቻይ ዜሬሳ ዜሪናስ ኬዚዴስ።⁴ ኢዚ ዜሪሺን ኢሲ ኢሲ ዜሬሳ አጌ ዱናን ዎዲን ካፎቲ ዩዲ ማፂ ሚዳ።⁵ ኢሲ ኢሲ ዜሬሳ ሜላኔ ሹቻቲዛ ቢታ ቦላ ዎዲን ቢታይ ሜላ ቢታ ጊዲዳ ጊሽ ኤሌ ጫሪዴስ።⁶ ጊዶ አቲን አዋይ አዋቲን ሹሊዲኔ ፃጵ ዩዶንታ አጊዳ ጊሽ ሜሊዴስ።⁷ ኢሲ ኢሲ ዜሬሳይ አጉንሳ ጊዶን ዎዲዴስ፤ አጉንሳይካ ዲጪዲ ጫሬቻ ጩሊዴስ።⁸ ሃራ ዜሬሳካ ሎዶ አርዴ ቢታን ዎዲዲ አይፊካ አይፊዴስ፤ ኢሶይ ያቱ፣ ኢሶይ ኡሱፑን ታሙ ኢሶይ ሄሹ ታሙ አይፊ ኢሚዴስ።⁹ ሲዩዛ ሃይሲ ዲዛይይ ሲዮ!” ጊ ዮቲዴስ።

¹⁰ ሄሳፌ ኢዛ ካሊዛይቲ ኢዛኮ ሺቂዲ “አዛስ ሌሚሶራ ዮታይ?” ጊዳ።

¹¹ ኢዚካ ኢስታስ “ሳሎ ካዎቴሳ ፀራ ኤሮይ ኢንቴስ ኢሜቲዴስ፤ ኢስታስ ጊዲኮ ኢሜቲቤና።¹² ዲዛይስ ዲዛይሳ ቦላ ጉጂታናኔ ዳራና ሺን ባይንዳዴፌ ሂና ዲዛራካ ኤኬታይቻና።

* 12:47 ኢሲ ኢሲ ጊሻ ማፃፊታን ፓይዶ አይዱ ታማኔ ላፑና ቦላ ዲዛ ቃላይ ዴና።
* 13:2 ሉቃ 5:1-3

* 13 ታ ሃይሳሉ ሌሚሶራ ዮቴዛይ ኢስቲ ሲዩሼ ኤዝጎንታ ጊሺኔ ዌሊሼ ዴሞንታ ጊሻሳ።

14-15 “ኢሳያሲ
‘ኢንቴ ሲሳ ሲያናሺን ዩሺ ቆፔኬታ፤
ዌሎ ዌላና ሺን ምዝናን ምሴኬታ፤
ዴሬዛ ምዝናይ ሙሚዴስ፤
ኢስታ ሃይሳይካ ሲዮና፤
ዌሎንታ ማላ ባ አይፌ ቂልምዒዳ፤
ሄሲ ባይንዳኮ ኢስቲ ባ አይፌራ ቤዩዲኔ
ባ ሃይሳራ ሲይዲ
ባ ምዝናን ዩሺ ቆፐዲ
ታኮ ሃ ሲሚን
ታ ኢስታ ፓሳና ሺን’

ጊዳ ቲንቢቴ ቃላይ ኢስታን ፖሌቲዴስ። *

16 “ኢንቴ አይፌይ ዌሊዛ ጊሺኔ ኢንቴ ሃይሳቲ ሲዩዛ ጊሽ ኢንቴ አንጄቲዳይታ። 17 ታ ኢንቴስ ቱሙ ጋይስ፤ ዳሮ ናቤቲኔ ዳሮ ዌሎ አሳቲ ሃዒ ኢንቴ ቤዩዛይሳ ቤያናሲኔ ሃዒ ኢንቴ ሲዩዛይሳ ሲያናስ አሞቲዳ ሺን ኢስታስ ሃሂቤና።

18 “ሂስቲኮ ሃዒ ዜሬሳ ሌሚሶዛ ቢርሼስ ሲዩቴ። 19 ካዎቴሳ ቃላ ሲይዲ ዩሺ ቆፖንታ አይ አሳ ምዝናፔካ ሃላዌይ ዩዲ ዜሬቲዳ ዜሬሳ ኤሶን ማዊቻና። ሄሲካ አጌ ቦላ ምዲዳ ዜሬሳ። 20 ሹቻ ቦላ ዜሬቲዳይሲ ቃላ ሲዩዳ ማላ ኡፋይሳን ሲይዲ ሄራካ ኡፋይሳን ኤኪዛይ ሚሳቴስ። 21 ጊዶ አቲን ሃጳ ዩዳናስ ዳንዳዮንታ አጊዳ ጊሽ ዳሮ ጋምዮንታ ቃላ ጊዶን ሜቶይኔ ጎዴቴሲ ዩዛ ምዴ ኤሌሊ ዳጴቴስ። 22 አጉንሳ ጊዶን ዜሬቲዳ ዜሬሳይ ቃላ ሲይዲ ሃይሳ ሃ አላሜዛስ ዳሮ ሜቶቴሳኔ ዱሬቴሳ ቆፋን ባሌቲዲኔ ጩሌቲዲ አይፌ ኢሞንታ አሳ ማላ። 23 ሎዎ ቢታን ዜሬቲዳ ዜሬሳይ ቃሴ ቃላ ሲይዲ ዩሺ ቆፐዛዴ ሚሳቴስ፤ ቱሙ አይፌ አይፌስ፤ ኢሶይ ዌቴ፤ ኢሶይ ኡሱፑን ታሙ፤ ኢሶይ ሄሹ ታሙ አይፌ ኢሚዴስ” ጊዴስ።

ሌሾ ሌሚሶ

24 ዩሱሲ ቃሴካ ሃራ ሌሚሶ ኢስታስ “ሳሎ ካዎቴሲ ባ ጎሻ ጋዴን ሎዎ ዜሬስ ዜሪዳዴ ሚሳቴስ። 25 ጊዶ አቲን አሲ ዉሪ ኢቺዳ ምዴ ሞርኬይ ዩዲ ጊስቴዛ ጊዶን ሌሾ ዜሪዲ ቢዴስ። 26 ጊስቴዚ ዲጩዲ አይፌ አይፊዛ ምዴ ሌሾይካ ኢዛራ ኢሲፌ ቤቲዴስ።

* 13:12 ማቶ 25:29፤ ማር 4:25፤ ሉቃ 8:18፤ 19:26 * 13:14-15 ኢሳ 6:9-10

27 “ካላ ኅዳ አሸካራቲ ኅዳዛኮ ሺቂዲ ‘ኅደ! ነኒ ኔ ኅሻን ሎዖ ዜሬል ዜራቤኪ? ሃይሲ ሌሾይ አዋፔ ዩዴ?’ ጊዳ።

28 “ኢዚካ ኢስታስ ‘ሄሳ ሞርኬይ አሲዴስ’ ጊዴስ። አሸካራቲካ ‘ኑ ቢዲ ሌሾዛ ሾዳና ማላ ኮያይ?’ ጊ አይቺዳ።

29 “ኢዚካ ኢስታስ፡ ‘አካይ ሃኔና፤ ጋሶይካ ኢንቴ ሌሾዛ ሾዲሼ ጊስቴዛራ ጋሲ ሾዳና፤ 30 አጊቴ! ማፃ ዎዴይ ጋካናስ ኢሲፌ ዲጮ፤ ሄ ዎዴ ማፂዛይቲ ሌሾዛ ካሴቲዲ ቆሪ ማፂዲ ታማን ፀጋናስ ሚርቁን ሚርቁን ቃቺቴ፤ ጊስቴዛ ቃሴ ሺሺዲ ኅታራን ጌልሲቴ’ ጋዳ ታ ኢንቴስ ዮታና” ጊ ዮቲዴስ።

ሚሳ አይፌ ሌሚሶኔ ኢርሾ ሌሚሶ

(ማር 4:30-32፤ ሉቃ 13:18-19)

31 ሃራ ሌሚሶ ኢስታስ “ሳሎ ካዎቴሲ ኢሲ አሲ ባ ጋዴ ጊዶን ዜሪዳ ባርዛፌ ሚሳ አይፌ ማላ። 32 ባርዛፌ ሚሳ አይፌይ ሃራ ሚሳ አይፌ ኡባፌ ዳሮ ላፋ ጊዲኮካ ዲጫዳ ሚሳ ኡባፌ ጊታ ጊዳዉስ። ሳሎ ካፎቲካ ኢዚ ሃጋ ቦላ ኬዲዲ ዳና ጋካናስ ጊታ ሚሲ ጊዳዉስ” ጊዴስ።

33 ሃዲካ ሃራ ሌሚሶ ኢስታስ “ሳሎ ካዎቴሲ ማጫሲ ሊዪይ ዴንዳና ማላ ሊዪ ጊዶን ጉጂዳ ጉላ ኢርሾ ሚሳታዉስ” ጊዴስ።

34 ዩሱሲ ሃይሳ ኡባ አሳስ ሌሚሶራ ዮቲዴስ። ሌሚሶይ ባይንዳ ኢሲኖካ ዮቲቤና። 35 ሄሳንካ ካሴ ናቤ ዱናን

“ታ ዱና ታ ሌሚሶን ዶያና፤

አላሜይ ሜዴቶሳፔ ሃ ሲሚን

ቆቴቲዳይሳ ታ ሃሳያና”

ጌቴቲ ዮቴቲዳይስ ፖሌቲዴስ። *

ሌሾ ሌሚሶዛ ቢርሼል

36 ሄሳፌ ዩሱሲ አሳ አጊዲ ሶ ጌሊዴስ። ኢዛ ካሊዛይቲ ኢዛኮ ሺቂዲ “ካላ ጊዶን ዲዛ ሌሾዛ ጊሽ ኔ ዮቲዳ ሌሚሶዛ ቢርሼል ኑስ ዮታ” ጊዳ።

37 ኢዚካ ኢስታስ ዛሪዲ “ሎዖ ዜሬል ዜሪዳይ አሳ ና። 38 ኅሻይ ሃይሳ አላሜዛ፤ ሎዖ ዜሬሳይ ካዎቴሳ ናይታ ጊዲዳይሳ ቤሴስ፤ ሌሾይ ቃሴ ሃላዔ ናይታ። 39 ሌሾዛ ዜሪዲ ቢዳ ሞርኬይ ዳቡሎሳ። ማፃ ዎዴይ አላሜ ዉርሴሲ ጊዲሺን ማፂዛይቲ ያሳ ኪታንቻታ።

40 “ሌሾይ ቆራቲዲ ታማን ፀጌቲዛይሳ ማላ አላሜ ዉርሴሳን ሄሳላ ሃናና። 41 አሳ ናይ ባ ኪታንቻታ ኪታና፤ ኢስቲካ ናጋራስ ጋሶ ጊዲዳይታኔ ኢታ አሲዛይታ ኢዛ ካዎቴሳ ጊዶፌ ኡባ ቆሪ ኬሳና። 42 ዩሆይ ዲዛሶኔ አቸ ጋርጨዛሶን ዳሮ ዎልቃማ ታማን

* 13:35 ማዛ 78:2

ኢስታ ዩጋና። 43 ሄሳ ዎዴ ሂሎቲ ባ አዋ ካዎቴሳን አዋ አርሼ ማላ ፖግና። ሲዩዛ ሃይሲ ዲዛዴይ ሲዮ!

ቆታን ዲዛ ሃርኔ ኢንቆ ጌቴቲዛ ዎርቃ ሌሚሶ

44 “ሳሎ ካዎቴሲ ጋዴ ጊዶን ቆቴቲዳ ሚሼ ሚሳቴስ። ኢሲ አስ ሄ ሚሻዮ ዴሚዲ ዛሪ ቆቲዴስ። ኡፋይሳፌ ዴንዲዳይሳን ቢዲ ባስ ዲዛዚ ኡባ ባይዚዲ ሄ ሚሼያ ዲዛ ቢታ ሻሚዴስ።

45 “ሄሳሶካ ሳሎ ካዎቴሲ አልዎ ዎርቃ ኮዩዛ ዛልግንቻ ሚሳቴስ።

46 ዳር አልዎ ጊዳዳ ኢንቆ ጊዛ ሹቻ ዴሚዳ ማላ ቢዲ ባስ ዲዛዚ ኡባ ባይዚዲ ሻሚዴስ።

ሞሌ ጊቴ ሌሚሶ

47 “ቃሴካ ሳሎ ካዎቴሲ አባ ጊዶን ዩጌቲዲ ዱማ ዱማ ሞሌ አይኪዳ ሞሌ ጊቴ ሚሳቴስ። 48 ሞሌ አይኪዛይቲ ጊቴይ ኩሚን ጎቼዲ አባ ሳንቁ ኬሲዳ። ሄን ኡቲዲ ሎዎ ሎዎ ሞሌ ቆሪዲ ኬሼን ጉጁዳ። ኢታ ሞሌታ ዎራ ዩጊዳ። 49-50 አላሜ ዉርሴሳን ሄሳሶ ሃናና። ኪታንቻቲ ዩዲ ናጋራንቻታ ሂሎታፕ ሻኪዲ ዩኪዛሶኔ አሻ ጋርጨዛሶ ጌዴ ቶዎንታ ታማን ዩጋና።

51 “ዩሱሲ ኢስታ ሃይሲ ዉሪ ኢንቴስ ጌሲዴ?” ጊዴስ። ኢስቲካ “ኤ” ጊዳ።

52 ኢዚካ ዛሪዲ “ሄሳ ጊሽ ሳሎ ካዎቴሳ ፀራይ ጌሲዳ ሙሴ ዎጋ ታማርሲዛዴይ አኒካ ኢዛስ ሚንጂ ዎሲዳ አልዎ ሚሻፌ አራሳኔ ካሴ ጋልግ ሚሽ ኬሲዛዴ ሚሳቴስ” ጊዴስ።

ናቤይ ባ ዴሬን ቦንቼቴና

(ማር 6:1-6፤ ሉቃ 4:16-30)

53 ዩሱሲካ ሃይታ ሌሚሶታ ዮቲ ዉርሲዲ ሄፕ ሃራሶ ቢዴስ።

54 ጌዴ ባ ዴሬ ቢዲ አይሁዳታ ዎሳ ኬሳን አሳ ታማርሶ አይኪዴስ። ኢስቲካ ማላሌቲዲ “ሃይሲ አዴዚ ሃይሳ ኤራቴሳኔ ሃይታ ማላታታ አሳና ዎልቃ አዋፕ ዴሚዴ? 55 ሃይሲ አናዌዛ ና ዴኔ? ኢዛ አዩይ ሱንሲ ማራሞ ጊዴኔ? ኢዛ ኢሻቲ ያቆቤ፣ ዮሴፌ፣ ሲሞናኔ ዩሁዳ ጊዴቴኔ? 56 ሚቼቲ ኑናራ ዲዛይታ ጊዴቴኔ? ሂስቲን ሃይሲ አዴዚ ሃይሳ ኡባ አዋፕ ኤኪዴ?” ጊዳ።

57 ሄሳ ጊሽ ኢስቲ ኢዚ ጊዛይሳ ኤኪቤቴና።

ዩሱሲካ ኢስታስ “ናቤይ ባ ዴሬኒኔ ባ ኬሳን ቦንቼቴና አቲን ሃራሶን ቦንቼቴስ” ጊዴስ። 58 ኢስቲ አማኖንታ አጊዳ ጊሽ ዳር ማላታታ ሄን አሲቤና።

14

ገማቂዛ የሃኒሳ ሃይቆ
(ማር 6:14-29፤ ሉቃ 9:7-9)

1 ሄ ዎዴ ጋሊላ ዴሬ ሃሪዛ ሄርዶሲ አሳይ ዩሱሳ ናሺዛይሳ ሲይዴስ። 2 ሄርዶሲ ባ አሽካራታስ “ሄሳ ጊዲኮ፣ ገማቂዛ የሃኒሲ ሃይቆፕ ዴንዲዲ ዩዴስ ጉሳካ! ሃይሲ ወሪ ጊታ ማላታይ ኢዛ ኩሺን አሴቲዛይ ሄሳሳ” ጊዴስ።

3 ሄርዶሲ ባ ኢሻ ፒሊጶሳ ማቾ ሄርዲያዲ ጋሶን የሃኒሳ አይሲዲ ቃሾ ኬሳን ዩጊዴስ። * 4 ጋሶይካ የሃኒሲ ሄርዶሳ “ኔ ኢዞ ኤካና ማላ ዎጋ ጊዴና ጊዳ ጊሻሳ” ጊዴስ። 5 ሄርዶሲካ የሃኒሳ ዎዳናስ ኮዩሺን አሳይ የሃኒሳ ናቤ ማላ ዩሊዛ ጊሽ ባቢዴስ።

6-7 ሄርዶሲ ባ ዩሌቴሳ ጋላስ ሄርዲያዲ ናያ ዩሳን ኢዛ ኡፋይሲዳ ጊሽ ናያ ኢዛ አይቼዳዝ ኡባ ኢማናስ ኢዚስ ጫቂዴስ። 8 ናያካ አዩይ ዞሬን “ገማቂዛ የሃኒሳ ሁዔ ኬሬን ዎሳዳ ሃጊ ሃኒን ታስ ኢማ” ጋዱስ።

9 ሄ ዎዴ ካዎዚ ኢዛስ ሚሼቲዴስ። ጊዶ አቲን ጫቂዳ ጊሺኔ ኢዛራ ዲዛ ኢማሳታ ጊሽ ጊዲ ናይ አይሾይ ፖሌታና ማላ አዛዚዴስ። 10 ኪቲዲኔ የሃኒሳ ዎይኔ ኬሳን ዲሺን ቆዴ ቃንጻሲዴስ። 11 ቃንጻቲዳ ሁዔዛ ኬሬን ዎሲዲ ናይስ ኢሚዳ። ናያካ ኤካዳ ባ አዩይስ ኢማዱስ። 12 የሃኒሳ ካሊዛይቲ ኢዛ አሃ ኤኪዲ ሞጊዲኔ ሃኒዳይሳ ኡባ ዩሱሳስ ዮቲዳ።

ዩሱሲ ኢቻሹ ሺ አሳ ሚዚዴስ
(ማር 6:30-44፤ ሉቃ 9:10-17፤ ዮሃ 6:1-14)

13 ሄሳ ሲዩዳ ማላ ዩሱሲ ካሴ ባ ዲዛሶ አጊዲኔ ዎጎሎን ጌሊዲ ባርካ ሃራ አሲ ባይንዳሶ ቢዴስ። ዴሬይካ ሄሳ ሲይዲ ካታማይ ዲዛሶፕ ቶሆራ ኢዛ ካሊዴስ። 14 ዩሱሲካ ዎጎሎዛፕ ዎዲሼ ዳር አሳ ቤዩዲ አሳስ ሚሼቲዴስ። ሳኬቲዛይታካ ፓሲዴስ።

15 ጋዴይ ቃሚ ቃሚ ቢዛይሳ ቤዩዲ ኢዛ ካሊዛይቲ ኢዛኮ ሺቂዲ “ሃይሲ ኑ ዲዛሶይ ባዞ፤ ጋዴይካ ቃሚ ቃሚ ቢዛ ጊሽ ጌዴ ጉታታን ጉታታን ቢዲ ባሲ ማናዝ ሻማና ማላ አሳ ዩዳ” ጊዳ።

16 ጊዶ አቲን ዩሱሲካ ኢስታ “ኢንቴ አሳስ ማናዝ ኢሚቴ አቲን አሳይ ባናስ ኮሺና” ጊዴስ።

17 ኢስቲካ ኢዛስ ዛሪዲ “ሃይሳን ኑስ ኢቻሹ ኡኬሲኔ ናምዑ ሞሌፕ አቲን ሃራይ ባዎ” ጊዳ።

* 14:3 ሉቃ 3:19-20

18 ኢዚካ ኢስታ “አኔ ሄይታ ዲዛይታ ሃ ታስ ኤኪ ዩቴ” ጊደስ። 19 ቃሴካ አሳይ ማታ ቦላ ኡታና ማላ አዛዚደስ። ኢቻሹ ኡኬሳኔ ናምዑ ሞሌታ ባ ኩሼን አይኪዲ ባ አይፌ ፑዴ ሳሎ ጶቁ ሂስቲ ጋላቲዲ፣ ኡኬሳ ሜንሲ ባና ካሊዛይታስ ኢሚደስ። ኢስቲካ አሳስ ኢሚዳ።

20 አሳይ ዉሪካ ሚዲ ካሊደስ። ሄሳፌ ጉዩ ኢዛ ካሊዛይቲ አሳፔ ሚሺን አቲዳይሳ ታማኔ ናምዑ ሌማቴ ኩሜስ ሺሺዳ።

21 ሚዳ አሳይ ማጫሳቲኔ ጉሳ ናይቲ ጉጄቶንታ አቱማሳይ ዓላላ ኢቻሹ ሺ ጊዳና።

ዮሱሲ አባ ቦላ ሃሙቲደስ
(ማር 6:45-52፤ ዮሃ 6:15-21)

22 ሄሪካ ኢዛ ካሊዛይቲ ዎጎሎን ጌሊዲ ጌዴ ፒንስ ኢዛፔ ካሴቲዲ ፒናና ማላ አዛዚዲ አሳ ሞይዛናስ ባሲ ጉዩ አቲደስ።

23 ዴሬዛ ሞይዚዳፔ ጉዩ ዎሳ ዎሳናስ ባርካ ዙማ ቦላ ኬዚደስ። ጋዴይ ጶሚንካ ያን ዙማ ቦላ ባርካ ደስ። 24 ሄሳ ዎዴ ዎጎሎያ አባ ካንሳ ቢሺን ዳምባላይ ዴንዲዲ ዳሮ ሜቶሶ አይኪደስ።

25 ቃማፔ ኮይሮ ኩቶይ ባቂሺን ዮሱሲ አባ ቦላራ ሃሙቲዲ ኢዛ ካሊዛይቲ ዲዛሶ ዩደስ። 26 ዮሱሳ ካሊዛይቲካ ኢዚ አባ ቦላራ ሃሙቲ ዩሺን ቤዩ ባቢዳ ጊሽ ኢዛ ሞይቲሌ ጊዲኔ ሞሲዳ።

27 ዮሱሲ ሄሪካ “አይኮይ ባ! ታናኮ፤ ባቦፍቴ!” ጊደስ።

28 ጴጥሮሲ “ጎዶ! ኔና ጊዲኮ ታ አባ ቦላራ ሃሙታዳ ኔኮ ባና ማላ ታና አዛዛ” ጊደስ።

29 ዮሱሲ ኢዛ “ሃያ!” ጊደስ። ጴጥሮሲካ ዎጎሎዛፔ ዎዲዲ ሃሳ ቦላራ ሃሙቲዲ ዮሱሳኮ ዩደስ። 30 ጊዶ አቲን ጫርኮዛ ዎልቃ ቢዩዲ ባቢዳ ጊሽ ሃሳን ሚቴቴስ አይኪዲ “ጎዶ! ታና አሻ!” ጊ ሞሲደስ።

31 ዮሱሲ ሄሪካ ባ ኩሼ ዮዲ አይኪዲ “ኔኖ፣ አማኖይ ፓጩዳይሶ! አዛስ ሲዳዲ?” ጊደስ።

32 ዮሱሲኔ ጴጥሮሲ ዎጎሎዛን ጌሊዳ ማላ ጫርኮይ ሲርጵ ጊደስ። 33 ሄሳፌ ጉዩ ዎጎሎን ዲዛይቲ “ኔኔ ቱሙ ያሳ ና!” ጊዲ ኢዛስ ጎይኒዳ።

ዮሱሲ ጌንሴሬዌን ሃርጋንቻታ ፓሲደስ

34 ዮሱሲኔ ኢዛ ካሊዛይቲ አባ ፒኒዲ ጌንሴሬዌ ጌቴቲዛሶ ጋኪዳ። 35 ሄን ዲዛይቲ ዮሱሳ ጊዲዳይሳ ኤሪዲ፣ ሄ ሄራን ዩዩ አዳናስ ዲዛ አሳስ ኪታ ዮዲዳ። አሳይካ ሃርጋንቻታ ኡባ ዮሱሳኮ ኤሂደስ። 36 ሃርጋንቻቲ ኢዛ አፋላ ዌራ ዓላላ ቦቻና ማላ ዮሱሳ ሞሲዳ። ቦቺዳይቲ ዉሪካ ፓዒዳ።

15

1 ቃሴካ ዩሩሳላሜፔ ዩዳ ፋርሳዌቲኔ ሙሴ ዎጋ ታማርሲዛይቲ ዩሱሳኮ ሺቂዲ 2 “ኔና ካሊዛይቲ ካሴ ኑ አዋታ ዎጋ አዛሰ ዳይሲዞ? ቁማ ማናስ ኩሼ ሜጩቴቴና” ጊዳ።

3 ዩሱሲካ ኢስታስ “ኢንቴ ኢንቴ ዎጋስ ጊዲ ያሳ አዛዞ አይስ ሻሬቲ? 4 ያሲ ‘ኔ አዩዮኔ ኔ አዋ ቦንቻ፤ ባ አዋ ቦላ ዎይኮ ባ አዩ ቦላ ኢታ ቃላ ሃሳዩዳዴይ ሃይቆ! ጊ አዛዘዴስ። 5 ኢንቴ ጊዲኮ አይ አሲካ ባ አዋ ዎይኮ ባ አዩ ‘ታ ኢንቴስ አሳናስ ቤሲዛዝ አይ ሚሼካ ያሳስ ያርሾ አሳ ሺሻዲስ’ ጊኮ፤ 6 ‘ሄ አዴዚ ባ አዋ ዎይኮ ባ አዩ ቦንቻዴስ’ ጌታ፤ ሄሳ ጊሽ ኢንቴ ዎጋ ጊሽ ያሳ ቃላ ሻሬታ። 7-9 ኢንቴኖ፤ ቆዴፔ ቆሞን ሃኒዛይቶ! ኢሳያሲ ኢንቴ ጊሽ ዮቲሼ

‘ሃይሲ ዴሬይ

ታና ዱናን ሃላላ ቦንቻስ፤

ዎዝናይ ጊዲኮ ታፔ ሃኪዴስ፤

ሜላ ሃዳ ታና ጎይኔስ፤

ኢስታ ቲሚርቴይካ አሲ ዎሲዳ ዎጋ’

ጊዲዲ ሲንሳፌ ሃናናይሳ ዮቲዳይሲ ቱማኮ” ጊዴስ።

10 ዩሱሲ አሳ ባኮ ዪይጊዲ “ሲዩቴ ዎዝናን ዎሲቴ። 11 አስ ቱኒሲዛይ ኢዛዴ ዱናራ ሃ ኬዚዛይሳፌ አቲን ዱናራ ዱጌ ጌሊዛይ ቱኒሴና” ጊዴስ።

12 ቃሴ ኢዛ ካሊዛይቲ ኢዛኮ ሺቂዲ “ፋርሳዌቲ ኔ ጊዳይሳ ሲይዲ ሃንቄቲዳይሳ ኤራዲ?” ጊዳ።

13 ኢዚ ኢስታስ “ታ አዋ ሳሎይሲ ቶኮንታ ሚሲ ወሪካ ጅቃሌታና። 14 ኢስታ አጋጊቴ ኢስቲ ቆቄቲ ካሌሲዛ ቆቄታ ጊዲዳ ጊሽ፤ ቆቄቲ ቆቄ ካሌሲኮ ናምዓይ ኢሶይ ኢሳራ አይኬቲዲ አፎን ወላና” ጊዴስ። *

15 ጳጳርሲ ዩሱሳ “ኔ ዮቲዳ ሌሚሶዛ ኑስ ቢርሻ” ጊዴስ።

16 ኢዚካ “ኢንቴ ሃዲ ጋካናስካ ኤሪቤኬታ ጉሴ? 17 ዱናራ ጌሊዛይ ወሪ ዱጌ ቃንሴ ካንሲዲ ጌዴ ካሬ ኬዚዛይሳ ኤሬኬቲ? *

18 ዱናራ ኬዚዛይ ጊዲኮ ዎዝናፔ ፑልቴስ። አስ ቱኒሲዛይ ሄሳ። *

19 ኢታ ቆፋይ፤ ሼምፖ ዎጅይ፤ ላይማይ፤ ላይማታናስ ቃቃቶይ፤ ካይሶይ፤ ዎርዶ ማርካቴሲኔ አሳ ሱንስ ሞሮይ ወሪ ዎዝናፔ ፑልቴስ። 20 አስ ቱኒሲዛይ ሃይታንታፌ አቲን ኩሼ ሜጩቶንታ ሙሲ አስ ቱኒሴና” ጊዴስ።

* 15:14 ሉቃ 6:39 * 15:18 ማቶ 12:34

ካናኔ ዴሬ ማጫሳይ አማኖ

(ማር 7: 24-30)

21 ዮሱሲ ሄፔ ኬዚዲ ጌዴ ሂሮሴኔ ሲዶና ጌቴተዛ ዴሬ ቢዴስ።
22 ኢሲ ካናኔ ማጫሲ ዲዛራ ሄ ሄራፔ ኬዛዳ ዮሱሳኮ ያዳ “ጎዶ፥ ዳዉቴ ናዉ! ታስ ሚሼታ! ታ ናያ ቴና ኣያናይ ኣይኪን ኬሃ ዋያዉስ” ጋዳ ዋሳዱስ።

23 ጊዶ ኣቲን ኢዚ ኢሲ ቃላካ ኢዚስ ዛሪቤና። ሂስቲን ሄ ዎዴ ኢዛ ካሊዛይቲ ኢዛኮ ሺቂዲ “ኑና ካላ ካላ ዋይሲዛ ጊሽ ኔ ኢዞ ሞይዚኮቺ?” ጊዲ ኢዛ ኣይቺዳ።

24 ኢዚካ ኢስታስ “ታኒ ኢስራዔል ኬሳፌ ዳዩዳ ዶርሳታኮ ሃላላ ኪቴታዲስ” ጊዴስ።

25 ማጫሳያካ ዮሱሳ ቶሆ ቦላ ኩንዳዳ “ጎዶ! ታና ማዳርኪ!” ጋዱስ።

26 ኢዚካ ኢዚስ ዛሪዲ “ናይታ ካስ ኤኪዲ ካና ቡቴላታስ ዮጋናስ ቤሴና” ጊዴስ።

27 ኢዛካ “ኤ ጎዶ፤ ቡታላቲካ ባ ጎዳ ማዳፔ ጋዴን ዎዲዳ ካስ ማሂ ሜቴስ” ጋዱስ።

28 ሂዝጊን ዮሱሲካ ማጫሳዮ “ሃኔ ማጫሳዮ፥ ኔ አማኖይ ጊታ! ኔ ኮይዳ ማላ ኔስ ሃኖ” ጊዴስ። ማጫሳይ ናያካ ሄራካ ፓፃዱስ።

29 ዮሱሲ ሄፔ ዴንዲዲ ጋሊላ ኣባ ላንቄ ቢዲ ሄን ዲዛ ኢሲ ዙማ ቦላ ኬዚ ኡቴዴስ። 30 ቆዳን ዳር ዴሬይ ዎቤታ፥ ቆቄታ፥ ሲላታ፥ ሃሳዮንታ ዱዴታ ሃራታካ ዳር ሃርጋንቻታ ኤሂዲ ኢዛ ሲንሳን ዎሲዴስ፤ ኢዚካ ኢስታ ፓሲዴስ። 31 ዱዴይ ሃሳዩሺን፥ ቶሆ ሲላይ ፓሂሺን፥ ዎቤይ ሲቲ ጊዲ ሃሙቴሺን፥ ቆቄይ ሄሊሺን ቤዩዲ ኣሳይ ማላሌቲዴስ፤ ኢስራዔል ጎዳካ ጋላቲዴስ።

ዮሱሲ ኣይዱ ሺ ኣሳ ሚዚዴስ

(ማር 8: 1-10)

32 ዮሱሲ ባና ካሊዛይታ ሄይጊዲ “ኣሳይ ታናራ ሄቩ ጋላስ ጋምዲዳ ጊሺኔ ማና ካሲ ባይንዳ ጊሽ ኣሳይ ታና ሚቼስ። ኣጌ ቦላን ጋፋን ዳቡራዲ ኩንዶንታ ማላ ሚላ ኡሎራ ዮዳናስ ኮዩኬ” ጊዴስ።

33 ኢዛ ካሊዛይቲ “ሃይሳን ኣይኮይካ ባይንዳ ባዞ ቢታን ሃይሳ ኬና ዴሬ ሚዛናስ ጊዲዛ ቁማ ኑ ኣዋፔ ዴማኔ?” ጊዳ።

34 ዮሱሲ ኢስታ “ኢንቴስ ኣፑን ኡኬሲ ዲዜ?” ጊ ኣይቺን ኢስቲካ “ላፑን ኡኬሲኔ ቂ ጉሳ ሞሌቲ ዴቴስ” ጊዳ።

35 ኢዚካ ዴሬዚ ጋዴን ኡታና ማላ ኣዛዚዴስ። 36 ላፑን ኡኬሳኔ ሞሌዛ ባ ኩሺን ኣይኪዲ ጋላቲዳፔ ጉዩ ሜንሲዲ ባና ካሊዛይታስ ኢሚዴስ፤ ኢስቲካ ዴራስ ጊሺዳ። 37 ኣሳይ ዉሪካ

ሚዲ ካሊዴስ፤ ዮሱሳ ካሊዛይቲ አሳፔ አቲዳይሳ ላፑን ሌማቴ ኩሜል ሺሺዳ። ³⁸ ሚዳይቲካ ናይቲኔ ማጫሳይ ባይንዳ አዴቲ ፃላላ አይዱ ሺ ጊዲዳ።

³⁹ ዮሱሲ ዴሬዛ ሞይዚዳፔ ጉዬ ዎጎሎን ጌሊዲ ሜጊዶኔ ጌቴቲዛሶ ቢዴስ።

16

¹ ፋርሳዌቲኔ ሳዱቃዌ ጌቴቲዛይቲ ዮሱሳኮ ሺቂዲ ኢዛ ፓጫናስ “ሳሎፔ ማላታ ቤሳ” ጊዲ አይቺዳ። * ² ኢዚካ ኢስታስ “አማርሳ ዎዴ ሳሎይ ዞዲኮ ‘ጋዴይ አዋታና’ ጌታ። ³ ዎንታ ቦላ ‘ሳሎይ ዴባኮ ዴባዴስ፤ ሃቺ ኢራይ ቡካና’ ጌታ፤ ሳሎ ሜዳ ዌሊዲ ሻኪ ኤሬታ ሺን ታ ያና ዎዴ ማላታ ሻኪ ኤራናስ ዳንዳዩኬታ። * ⁴ ሃይሲ ኢታኔ ሳይማ ዮሌታይ ማላታ ኮዮስ፤ ጊዶ አቲን ዮናሳ ማላታፔ አቲን ሃራ ማላታይ ኢዛስ ኢሜቴና” ጊዴስ። ዮሱሲ ኢስታ ሄን አጋጊዲ ሃራሶ ቢዴስ። *

⁵ አባ ፒኒዳ ማላ ዮሱሳ ካሊዛይቲ ቁማ አይካናይሳ ባሌቲዳ።

⁶ ዮሱሲካ “ቆፒቴ፤ ፋርሳዌታ ኢርሾሬኔ ሳዱቃዌታ ኢርሾሬ ናጌቴቴ” ጊዴስ። *

⁷ ኢስቲ ቃሴ ባ ጊዶን “ኑኒ ካል አይኮንታ ጊሽ ሄሳ ጊዴስ” ጊዲ ኢሶይ ኢሳራ ሃሳዮቲዳ

⁸ ዮሱሲካ ኢስታ ቆፋ ኤሪዲ “ኢንቴና አማኖይ ፓጪዳይቶ! ካል አይኮንታ ጊሽ አዛስ ኢሶይ ኢሳራ ሃሳዮቲቲ? ⁹ ኢቻሹ ኡኬሲ ኢቻሹ ሺ አሳስ ጊዲዲ አፑን ሌማቴይ ቲርፒን ኢንቴ ዴንሲዳኮኔ ዩሺ ቆፕኬቲ? * ¹⁰ ሄሳሶካ ላፑን ኡኬሲ አይዱ ሺ አሳስ ጊዲዲ አፑን ሌማቴይ ቲርፒን ኢንቴ ዴንሲዳኮኔ ዎዝናን ዎሲቤኬታ ጉሴ? * ¹¹ ሂስቲን ታ ኢንቴስ ዮቲዳይ ካሳ ጊሽ ጊዶንታይሳ ዋንዲ ዩሺ ቆፕኬቲ? ሃዲካ ፋርሳዌታ ኢርሾሬኔ ሳዱቃዌታ ኢርሾሬ ናጌቴቴ” ጊዴስ።

¹² ሃዲ ኢዚ ኢስታ ቆፊሲዛይ ቡኬሶ ዴንሳናስ ጉጂዛ ኢርሾ ጊሽ ጊዶንታ ፋርሳዌታኔ ሳዱቃዌታ ቲሚርቴሬ ናጌታና ማላ ጊዲዳይሲ ኢስታስ ጌሊዴስ።

ጳፅሮሲ ዮሱሲ ዎሳ ና ጊዶይሳ ዮቲዴስ

* 16:1 ሉቃ 11:38 * 16:3 ኢሲ ኢሲ ጌሻ ማገፊታን ፓይዶ ናምዓኔ ሄሻ ቦላ ዮሱሲ ሃሳዩዳ ሌሚሶዛ ጎዔቴቴና። * 16:4 ማቶ 12:39፤ ሉቃ 11:29 * 16:6 ሉቃ 12:1 * 16:9 ማቶ 14:17-21 * 16:10 ማቶ 15:34-38

13 ዮሱሴ ቂሳሪያ ፒሊጲሲዮሴ ጌቴቲዛ ቢታ ጋኪዳ ዎዴ ባና ካሊዛይታ “አሳይ ታና አሳ ና አና ጊዜ?” ጊዲ አይቺዴስ።

14 ኢስቲካ “ኢሲ ኢሲ አሳይ ‘ግማቂዛ ዮሃንሳ’ ጌስ፤ ባጋ አሳይ ‘ኤላሳ’ ጌስ፤ ባጋይ ‘ኤርማሳ ዎይኮ ናቤታፔ ኢሳዴ ጊዶንታ አጌና’ ጌስ” ጊዳ። *

15 ኢዚካ ኢስታ “ኢንቴ ታና አና ጌቲ?” ጊዴስ።

16 ሲሞና ጌቴቲዛ ጴፀሮሲ “ኔኒ ኪርስቶሳ ዴዎ ያሳ ና ጊዲኪ?” ጊዲ ዛሪዴስ። *

17 ዮሱሴ “ዮና ና ሲሞና ኔኒ አንጄቲዳዴ! ኔስ ሃይሳ ቆንጨሲዳይ ሳሎን ዲዛ ታ አዋፔ አቲን አሾኔ ሱሴ ጊዴና።

18 ኔኒ ዛላ፤ ሃይሳ ዛላ ቦላ ታኒ ታ ዎሳ ኬሴ ኬዓና፤ ጋናሜ ፔንጌቲካ ኢዞ ዎኔቴና። 19 ሳሎ ካዎቴሳ ቁልፔታ ታ ኔስ ኢማና፤ ኔኒ ቢታ ቦላ ሃና ጊዛይ ዉሪ ሳሎኒካ ሃናና። ቢታ ቦላ ኔ ሃናፖ ጊዳይሲ ዉሪካ ሳሎኒካ ሃኔና” ጊዴስ። *

20 ቃሴካ ኢዚ ኪርስቶሳ ጊዲዳይሳ ኢስቲ አናስካ ዮቶንታ ማላ ባና ካሊዛይታስ ሎዔሲ ዮቲዴስ። †

ዮሱሴ ባ ቦላ ጋካና ሜቶ ጊሽ ናምዓንጾካ ዮቲዴስ

21 ሄሳፌ ሃ ሲሚን ዮሱሴ ዮሩሳላሜ ባናይሳ፣ ሄን ዴሬ ጨማታን፣ ቁሴታ ሃላቃታኒኔ ሙሴ ዎጋ ታማርሲዛይታ ኩሼን ዋዬ ኤካናይሳ፣ ሃይቃናይሳኔ ሄቫንጾ ጋላስ ሃይቆፔ ዴንዳናይሳ ባና ካሊዛይታስ ቆንጨሲዲ ዮቲዴስ።

22 ጴፀሮሲ ዮሱሳ ጊዴ ኢሲ ባጋ ዛሪዲ “ንዶ! ሃይሲ ኔ ቦላ ጋኮፎ!” ጊዲ ሃንቂዴስ።

23 ዮሱሴ ጴፀሮሳኮ ሺቂዲ “ሃይሶ ዓላዔ! ሃይሳፌ ኪቻ! ኔኒ አሳዛፔ አቲን ያሳ ዮዎይ ኔ ዎዝና ጊዶን ባይንዳ ጊሽ ኔ ታስ ጴጴ ጊዳዳሳ” ጊዴስ።

24 ቃሴካ ዮሱሴ ባና ካሊዛይታስ “ታና ካላናስ ዶሲዛ አሲ ባና ካዶ፤ ባ ማስቃሌ ቶኪዲ ታና ካሎ። ‡ 25 ባ ሼምፖ አሻና ኮዩዛ አሲ ዉሪ ዳይሳና፤ ጊዶ አቲን ባ ሼምፖ ታ ጊሽ ዳይሲዛዴይ አሻና። * 26 አሲ አላሜን ዲዛዝ ኩሜስ ሃሪድ ባ ሼምፖ ዳይሲኮ ኢዛ አይ ማዳኔ? ዎይኮ አሲ ባ ሼምፖ ጊሽ ቃንዓና ዳንዳዩዘዚ አዜ? 27 አሳ ናይ ባ አዋ ቦንቾራኔ ሳሎ ኪታንቻታራ ያና፤ ኢሳስ

* 16:14 ማር 6:14-15፤ ሉቃ 9:7-8 * 16:16 ዮሃ 6:68-69 * 16:19 ማቶ 18:18፤ ዮሃ 20:23 † 16:20 ኪርስቶሳ ጉሲ ያሳፌ ቲዮቲዳዴ ጉሳ። ‡ 16:24 ማስቃሌ ጉሲ ሜቶ ጉሳ። * 16:25 ማቶ 10:39፤ ሉቃ 17:33፤ ዮሃ 12:25

ኢሳስ ኢዛ አሶ ማላ ኢዛዴ ዋጋ ኢማና። * 28 ታ ኢንቴስ ቱሙ-
ጋይስ፤ ሃይሳን ኤቂዳ አሳታ ጊዶፌ አሳ ናይ ባ ካዎቴሳራ ዩሺን
ቤያና ጋካናስ ሃይቆይ ኢስታ ቦቾንታ አሳቲ ዴቴስ” ጊዴስ።

17

ዮሱሳ ሜዳይ ላሜቲዴስ (ማር 9:2-13፤ ሉቃ 9:28-36)

1 ኡሱፑን ጋላሳፌ ጉዩ ዮሱሲ ጳፅሮሳኔ ያቆቤ ቃሴካ ያቆቤ
ኢሻ ዮሃንሳ ባናራ ኤኪዲ ኢስታራ ሃላላ ኢሲ ዶቃ ዙማ ቦላ
ኪዚዴስ። * 2 ኢስቲ ሄን ዲሺን ዮሱሳ ሜዳይ ላሜቲዴስ፤ ኢዛ
አይፌሶይ አዋ አርሼ ማላ ፖዲዴስ፤ ኢዛ ማይዎይካ ፖፖ ማላ
ዎልቂዴስ። 3 ሄራካ ሙሴይኔ ኤላሲ ዮሱሳራ ሃሳዩሼ ኢስታስ
ቤቲዴስ። 4 ጳፅሮሲ ዮሱሳ “ጎዶ! ኑ ሃንን ዲዛኮ ኑስ ሎዎኮ! ኔ
ሼኔ ጊዲኮ ኢሲ ዳሴ ኔስ፤ ኢሲ ዳሴ ሙሴስ፤ ኢሲ ዳሴ ኤላሳስ
ሄሹ ዳሴ አሶ?” ጊዴስ።

5 ኢዚ ቡሮ ሃሳዎን ዲሺን ፖዲዛ ሻራይ ኢስታ ካሚዴስ፤
ሻራ ጋሳራ “ታኒ ኢዛን ኡፋዮቲዛ ታ ዶሲዛ ታ ናይ ሃይሳ፤ ኢዚ
ጊዛዝ ሲዩቴ” ጊዛ ቃላ ጊሪስ ሲዩቲዴስ። *

6 ኢዛ ካሊዛይቲካ ሄሳ ሲዩዳ ዎዴ ዳጋሚዲ ቢታ ቦላ ጉፋኒዳ።
7 ዮሱሲ ኢስታኮ ሺቂ ኢስታ ባ ኩሼን ቦቺዲ “ዴንዲቴ፤
ባቦፍቴ!” ጊዴስ። 8 ኢስቲ ዶቂ ጊ ዔሊሺን ዮሱሳፕ ኣቲን ኢዛራ
ሃራ አስ ኦናካ ቤዒቤቴና።

9 ኢስቲ ዙማ ቦላፌ ዎዲሺን ዮሱሲ “አሳ ናይ ሃይቆፕ ዴንዳና
ጋካናስ ኢንቴ ቤዮይሳ ኦናስካ ዮቶንታ ማላ” ጊ አዛዚዴስ።

10 ዮሱሳ ካሊዛይቲ “ሂስቲን ሙሴ ዎጋ ታማርሲዛይቲ፤ ኤላሲ
ካሴቲዲ ያና ቤሴስ አዛስ ጊዞ?” ጊዲ አይቺዳ። *

11 ኢዚካ ኢስታስ “ቱማኮ፤ ኤላሲ ዩዲ ዉርሲካ ጊጊሳና ጊዲ
ዛሪዴስ። 12 ታ ኢንቴስ ጊዛይ ኤላሲ ዩዴስ፤ ጊዶ አቲን አሳይ
ባ ኮይዳ ማላ ኢዛ ቦላ ኦሲዴስ አቲን ኢዛ ኤርቤና፤ ሄሳሳካ አሳ
ናይ ኢስታ ኩሼን ዋዩ ቤያና” ጊዴስ። *

13 ሄ ዎዴ ዮሱሳ ካሊዛይቲ ዮሱሲ ኢስታስ ዮቲዛይስ ሃማቂዛ
ዮሃንሳ ጊሽ ጊዲዳይሳ ኤሪዳ።

* 16:27 ማቶ 25:31፤ ማዛ 62:12፤ ኦሮ 2:6 * 17:1 2ጴፅ 1:17-18 * 17:5
ሜዴ 22:2፤ ዛሬ 18:5፤ ማቶ 3:17፤ 12:8፤ ኢሳ 2:7፤ ማር 1:11፤ ሉቃ 3:22
* 17:10 ሚክ 4:5 * 17:12 ማቶ 11:14

ዳይዳንሴ አይኪዳ ኢሲ ና ዩሱሲ ፓሲዴስ

(ግር 9:14-29፤ ሉቃ 9:37-43)

14-15 ዩሱሲኔ ኢዛ ካሊዛይቲ አሳኮ ሲሚዳ ማላ ኢሲ አሲ ዩሱሳኮ ሺቂዲ ኢዛ ሲንሳን ጉልባቲዲ “ጎዶ! ታ ና ዳይሳ ቦላፌ ዩጊዛ ሃርጊይ ዳሮ ዋይሲዛ ጊሽ ታስ ማራሪኪ! ዳሮ ዎዴ ታማን ኩንዴስ፤ ሃሳንካ ጌሎስ። 16 ታኒ ናዛ ኔና ካሊዛይታኮ ኤሃዲስ ሺን ኢስቲ ኢዛ ፓሳና ዳንዳዩቤቴና” ጊዴስ።

17 ዩሱሲ “ኔኖ አማኖንታ ጌላ ዩሌታዞ! አይዴ ጋካናስ ታ ኢንቴናራ ዳኔ? ቃሴ አይዴ ጋካናስ ታ ኢንቴና ዳንዳያኔ? አኔ ናዛ ሃ ታኮ ኤሂቴ” ጊዴስ። 18 ሄሳፌ ጉዩ ዩሱሲ ዳይዳንሳ ሴራዲ ናዛፕ ኬሲዴስ፤ ናዚካ ሄ ሳቴፕ ሲሚዲ ፓፓዴስ።

19 ዩሱሳ ካሊዛይቲ ገላላ ኢዛኮ ሺቂዲ “ኑኒ ዳይዳንሳ ኬሳናስ አዛስ ዳንዳዩቤይኮኒ?” ጊዲ አይቺዳ።

20 ኢዚካ ኢስታስ “ኢንቴስ አማኖይ ፓጩ ጊዲዳ ጊሽ ዳንዳዩቤኬታ፤ ታ ኢንቴስ ቱሙ ጋይስ፤ ቁሪ ጋሼ አይፌ ማላ አማኖይ ኢንቴ ቦላ ዲዛኮ ሃይሳ ዙማ ‘ሃይሳፌ ዴንዳዳ ጌዴ ባ!’ ኢንቴ ጊዳኮ ኢዚ ኢንቴስ ባና። ኢንቴና ያናናይ ዴና። * 21 ሃይሳ ማላይ ጊዲኮ ያማኒኔ ዎሳን አቲን ሃራን ኬዜና” ጊዴስ። *

22 ኢስቲ ጋሊላን ኢሲፌ ዲሺን ዩሱሲ ኢስታ “ታና አሳ ና አሳስ አሲ አማና። 23 ኢስቲካ ኢዛ ዎዳና፤ ኢዚካ ሄቫንሶ ጋላስ ዴንዳና” ጊን ኢዛ ካሊዛይቲ ኬሂ ሚሹቲዳ።

ያሳ ኬሳ ጊራ ቃንያ

24 ዩሱሲኔ ኢዛ ካሊዛይቲ ቁፊርናሆሜ ጌቱቲዛሶ ጋኪዳፕ ጉዩ ያሳ ኬሳ ጊራ ኤኪዛይቲ ጳፊሮሳኮ ሺቂዲ “ኢንቴ አስታማሬይ ያሳ ኬሳ ጊራ ናምዑ ዲናሬዛ አይስ ቃንጻኔ?” ጊዳ። *†

25 ኢዚካ ኢስታስ “ቃንጻስ” ጊዴስ። ጳፊሮሲ ሶ ጌሊዳ ማላ ዩሱሲ ካሴቲዲ “ሲዋና ዴሬ ካዎቲ ጊራ ጊዲን ዎይኮ ቃራግ ጊዲን ባ ናይታፕ ኤኪዞ? ሃራታፕ ኤኪዛ ሚሳቲዜ?” ጊዴስ።

26 ጳፊሮሲካ “ሃራታፕ ኤኬቴስ” ጊዴስ። ዩሱሲ “ሂስቲኮ ናይታ ቦላ አጮይ ባ ጉሳካ! 27 ሂስቲኮካ ኢስታ ኑ ዲጳሶንታ ማላ ኔ ሞሌ አይኪዛ ጊቴ ኤካ ባዳ አባን ዩጋ፤ ኮይሮ አይኪዳ ሞሌዛ ዱና ኔ ፖቃዳ ዴሚዛ ሚሻ ኤካዳ ታ ሱንሳራኔ ኔ ሱንሳራ ጊራ ቃንጻ” ጊዴስ።

* 17:20 ግጥ 21:21፤ ግር 11:23፤ 1ቆሮ 13:2 * 17:21 ኢሲ ኢሲ ጌኤቫ ማጻፋታን ፓይዶ ናምዑ ታማኔ ኢሲን ቦላ ዲዛ ቆፋይ ጉጂቲቤና፤ ቃላይካ ግር 9:29 ዲዛይሳ ማላ። * 17:24 ኬሳ 30:13-15፤ 38:26 † 17:24 ኢሲ ዲናሬይ ሄ ዎዴ ኢሲ አሳስ ናምዑ ጋላሳ ዳሞዛ ላጌ።

18

ሳሎ ካዎቴሳን ሉባፌ አዳናይ አኔ?
(ማር 9:33-37፤ ሉቃ 9:46-48)

1 ሄ ዎዴ ዮሱሳ ካሊዛይቲ ኢዛኮ ሺቀዲ “ሳሎ ካዎቴሳን ኑ ጋራሳን ሉባፌ አዳናይ አኔ?” ጊ አይቺዳ። * 2-3 ዮሱሲ ኢሲ ና ያይጊ ኤሂዲ ኢስታ ጊዶን ኤሲዲ “ታ ኢንቴስ ቱሙ ጋይስ፤ ኢንቴ ሲሞንታ ኢዲኮኔ ጉሳ ናይታ ማላ ሃናንታ ኢዲኮ ሙሌካ ሳሎ ካዎቴሳ ጌሌኬታ። * 4 ሄሳ ጊሽ ሃ ናዛ ማላ ባና ዚቀሲዛዴይ ሳሎ ካዎቴሳን ሉባፌ አዳና። 5 ሃይሳ ማላ ጉሳ ና ታ ሱንሳን ኤኪዛዴይ ታና ኤኬስ። *

6 “ጊዶ አቲን ታና አማኒዛ ጉሳታፔ ኢሳዴ ዱጴሲዛይ ዴዎ ዎፃ ሹቾ ባ ቆዴን ቃሼቲዲ አባ ጨማን ዮጌቲዲ ሚቴቲኮ ኢዛስ ሎዎ ጊዳና” ጊዴስ። 7 ሃና አላሜያ አሲ ዱጴና ጋሶ ጊዲዳ ጊሽ ኢዚስ አዩ-አና! ዱጴይ ዩስ አጌና ሺን ዱጴዛስ ጋሶ ጊዲዛዴስ አዩ-አና!

8 ኔ ኩሼይ ዎይኮ ኔ ቶሆይ ኔና ዱጴናስ ጋሶ ጊዲኮ ኔፔ ቃንፃ ዲጋ! ኔ ናምዑ ኩሼራ ዎይኮ ናምዑ ቶሆራ ጌዴ ሜርና ታማን ዮጌታናፔ ዎቤ ዎይኮ ቶሆ ሲላ ጊዳዳ ሄ ጌዴ ዴዎይ ዲዛሶ ጌሎይ ኔስ ሎፃና። 9 ሄሳሶካ ኔ አይፌይ ኔስ ዱጴ ጊዲኮ ኔፔ ኬሳ ዮጋ! ናምዑ አይፌራ ጌዴ ጋናሜ ታማን ኔ ዮጌታናፔ ኢሲ አይፌራ ዴዎይ ዲዛሶ ኔ ጌሊዛይሲ ኔስ ሎዎ። *

10 “ሃይታ ጉሳታ ጊዶፌ ኢሲኒዮካ ኢንቴ ካዶንታ ማላ ናጌቲቲ! ታ ኢንቴስ ቱሙ ጋይስ፤ ሳሎን ዲዛ ኢስታ ኪታንቻቲ ሳሎን ታ አዎ አይፌሶ ሉባ ጋላስ ያሌቴስ። 11 አሳ ናይ ዳዩዳይታ አሻናስ ዩዴስ። **

ዳዩዳ ዶርሳ ሌሚሶ
(ሉቃ 15:3-7)

12 “አኔ ታስ ዮቴቲ ኢሳዴስ ያቲ ዶርሲ ዲኮ ቃሴ ኢስታፊ ኢሲና ዳይኮ፣ ሃንኮ ኡዱፉን ታማኔ ኡዱፉናታ ዙማ ቦላ ዮጊዲ ዳዩዳር ኮያና ቢ ኤሬኔ? 13 ታ ኢንቴስ ቱሙ ጋይስ፤ ሃንኮ ዳዮንታ አቲዳ ኡዱፉን ታማኔ ኡዱፉን ዶርሳታፔ አሲዲ ቤቲዳ ዶርሳይን

* 18:1 ሉቃ 22:24 * 18:2-3 ማር 10:15፤ ሉቃ 18:17 * 18:5 ማር 9:42-48፤ ሉቃ 17:1-2 * 18:9 ማቶ 5:29 * 18:11 ሉቃ 19:10 * 18:11 ኢሲ ኢሲ ጌሻ ማፃፋቲ ጋይዶ ታማኔ ኢሲን ቦላ ዲዛ ቆፋ ጉጂቴስ፤ ኢዚካ ሉቃሳ ሺምፖ 10 ቦላ ዲዛይሳ ማላ።

ኡፋዮቴስ። 14 ሄሳሶካ ሃ ጉሳታ ጊዶሬ ኢሶይ ዳያና ማላ ሳሎን ዲዛ ኢንቴ አዋ ሼኔ ጊዴና።

ቆሂዳዴስ አይ አሳና ቤሲዛኮ

15 “ኔ ኢሻይ ኔና ቆሂኮ ኢዛኮ ባዳ ኢዛ ሃላላ ኔናራ ኤካዳ ኢዛ ሞሮ ኢዛስ ዮታ፤ ኢዚ ኔ ጊዛ ሲዩኮ ኔ ኢሻ ኔ አስ አሳሳ። *

16 ኢዚ ኔ ጊዛይሳ ሲዮንታ ኢዲኮ ዮያይ ወሪ ናምዑ ማርካን ዎይኮ ሄኹ ማርካን ላዲዛ ጊሽ ኢሳዴ ዎይኮ ናምዑ አስ ኔናራ ኤካ ባዳ ኢዛ ሃሳይሳ። * 17 ኢዚ ኢስታካ ሲዮንታ ኢዲኮ ዎሳ ኪሳስ ዮታ፤ ዎሳ ኪሳዮካ ሲዮንታ ኢዲኮ ኢዛዴ ኔ አማኖንታዴ ማላኔ ዮቲን ሲሞንታ ኢታ አሳ ማላ ቆዳ።

18 “ታ ኢንቴስ ቱሙ ጋይስ፤ ኢንቴ ቤታ ቦላ ቃቺዳይ ወሪካ ሳሎኒካ ቃሼቲዳ ጊዳና፤ ኢንቴ ቤታ ቦላ ቢርሺዳዚ ሳሎኒካ ቢርሺቲዳይሳ ጊዳና። * 19 ቃሴካ ታ ኢንቴስ ቱሙ ጋይስ፤ ኢንቴ ቤታ ቦላ ናምዑ ጊዲዲ አይ ሚሺካ ኤሮ ኤሮ ጊዲ ኢንቴ አይቺኮ ሳሎን ዲዛ ታ አዋይ ኢንቴስ ኢማና። 20 ናምዑ ዎይኮ ሄኹ ጊዲዲ ታ ሱንሳን ኢንቴ ሺቂዛሶን ሄን ኢንቴ ጊዶን ታ ዳና” ጊዴስ።

ማሮ ጊሽ

21 ሄሳ ዎዴ ጴፅሮሲ ዩሱሳኮ ሺቂዲ “ጎዶ! ታ ኢሻይ ታና ቆሂኮ ታ ኢዛስ አፑንቶ አቶ ጎ? ላፑንቶ አቶ ጎ?” ጊዴስ። *

22 ዩሱሲካ ኢዛስ ዛሪዲ “ላፑን ታሙቶ ላፑን አቲን ላፑንቶ ሃላላ ጋ፥ ጊኬ፤ *

23 “ሄሳ ጊሽ ሳሎ ካዎቴሲ አሽካራ ቦላ ዲዛ ሚሼ ሺሻና ኮይዳ ካዎ ሚሳታወስ። 24 ሚሻ ቆዳ አይኪዳ ማላ ኢዛ አሽካራታፕ ዳሮ ሚሎኔ ቢራ አጮይ ኢዛ ቦላ ዲዛዴ ኤኪ ዩዳ። † 25 አሽካራይካ ኢዛ ቦላ ዲዛ አጮዛ ቃንያይ ዎንዳ ጊሽ ኢዚካ ኢዛ ማቺያካ ኢዛ ናይቲኔ ኢዛስ ዲዛዚ ወሪ ባይዜቲዲ ሚሻይ ቃንጌታና ማላ ኢዛ ጎዳይ አዛዚዴስ። 26 ሄ ዎዴ አሽካራዚ ጎዳዛ ቶዎ ቦላ ኩንዲዲ ‘ታኒ ታ ቦላ ዲዛ አጮዛ ወርሲ ኔስ ቃንጎና ጋካናስ ታስ ጉሳ ዎዴ ኢማርኪ!’ ጊዲ ዎሲዴስ። 27 ኢዛ ጎዳይካ ኢዛስ ሚሼቲዲ ኢዛ አጮዛ ወርሲ ማሪዲ ዩዲዴስ።

* 18:15 ሉቃ 17:3 * 18:16 ዛሬ 19:15 * 18:18 ማቶ 16:19፤ ዮሃ 20:23
* 18:21 ሉቃ 17:3-4 * 18:22 ሜዴ 4:24 † 18:24 ዳሮ ሚሎኔ ቢራ ዳሮ ሚሎኔ ቢራ ጊዛይሳ አማራሳ ማግፋን ‘ሜክሊቴ’ ጊስ፤ ኢሲ ሜክሊቴይ ሄ ዎዴ ኢሲ አሳስ ታማኔ ኢቻሹ ላይሳ ዳሞዜፕ ቦላ ጊዲዳይሳ ቤሲስ።

28 “ሄ አሽካራይካ ባ ጎዳ አቻፌ ኬዚዳ ማላ ጉሳ አጮይ ኢዛ ቦላ ዲዛ ባ ላጌ ዴሚዲኔ ‘ኔ ቦላ ዲዛ ታ ሚሻዮ ሃሲ ሃኒን ቃንፃ’ ጊዲ ጩሊ አይኪዴስ። † 29 ሄ ኢዛ ላጌ አሽካራይ ‘ታስ ጉሳ ዎዴ ኢማርኪ! ታ ኔስ ቃንፃና’ ጊዲ ኢዛ ቶሆ ቦላ ኩንዲዲ ዎሲዴስ።

30 “ጊዶ አቲን ኢዛስ ጉሳ ዎዴ ኢማናስ ኮዮንታ ኢዲዲ ኢዛ ላጌዚ ባ ቦላ ዲዛ አጮዛ ቃንፃና ጋካናስ ቃሾ ኬላን ዩጊዴስ።

31 ሄሳ ኢዚ አሲሺን ቤዩዳ አሳይኔ ሃንኮ ኢዛ ላጌ አሽካራቲ ዳሮ ሚሼቲዳ። ቢዲካ ሃኒዳይሳ ወርሲ ባ ጎዳስ ዮቲዳ።

32-33 “ሄ ዎዴ ጎዳዚ ሄ አሽካራ ዔይጊሲ ኤሂዲ፣ ሃይሶ ኔኖ! ኢታዞ፣ ኔ ታና ዎሲን ኔ ቦላ ዲዛ አጮዛ ታ ኔስ አጋዲሲሺን ታ ኔና ማሪዳ ማላ ኔካ ኔ ላጌዛ ማራናስ ቤሴ? 34 ጊዲ ኢዛ ቦላ ዲዛ አጮዛ ኢዚ ወርሲ ቃንፃና ጋካናስ ቃቻና ማላ ቃቺዛይታስ አሲ ኢሚዴስ። 35 ሄሳ ጊሽ ኢንቴ ኢሶይ ኢሳ ዎዝናፔ ማሮንታ አጊኮ ሳሎን ዲዛ ታ አዋይካ ኢንቴና ማሬና” ጊዴስ።

19

ዮሱሲ ኤኮ ጊሺኔ ጌሎ ጊሽ ታማርሲዴስ (ማር 10: 1-12)

1 ዮሱሲ ዮቲ ወርሲዳፔ ጉዩ ጋሊላ አጊዲ ዮርዳኖሴ ፒንሳን ዲዛ ዮሁዳ አወራጃ ቤዴስ። 2 ዳሮ ዴሬይ ኢዛ ሄን ካሊን ኢዚካ ሃርጋንቻታ ፓሲዴስ።

3 ፋርሳዌቲ ኢዛ ፓጫናስ ኢዛኮ ሺቂዲ አይ ጋሶንካ “አሲ ባ ማሾ አንጂ ዮዳና ቤሲዜ?” ጊዲ አይቺዳ።

4 ኢዚካ ኢስታስ “ዎሲ ኮይሮፔ ማጫኔ አዴ ሜዲዳይሳ ናባቢቤይኪቲ? ጊዴስ። * 5 ቃሴካ ‘አሲ አዋኔ አዮ አጊዲ ባ ማቺራ ኢሲፌ ጊዴስ። ናምዳይካ ኢሲ አሾ ጊዴቱስ’ ጌቲቲዳይሲ ሃይሳ ጌዶን ጊዴስ? ጊዴስ። * 6 ናምዳይ ኢሲ አሾ አቲን ሲንሳፌ ናምዑ ጊዴቲና። ሄሳ ጊሽ ዎሲ ጋሲ ዋዲዳይሳ አሲ ሻኮፎ” ጊዴስ።

7 ኢስቲካ ኢዛስ “ሂስቲን ሙሴይ ‘አሲ ባ ማሾ አንጂ ዮዲዳ አንጆ ዋራቃታ ኢዚስ ኢሚ ዮዶ’ ጊዲ አዛስ አዛዚዴ?” ጊዳ። *

8 ዮሱሲካ ኢስታስ “ሙሴይ ኢንቴ ዎዝና ሙሜቱስ ቤዩዲ ማቼታ ኢንቴ አንጃና ማላ ፒቃዴ ኢንቴስ ኢሚዴስ አቲን ኮይሮፔ ሄሳ ማላ ጊዴና።

† 18:28 ጉሳ አጮይ ጊዛይሳ አማራሳ ማፃፋን ‘ዔቲ ዲናሬ’ ጌስ፤ ሄ ዎዴ ኢሲ አሳስ ኢሲ ጋላሳ አሶ ዳዎዜ ቤሴስ። * 19:4 ሜዴ 1:27፤ 5:2 * 19:5 ሜዴ 2:24 * 19:7 ዛሬ 24:1-4፤ ማቶ 5:31

9 “ታ ኢንቴስ ቱሙ ጋይስ፤ ባ አዚናፕ ሃራራ ላይማቶንታ ዲሺን ባ ማቾ አንጂዲ ሃራ ማቾ ኤኪዛዴይ ወሪ ላይማቴስ። አንጅቲዳሮካ ኤኪዛዴይ ኢዚራ ላይማቴስ” ጊዴስ። * 10 ዮሱሳ ካሊዛይቲ ኢዛስ “ማቺ ዎጋይኔ አዚና ዎጋይ ሃይሳ ማላ ጊዲኮ ማቾ ኤኮንታ አጎይ ሎዎ” ጊዳ።

11 ጊዶ አቲን ዮሱሲ ኢስታስ “ኢሲ ኢሲ ኢሜቲዳ አሳታፕ አቲን ሃይሳ ቲሚርቴዛ አኒካ ኤካናስ ዳንዳዮና። 12 ጋሶይካ ኢሲ ኢሲ አሳይ ባ አዩ ኡሎፕ ዮሌቲሼ ሹፋ ጊዲዲ ዮሌቲስ፤ ኢሲ ኢሲ አሳይ አሳ ኩሼን ቃራቴቲዲ ጉንዱሌስ፤ ኢሲ ኢሲ አሳይ ሳሎ ካዎቴሳስ ጊዲ ባና ባርካ ጉንዱላ አሲዛ አሲካ ዴስ። ሃይሳ ኤካናስ ዳንዳዩዛዴይ ኤኮ” ጊዴስ።

ዮሱሲ ጉሳ ናይታ አንጂዴስ
(ማር 10:13-16፤ ሉቃ 18:15-17)

13 ሄ ዎዴ ዮሱሲ ኢስታ ቦላ ባ ኩሼ ዎሲዲ ዎሳና ማላ ጉሳ ናይታ ኢዛኮ ኤኪ ኤሂዳ፤ ጊዶ አቲን ኢዛ ካሊዛይቲ ናይታ ኤሂዳ አሳታ ቦላ ሃንቁቲዳ። 14 ዮሱሲ “ናይቲ ሃ ታኮ ዮቶ፤ ዲጎፍቴ፤ ሳሎ ካዎቴሲ ሃይታንታ ማላሳ!” ጊዴስ።

15 ባ ኩሼ ናይታ ቦላ ዎሲዲ አንጂዳፕ ጉዩ ሄፕ ዴንዲ ቢዴስ።

ናቴሳ ዱሬ አዴዛ አይሻ
(ማር 10:17-31፤ ሉቃ 18:18-30)

16 ሄሳፌ ጉዩ ኢሳዴይ ዮሱሳኮ ሺቁዲ “አስታማሬ! ሜርና ዴዎ ዴማናስ ታኒ ሎዎ አሶ አይ አሶ?” ጊዲ አይቺዴስ። 17 ዮሱሲካ “ታና አዛስ ሎዎ ጊሽ አይቻይ? ሎዎይ ኢሲ ዎሳ ሃላላ፤ ጌዴ ዴዎይ ዲዛሶ ኔ ጌላና ኮይኮ አዛዞታ ናጋ” ጊዴስ።

18-19 አዴዚ “አዛዞቲ አዋይቴ?” ጊዲ አይቺዴስ። ዮሱሲካ ዛሪዲ “አስ ዎዲፓ፤ ላይማቶፓ፤ ካይሶቶፓ፤ ዎርዶ ማርካቶፋ፤ ኔ አዋኔ ኔ አዮ ቦንቻ፤ ኔ ሾሮ ኔ ማላ ሲቃ” ጊዴስ። * 20 ናቴሳዚ ዛሪዲ “ሃይሳ ዉርሳ ታ ናጋዲስ፤ ሃራይ አዚ ታስ ፓጩዴ?” ጊዴስ።

21 ዮሱሲካ ዛሪዲ “ኔ ሙሌ ጊላና ኮይኮ ባዳ ኔ ሃሪዳዝ ዉርሳ ባይዛዳ ሚሻ ዉርሳ ማንቆታስ ኢማ፤ ኔኒ ሳሎን ሚሽ ዴማንዳሳ፤ ሄሳፌ ጉዩ ሲማ ያዳ ታና ካላ” ጊዴስ።

22 አዴዚ ሄሳ ሲይዲ ኢዛስ ዳሮ ሚሺ ዲዛ ጊሽ ኬሂፕ ሚሼቲሼ ቢዴስ። 23 ዮሱሲ ባና ካሊዛይታ “ታ ኢንቴስ ቱሙ ጋይስ፤ ዱሬቲ ሳሎ ካዎቴሳ ጌላናይሲ ዳሮ ሜቶ። 24 ቃሴካ ታኒ ኢንቴስ

* 19:9 ማቶ 5:32፤ 1ቆሮ 7:10-11 * 19:18-19 ኬላ 20:13-16፤ ዛሬ 5:17-20፤ ሉቄ 19:18

ጊዛይ ዱሬይ ሳሎ ካዎቴስ ገላናይሳፌ ጋሜላይ ናርፔ ሉኮራ አዴሲ ካወያና” ጊዴስ። *

25 ሄሳ ሲዩዳ ኢዛ ካሊዛይቲ ዳር ቆፒዲ “ሂስቲን ኦኒ ኦታናስ ዳንዳዩዜ?” ጊዲ ዩሱሳ አይቺዳ።

26 ዩሱሲካ ኢስታ ዌሊዲ “ሃይሲ አሳ አቻን ዳንዳዩቴና፤ ያሳ አቻን ጊዲኮ ወሪካ ዳንዳዩቴስ” ጊዴስ።

27 ጴፀርሲ ኢዛስ ዛሪዲ “ኑ ወርሲካ አጊዲ ኔና ካሊዶስ፤ ሂስቲን ሃዲ ኑ አይ ዴማኔሻ?” ጊዴስ።

28 ዩሱሲካ ኢስታስ “ታ ኢንቴስ ቱሙ ጋይስ፤ አሳ ናይ ቡሮ ያና ኦራሳ አላሜን ባ ቦንቾ አልጋ ቦላ ኡቲዛ ዎዴ ኢንቴ ታና ካሊዳይቲ ታማኔ ናምዑ አልጋ ቦላ ኡቲዲ ታማኔ ናምዑ ኢስራዔሌ ናይታ ቦላ ፒርዳና። * 29 ታ ሱንሳ ጊሽ ጊዲ ባ ኬሴ፥ ባ ኢሻታ፥ ባ ሚቼታ፥ ባ አዋ፥ ባ አዮኔ ባ ናይታ፥ ዎይኮ ባ ቢታ አጊዛ አሲ ወሪ ዌቱ ኩሼ ዳኮ ኤካና፤ ሜዲና ዴያካ ላታና። 30 ጊዶ አቲን ዳር ሲንሴ ጊዲዳ አሳቲ ጉዩ ጊዳና፤ ዳር ጉዩን ዲዛ አሳቲ ሲንሳታና። *

20

ዎይኔ አታኪልቱ አሳንቻታ ሌሚሶ

1 “ሳሎ ካዎቴሲ ባ ዎይኔ አታኪልቱ ጊዶን ኦሲዛ አሳንቻታ ቃፃራናስ ማላዶራ ኬዚዳ ኢሲ አታኪልቱይ ዲዛ ጋዳዴ ሚሳታወስ። 2 ኢሲ ጋላሳ ዳሞዛ ጊዲዛዝ ሃሳዩቲዲ ጊጊዳፔ ጉዩ አሳንቻታ ዎይኔ አታኪልቱ አሶ አይሲዴስ።

3 “ማላዶ ሄሹ ሳቱን ኬዚዲ አሶይ ባይንዳ ሜላ ጊያይ ኤቂዛሶን ኤቂዳ ሃራ አሳታ ዴሚዴስ። 4 ‘ኢንቴ ቢዲ ታ ዎይኔ ጊዶን ኦሲቴ፤ ታ ኢንቴስ ቤሲዛ ሚሼ ኢማና’ ጊዴስ። 5 ኢስቲካ ቢዳ። ቃሴካ ጋላሳፌ ኡሱፑን ሳቲኒኔ ኡዱፉን ሳቲ ቦላ ኬዚዲ ሃራ አሳንቻታ አሶን ጌልሲዴስ። 6 አማርሳ ዎዴ ታማኔ ኢሲ ሳቲ ጊዲዛ ዎዴ ኬዚዲ ሙ ኤቂዳይታ ሃራታ ዴሚዲ ‘ኢንቴ ኩሜሳ ጋላስ አሶይ ባይንዳ አዛስ ሃይሳን ኤቂቲ?’ ጊዲ አይቺዴስ።

7 “ኢስቲካ ‘ኑና ኦሲሲዛ አሲ ዳዩዳ ጊሽ ኤቂዶስ’ ጊዳ። ኢዚካ ኢስታ ‘ኢንቴካ ቢዲ ታ ዎይኔ አታኪልቱ ጊዶን ኦሲቴ’ ጊዴስ።

8 “ጋዴይ ቃሚሺን ዎይኔ አታኪልቱዛ ጎዳይ አሳንቻታ አላፌዛስ ‘ጉዩፔ ዩዳይታፔ አይካዳ ኮይሮ ዩዳይታ ጋካናስ ዲዛ

* 19:24 ጋሜላይ ጊዛይሳ ኢሲ ኢሲ ባጋ ጋሞሶ ቃላን ጋሌይ ጌቱስ። * 19:28 ማቶ 25:31፤ ሉቃ 22:30 * 19:30 ማቶ 20:16፤ ሉቃ 13:30

አሳንቻታ ዉርሲ ዪይጋዳ ኢስታ አሶ ዋጋ ቃንፃፃ ጊደስ። * 9 ታማኔ ኢሲንፃ ሳቴ ቦላ አሶን ጌሊዳይቲ ዱዲ ኢሶይ ኢሶይ ኩሜላ ጋላሳ ዋጋ ኤኪዳ።

10 “ኮይሮ አሶን ጌሊዳይቲ ዩሼ ባ ዎዝናራ ሂንኮይታፔ ቦላራ ዳሮ ዲማና ጊ ቆፒሺን ኢስታስካ ሂንኮይታራ ጊና ኢሚዴስ። 11-12 ሚሻ ኤኪሼ ቃንፃፃዲ ቦላ ‘ሃይቲ ዉርሴላን አሶን ጌሊዲ ኢሲ ሳቴ ፃላላ አሲዳይቲ ኩሜላ ጋላስ አሶን ዱሪዲኔ አዋን ፀጌቲዲ ፔዲዳ ኑሳራ ዎስታ ኢስታስ ኢሲ ጊና ቃንፃፃይ?’ ጊዳ።

13-14 “ኢዚካ ኢስታፌ ኢሳዴስ ‘ታ ጃላዉ! ኔና ቆሃቤኬ፤ ኢሲ ጋላሳስ ጊዲዛ ዳዋዛን አሳናስ ታናራ ጊጋቤይኪ? ሃዲ ሄሂ ኔ ጊሻ ኤካዳ ባ፤ ኔስ ኢሚዳይሳ ማላ ዉርሴላን ዱዳይሳስካ ታ ኢማና ኮያይስ። 15 ሂስቲን ታ ሚሻን ታ ዶሲዳዚ አሳናስ ዳንዳዲኪና? ዎይኮ ታ ኪያ ጊዲዳይሲ ኔና ቃናቲሲዜ?’

16 “ጉዬን ዲዛይቲ ሲንሴ፥ ሲንሴን ዲዛይቲ ጉዬ አዳና” ጊደስ።

*

ዮሱሲ ባ ሃይቆ ጊሽ ሄቫንሶ ዮቲዴስ

(ማር 10:32-34፤ ሉቃ 18:31-34)

17 ዮሱሲ ዮሩሳላሜ ቢሼ ባና ካሊዛ ታማኔ ናምዓታ ዱማ ሻኪ ኤኪዲ 18 “ሂያ ኑኒ ዮሩሳላሜ ባና ጎስ፤ አሳ ናይ ቄሴታ ሃላቃሲኔ ሙሴ ዎጋ ታማርሲዛይታስ አዲ ኢሜታና፤ ኢስቲካ ኢዚ ሃይቃና ማላ ኢዛ ቦላ ፐርዳና። 19 ኢዛ ቦላ ቂዲ ካዓናሲኔ ጋራፋና ማላ፥ ዎዳና ማላካ ዴሬታስ አሲ ኢማና፤ ሄቫንሶ ጋላስ ኢዚካ ሃይቆፔ ዴንዳና” ጊደስ።

ዛቢዶሳ ናይታ አዮይ አይሻ

(ማር 10:35-45)

20 ሄሳፌካ ዛቢዶሳ ናይታ አያ ባ ናይታራ ዮሱሳኮ ሺቃዳ ኢዛ ሲንሳን ጉልባታዳ ዮሱሲ ኢዚስ ኢሲ ሚሽ አሳና ማላ ዎሳዱስ። 21 ኢዚካ ኢዞ “አይ ኮያይ?” ጊደስ፤ ኢዛካ “ሃይቲ ታ ና ናምዓቲ ኔ ካዎቴላን ኢሶይ ኔ ኡሻቻራ፥ ኢሶይ ኔ ሃዲርሳራ ኡታና ማላ አሳርኪ!” ጋዱስ።

22 ዮሱሲካ ዛሬዲ “ኢንቴ ዎሲዛዝ ኤሬኬታ፤ ታኒ ኡዬዛ ፀዓ ኢንቴ ኡያና ዳንዳያኔ?” ጊደስ። ኢስቲካ “ኤ ዳንዳዮስ” ጊዳ።

23 ኢዚካ “ታ ፀዓፔ ቴሙ ኢንቴ ኡያናሺን ታ ኡሻቻኒኔ ታ ሃዲርሳን ኡቴሲ ታ አዋይ ጊጊሲዳዴንታስ አቲን ታኒ ኢሚዛዝ ዴና” ጊደስ። 24 ታማቲ ሄሳ ሲይዲ ናምዑ ኢሻታ ቦላ ሃንቄቲዳ።

* 20:8 ሉዌ 19:13፤ ዛሬ 24:15 * 20:16 ማቶ 19:30፤ ማር 10:31፤ ሉቃ 13:30

25 ዮሱሲ ኢስታ ኢሲ ቦላ ያይጊዲ “አይዛቤ ሃላቃቲ ባ ሃሪዛ ዴሬ ቦላ ጎዳቲዛይሳ ማላ ጎዳቴሲ ዲዛይቲ ዎልቃራ ሃሪዛይሳ ኢንቴ ኤሬታ። 26 ኢንቴ ጊዶን ሄሳ ማላ ሃናናስ ቤሴና፤ ኢንቴሬ ጊታ ጊዳና ኮዩዛዴይ ኢንቴስ አሲዛዴ ጊዶ። * 27 ኢንቴሬ ቦላ ጊዳናስ ኮዩዛዴይ ኢንቴሬ ጋርስ ጊዶ። 28 አሳ ናይ አሳይ ኢዛስ አሳና ማላ ጊዶንታ አሳስ አሳናሲኔ ባ ሽምፖ ዳሮታ ጊሽ አሲ ኢማናስ ዩዴስ” ጊዴስ።

ዮሱሲ አይሬ ቆቄ ናምዑ አሳታ ፓሲዴስ
 (ማር 10:46-52፤ ሉቃ 18:35-43)

29 ዮሱሲ ባና ካሊዛይታራ ኢያርኮሬ ኬዚዲ ቢሺን ዳሮ ዴሬይ ኢዛ ካሊዴስ። 30 ሄን አይሬይ ቆቄዳ ናምዑ አሳቲ ኦጌ ዱናን ኡቲ ዴቴስ። ዮሱሲ አዲ ቢዛይሳ ሲይዲ “ጎዶ! ዳውቴ ናው ኑና ማራ!” ጊዲ ዋሲዳ።

31 ዴሬዚ “ሃይዚቴ!” ጊዲ ሃንቂዴስ፤ ጊዶ አቲን ኢስቲ ዳርሲ ዋሲሽ “ጎዶ! ዳውቴ ናው ኑና ማራ!” ጊዳ።

32 ዮሱሲካ ኤቂዲ ኢስታ ያይጊዲ “ታ ኢንቴስ አይ አሳና ማላ ኮዩቴ?” ጊዴስ።

33 ኢስቲካ “ኑ አይሬይ ያላና ማላ ኮዩስ” ጊዳ። 34 ዮሱሲ ኢስታስ ሚሼቲዲ ኢስታ አይሬታካ ባ ኩሼራ ቦሽቺን ሄራካ ያሊዲ ኢዛ ካሊዳ።

21

ዮሱሲ ጊታ ቦንቾን ዮሩሳሌም ጌሊዴስ
 (ማር 11:1-11፤ ሉቃ 19:28-38፤ ዮሃ 12:12-19)

1 ኢስቲ ዮሩሳሌም ማታን ዳብራዛይቴ ዙማ ቦላ ዲዛ ቤቴፋጌ ጌቴቲዛሶ ጋኪዳ ማላ ዮሱሲ ባና ካሊዛይታፕ ናምዓታ ኪቲዴስ።

2 “ሃኖ ኢንቴ ማታን ዲዛ ጉታዮ ቢዲ ኢንቴ ሄ ጋኪዳ ማላ ኢሲ ሃራ ዲዛራ ባ ጉቴይራ ቃሼታ ዲሺን ኢንቴ ዴማና። ቢርሺዲ ሃ ታኮ ኤኪ ዩቴ። 3 አኒካ ኢንቴና ‘አይስ ሃይሳሶ አሴቲ?’ ጊኮ ‘ጎዳይ ኢስታ ኮዩስ’ ጊቴ፤ ኢንቴና አይቺዛዴይ ሄራካ ዮዳና።

4-5 “ሃይሲካ ሃኒዛይ ካሴ ናቤን ያዮኒስ ሂዝጊቴ

‘ሄኮ! ኔ ካዎይ አሽኪ ጊዲዲ ሃራዮኔ ሃራይ ጉቴዮ ቶጊዲ ኔኮ ያና’ ጌቴቲዳይሲ ፖሌታናሳ” ጊዴስ። *

* 20:26 ማቶ 23:11፤ ማር 9:35፤ ሉቃ 22:26 * 21:4-5 ዛካ 9:9

6 ኢዛ ካሊዛይቲ ዩሱሲ ኢስታስ ዮቲዳ ማላ አሲዳ። 7 ሃራዮ ኢዚ ጉቴይራ ኤሂዲ ባ ማይዖ ኢስታ ቦላ ዎሲን ኢዚካ ሃራታ ቶጊዴስ። *

8 ዴራፔ ዳሪዛ ባጋይ ባ ማይዖ አጌ ቦላ ሚጨዴስ፤ ባጋ አሳይ ሚሳ ቦንጮ ዱሲ ዱሲ አጌ ቦላ አሲ አሲ ዩጊዴስ። 9 ኢዛፔ ሲንሳራ ቢዛ ዴሬይኔ ጉዩራ ካሊዛ ዴሬይካ ባ ቃላ ዶቁ ሂስቲዲ “ሆሳና! ዳዉቴ ናይ ጋላቴቶ!

ጎዳ ሱንሳን ዩዳይ አንጄቲዳዴ!

ዖሲ ጋላቴቶ!” ጊዳ። †

10 ኢዚ ዩሩሳላሚ ጌሊዳ ዎዴ ካታማ አሳይ ዉሪ “ሃይሲ አኔ?” ጊዲ ያርክ ያርኪዴስ።

11 ኢዛ ካሊዲ ዩዳ ዴሬይካ “ሃይሲ ጋሊላ ጊዶን ዲዛ ናዚሬቴፔ ዩዳ ናቤ ዩሱሳ ጊዴኔ?” ጊዴስ።

ዩሱሲ ዖሳ ኬሴን ዛልዔ ዛልዒዛ አሳ ጎዲዴስ
(ማር 11:15-19፤ ሉቃ 19:45-48፤ ዮሃ 2:13-22)

12-13 ሄሳፌ ዩሱሲ ዖሳ ኬሳ ጌሊዲ ዖሳ ኬሳ ካሬ ጊዶን ጋሳን ባይዚዛይታኔ ሻሚዛይታ ጎዲዴስ። ሚሽ ላሚዛይታ ሃራጴዛታኔ ሃራጴ ባዩዚዛይታ አይዴ ሽሪ ሽሪ ዩጊዲ “‘ታ ኬሳይ ዎሳ ኬሴ ጌቴቴስ ጌቴቲዲ ሃሬቲዴስ፤ ኢንቴ ቃሴ ቦንቁዛይታ ጎንጎሎ ሂስቲዴታ” ጊዴስ። *

14 አይፌ ቆቁታኔ ቶሆይ ሲሊዳ አሳታ ዩሱሳኮ ዖሳ ኬሴ ኤሂዳ። ኢዚካ ኢስታ ፓሲዴስ። 15 ጊዶ አቲን ቁሴታ ሃላቃቲኔ ሙሴ ዎጋ ታማርሲዛይቲ ኢዚ አሲዳ ማላታታ ቤዩዳይሳኒኔ ጉሳ ናይቲ “ዎዜ ካዎ፤ ጋላታይ ዳዉቴ ናስ ጊዶ!” ጊዲ ዋሲዛይሳ ሲዩዳ ጊሽ ዳሮ ሃንቁቲዳ።

16 ኢስቲካ ዩሱሳ “ሃይቲ ናይቲ ጊዛይሳ ሲያይ?” ጊዳ፤ ዩሱሲካ ኢስታስ “ኤ ሲያዲስ፤ ናይታ ዱናፔኔ ዳሚዛ ቁሪ ናይታ ዱናን ታኒ ጋላታ ጊጊሳዲስ ጊዛሶ ሙሌራካ ናባቢ ኤሬኬቲ?” ጊዴስ።

17 ኢስታ ዩጊ አጊዲ ሄ ካታማፔ ኬዚዲ ቢታኒያ ጌቴቲዛሶ ቢዲ ሄን አቂዴስ።

አይፌይ ባይንዳ ባላሴ ሚሲዮ
(ማር 11:12-14፤ 20-24)

* 21:7 ሃራታ ቶጊዴስ ጊዛይሲ NIV ጋርሳን ዴስ፤ ሃራይ ቃሴ ቲንቢቴይ ፖሌታና ማላ ሃራ ጉቴ ቦላ ኡቲዴስ ባጋ ጊሻ ማፃፍይ ጌስ። † 21:9 ሆሳና ኢብራዌታ ቃላራ ሆሳኒና ጉሳ “አቶቴስ” “ኑና አሻርኪ!” ጉሳ። * 21:12-13 ኢሳ 56:7፤ ኤር 7:11

18 ዮሱሲ ዎንቴሳ ጋላስ ማላዶ ጉዬ ካታማ ሲሚሺን ኢዛ ጋፊሲዴስ። 19 ኦጌ ማታን ኢሲ ባላሴ ጌቴቴዛ ሚሲ ቤዱዲ ጌዴ ኢዚኮ ሸቂሺን ሃይስ ሃላላፕ ኦቲን አይፌይ ባይንዳይሳ ቤዱዲ “ሂያፕ ጉዬ ኔ ቦላ አይፌይ ዶፖ!” ጊን ባላሴ ሚላያ ሄራካ ሚሳዱስ።

20 ዮሱሳ ካሊዛይቲ ሄሳ ቤዱዲን ማላሌቲዲ “ሃና ባላሴያ ዋናዳ ሄራካ ሚላዴ?” ጊዳ። 21 ዮሱሲካ ኢስታ “ታ ኢንቴስ ቱሙ ጋይስ፤ ኢንቴስ አማኖይ ዲኮኔ ኢንቴ ሲዶንታ አጊኮ ባላሴ ሚላይ ቦላ ሃኒዳይሳ ማላ ሃላላ ጊዶንታ ሃይሳ ዙማ ‘ሃይሳፌ ዶቃሌታዳ ዱጌ ኦባን ጌላ’ ኢንቴ ጊዳኮካ ኢዚ ጌላና” ጊዴስ። 22 ኢንቴስ አማኖይ ዲኮ ኢንቴ ዎሳን አይቺዳ ሚሽ ወርሲካ ኤካና።

**ዮሱሳ ጎዳቴሳ ጊሽ ሸቂዳ አይሻ
(ማር 11:27-33፤ ሉቃ 20:1-8)**

23 ዮሱሲ ዎሳ ኬሴ ጌሊዲ ታማርሲሺን ቀሴታ ሃላቃቲኔ ዴሬ ጪማቲ ኢዛኮ ሸቂዲ “ሃይሳ ወርሳ አና ሸኔን አሳይ? ሃይሳ አሳናስ ሸኔ ኔስ ኦኒ ኢሚዴ?” ጊዲ ኢዛ አይቺዳ።

24 ዮሱሲካ ኢስታስ ዛሪዲ “ታካ ኢንቴና ኢሲኖ አይቻይስ፤ ኢንቴ ታስ ዛሪኮ ታካ ሃይታ አሲዛይታ አና ሸኔን አሲዛኮኔ ኢንቴስ ዮታና። 25 ዮሃኒሳ ሂንቃቱይ አዋፕ ዬዴ? ሳሎፕ ዬዴዬ? አሳፕ?” ጊዴስ። ኢስቲካ “ኑ ‘ሳሎፕ ዬዴስ’ ጊኮ ‘ሂስቲን አዛስ አማኒቤኬቲ?’ ጋና ጊዲ ባ ጊዶን ኢሶይ ኢሶይ ኢሳራ ዞሬቲዳ። 26 ቃሴ ኑ ‘አሳፕ’ ጊኮ፣ አሳይ ወሪካ ዮሃኒሳ ናቤ ጊዲ አማኒዛ ጊሽ ኑ ባቦስ” ጊዳ።

27 ሄሳ ጊሽ ዮሱሳስ “ኑ ኤሮኮ” ጊዲ ዛሪዳ። ኢዚካ ኢስታስ “ሃይታ ታ አሲዛይታ አና ሸኔን አሲዛኮኔ ታካ ኢንቴስ ዮቲኬ” ጊዴስ።

ናምዑ ናይታ ሌሚሶ

28 ዮሱሲ ኢስታ “ኢንቴስ አይ ሚሳቲዜ? ናምዑ አቱማ ናይ ዲዛ ኢሳዴይ ዴስ፤ ኢዚካ ኮይሮ ናዛኮ ቢዲ ‘ታ ናዛ! ሃቺ ጌዴ ዎይኔ ሚሳሶ ባዳ አሳ’ ጊዴስ። 29 ናዚ ቃሴ ‘ቢኬ!’ ጊዲኔ ጉዬፕ ሙዞቲዲ ቢዴስ።

30 “ናምዳንሶ ናዛካ ካሴይሳሶካ ‘ባ!’ ጊን ናዚ ‘ኤሮ!’ ጊዲ ቦንታ አጋጊዴስ። 31 ሃይታ ናምዳታፕ አዋ ሸኔ ፖሊዳይ አዋይሴ?” ጊዲ አይቺዳ። ኢስቲካ “ኮይሮ ናዛ!” ጊዳ። ዮሱሲካ ኢስታስ፣ “ታ ኢንቴስ ቱሙ ጋይስ፤ ቃራፃ ቃንፂሲዛይቲኔ ላይማቲዛይቲ ሳሎ ካዎቴሲ ኢንቴፌ ሲንሳን ጌላና።

32 “ፃማቂዛ ዮሃኒሲ ኢንቴና ሂሎቴሳ ኦጌ ቤሳናስ ኢንቴኮ ዬዴስ ሺን ኢንቴ ኢዚ ጊዛይሳ አማኒቤኬታ፤ ጊዶ ኦቲን ቃራፃ

ቃንጊሲዛይቲኔ ላይማቲዛይቲ ጊዲኮ አማኒዳ፤ ኢዚ ሃኒዳይሳ ኢንቴ ቤዩ ሲሚዲካ ማርቴላን ጌሊዲ አማኒቤኬታ” ጊዴስ። *

ዎይኔ ሚሳ ጊዶን አሲዛ ጎሻንቻ ሌሚሶ
(ማር 12:1-12፤ ሉቃ 20:9-19)

³³ “ሃራ ሌሚሶካ ሲዩቴ፤ ዎይኔ ሚሲ ቶኪዛሶይ ዲዛዴይ ሄ ዎይኔዛሰ ቢርዳ ዩሺ አሲዲ ዎይኔዛ አይፌ ጉምዓናስ አላ ቦኪዴስ። ዎይኔዛ ናጋናስ ሚሳ ቦላ ሻኮ ጊጊሲዴስ። ሄሳፌ ጉዩ ጋዴዛ ዎይኔ ሚሳራ ጎይዛይታስ ኪራ ኢሚዲ ሃራ ዴፌ ቢዴስ። * ‡

³⁴ ቦኔይ ጋኪሺን ዎይኔ ሚሳዛ አይፌ ኤካናስ ባ አሽካራታ ጋዴዛ ጎይዛይታኮ ዩዲዴስ። ³⁵ ጋዴዛ ጎይዛይቲ አሽካራታ አይኪዲ ኢሳ ዎዲዳ፤ ኢሳ ቃሴ ሹቻን ጫዲዳ። ³⁶ ጋዳ ጎዳይ ካሴይታፕ አዲዛ ሃራ አሽካራታ ዩዲዴስ። ጎይዛይቲ ሃዲካ ካሴይታ ቦላ አሲዳይሳ ማላካ ኢስታ ቦላካ ፖሊዳ። ³⁷ ወርሴላን አኒ ኤሪዜ ‘ኢስቲ ኢዛ ቦንቻናኮኔ’ ጊዲ ባ ና አሲ ዩዲዴስ። ³⁸ ጊዶ አቲን ጋዳ ጎይዛይቲ ናዛ ቤዩዳ ማላ ‘ሃይሲ ኢዛ ላታናይሳኮ! አኔ ሃ ዩቴ፤ ኢዛ ዎዲዲ ጋዳ ላቶስ’ ጊዳ። ³⁹ ናዛ አይኪዲ ዎይኔይ ቶኬቲዳሶፕ ጌዴ ካሬ ኪሲዲ ዎዲዳ።

⁴⁰ “ኤር! ዎይኔዛ ጎዳይ ዩዛ ዎዴ ሄ ጋዳ ጎዩዛ አሳታ ዎስታና ኢንቴስ ሚሳቲዜ?” ጊዴስ። ⁴¹ ኢስቲካ “ሄይታንታ ኢታታ ዳር ዎይሲ ዎዲዲ ዎይኔይ ቶኬቲዛ ጋዳፕ ቤሲዛ ዎይኔ አይፌ ዎዴራ ኢዛስ ኢሚዛ ሃራ ጋዴ ጎይዛይታስ ኪራሳና” ጊዲ ኢዛስ ዛሪዳ።

⁴² ዩሱሲካ ኢስታስ “ጌሻ ማፃፋን
‘ጊምቤ ኬዲዛይቲ ኢታ ጊዲ ዎራ ዩጊዳ ሹቻይ ኬላስ
ማዛኔ ቦላ ዎዲዛ ሹቻ ጊዲዴስ፤
ዎሲ ሃይሳ አሲዴስ፤
ኢዛ አሶይካ ኑ አይፌስ ማላሊሲዛዝ’

ጌቲቲ ፃፌቲዳይሳ ናባቢቤኬቲ? *

⁴³ “ሄሳ ጊሽ ታ ኢንቴስ ዎሳ ካዎቴሲ ኢንቴፌ ኤኬታዳ አይፌ አይፊዛ ዴፌታስ ኢሚታና። ⁴⁴ ሃይሳ ሹቻ ቦላ ኩንዲዛይ ሜቃና፤ ሹቻይ ኢዛ ቦላ ዎዲዛዴይካ ሊቃና” ጊዴስ። §

* 21:32 ሉቃ 3:12፤ 7:29-30 * 21:33 ኢሳ 5:1-2 ‡ 21:33 ሻኮ ኢሲ ኢሲ ባጋ ጋሞሶ ቃላን ቱላ ጌቲቲስ። * 21:42 ማዛ 118:22-23 § 21:44 ኢሲ ኢሲ ጌሻ ማፃፋቲ ፓዶዶ አይዱ ታማኔ አይዱ ቦላ ዲዛይሳ ጉጂቴስ፤ ቆፋይካ ሉቃሳ ሽምፖ 20:18 ዲዛይሳ ሚሳቲስ።

45 ቁሴታ ሃሳቃቲኔ ፋርሳዌቲ ኢዛ ሌሚሶይ ኢስታ ጊሽ ጊዲዳይሳ ኤራዳ። 46 ጊዶ አቲን ኢስቲ ኢዛ አይኪ ቃቾንታ ማላ አሳይ ዩሱሳ ናቤ ማላ ዌሊዛ ጊሽ ባቢዳ።

22

ሳርጌስ ዌይጌቲዳ አሳታ ሌሚሶ

(ሉቃ 14:15-24)

1 ቃሴካ ዩሱሲ ሃራ ሌሚሶ 2 “ሳሎ ካዎቴሲ ባ ናስ ሳርጌ ጊጊሲዳ ኢሲ ካዎ ሚሳታዉስ። 3 ካዎይካ ዲጊሳስ ዮቲዳይታ ዌይጋናስ ባ አሽካራታ ዩዲዴስ፤ ዌይጌቲዳይቲካ ‘ኑ ቦኮ’ ጊዳ።

4 “ቃሴካ ሃራ አሽካራታ ‘ካሴ ኢስታስ ዮቲዳይታ ሄኮ ታ ሳንጋ ቦራታኔ ዎዲዳ ማይሄታ ሹካዳ ዲጊሳ ጊጊሳዲስ፤ ዉሪካ ጊጌቲዳ ጊሽ ሳርጌሶ ሃ ዩቴ!’ ጊዲ ዮቲቴ። 5 ዌይጌቲዳይቲ ጊዲኮ ኢዛ ዌይሳ ዉዳን ዩጎንታ አጊዲ ኢሶይ ባ ጎሻሶ፤ ኢሶይ ባ ዛልዌሶ ቢዴስ። 6 ሃንኮ አቲዳይታ፤ አሽካራቲ አይኪዲ ዳር ዋይሲዲ ዎዲዳ።

7 “ካዎይካ ሃንቁቲዲ ዎታዳራታ ዩዲዲ አሽካራ ዎዲዳይታ ዳይሲዴስ፤ ኢስታ ካታማ ፀጊዴስ። 8 ባ አሽካራታካ ‘ሳርጌዛ ዲጊሴይ ጊጊዴስ፤ ጊዶ አቲን ሳርጌዛሶ ዌይጌቲዳይቲ ሳርጌስ ቤሲዛይታ ጊዲቤቴና። 9 ጌዴ አጌ ቦላ ኬዚዲ ኢንቴ ዴሚዳ አስ ዉርሲ ሃ ሳርጌ ዲጊሴስ ዌይጊቴ’ ጊዴስ። 10 አሽካራቲካ አጌ ቦላ ኬዚዲ ባ ዴሚዳይታ ሎዎታካ ኢታታካ ዉርሲ ሺሺዲ ሳርጌዛሶ ኢማስ ኩንሲዳ።

11 “ካዎይካ ዌይጌቲዳ ኢማሳ ቤያናስ ሶ ጌሊዛ ዎዴ ሳርጌ ማይዎ ማይዎንታ አስ ዴሚዴስ። 12 ‘ሃይሶ! ሳርጌ ማይዎ ማይዎንታ ዋናዳ ሃይሳ ጌላናስ ዳንዳዳዲ?’ ጊ አይቺን አዴዛስ ዛራና ቃላይ ዳዩዴስ። 13 ካዎይካ ባ አሽካራታ ‘ሃይሳ አዴዛ ቶሆኔ ኩሼ ሺሺ ቃቺዲ ሄን ካሬን ዲዛ ዱማን ኬሲ አሊቴ፤ ሄን ዩሆኔ አቻ ጋርጩቾ ጊዳና።’ *

14 “ዌይጌቲዳይቲ ዳርታ፤ ዶሬቲዳይቲ ጊዲኮ ጉሳታ” ጊ ዮቲዴስ።

ጊራ ቃንጻናስ ሺቂዳ አይሾ

(ማር 12:13-17፤ ሉቃ 20:20-26)

15 ሄሳፌ ጉዩ ፋርሳዌቲ ኬዚ ቢሼ “ኢዛ ዱናፔ ባላ ቃላ ዎስቲ ዴሚ አይኪኖ?” ጊዲ ዞሬቲዳ። 16 ባና ካሊዛይታ ሄርዶሳ አሳታራ ኢዛኮ ኪቲዲ “አስታማሬ! ኔኒ ቱማንቻኔ ዎሳ አጌ ቱማፔ

* 22:13 ማቶ 8:12፤ 25:30፤ ሉቃ 13:28

ታማርሲዛዴ ጊዲዳይሳኔ አናስካ ዱማ ማዶ አሶንታ ዉርሳካ ኢሲ ማላ ኔ ዪሊዛይሳ ኑ ኤሮስ። 17 ኔስ አይ ሚሳቲዛኮኔ አኔ ኑስ ዮታ? ቁሳሬስ ጊራ ቃንግናስ ቤሲዜ? ቤሴኔ?” ጊዳ።

18 ዮሱሲካ ኢስታ ጌኔ ቆፋ ኤሪዲ “ኢንቴኖ ቆዴፕ ቆሞን ሃኒዛይቶ ታና ዮዖን ባሌሲ አይካናስ አዛስ ኮዮቲ? 19 ኢንቴ ጊራ ቃንግዛ ሚሻ አኔ ታና ቤሲቴ” ጊን ኢስቲካ ኢሲ ዲናሬ ጌቴቲዛ ሚሽ ኢዛስ ኤሂዳ። 20 ኢዚካ “ሃይሳ ሚሻ ቦላ ዲዛ ሚሲሌይኔ ሃፌቲዳ ሱንሳይ አናይሴ?” ጊዴስ።

21 ኢስቲካ ኢዛስ “ቁሳሬይሳ” ጊዳ። ኢዚካ ኢስታስ ዛሪዲ “ቁሳሬይሳ ቁሳሬስ፣ ያሳይሳ ያሳስ ኢሚቴ” ጊዴስ። 22 ሄሳ ሲዮዳ ዎዴ ማላሌቲዲኔ ኢዛ አጊ ቢዳ።

ሃይቂዳይታ ዴንሳ ጊሽ ሸቂዳ አይሾ
(ማር 12:18-27፤ ሉቃ 20:27-40)

23 “ሃይቂዳይታስ ዴንዶይ ባዋ” ጊዲ አማኒዛ ሳዱቃዌቲ ሄ ጋላስ ዮሱሳኮ ሸቂዳ፣ * 24 “አስታማሬ! ሙሴይ ‘ኢሳይይ ማሾ ኤኪዲ ና ዮሎንታ ሃይቂኮ ኢዛ ኢሻይ ሃይቂዳይሳ ማሾ ኤኪዲ ባ ኢሻ ሳቲዛ ና ኢዛስ ዮሎ’ ጊዴስ። * 25 ኑ አቻን ላፑን ኢሻቲ ዴቴስ ሸን ኮይሮ ኢሻይ ማሾ ኤኪዲ ና ዮሎንታ ሃይቂዳ ጊሽ ካሎ ኢሻይ ኢዛ ማቼዮ ኤኪዴስ። 26 ናምዓንሶ ኢሻይካ ሃይቂዳ ኢሻሶ ና ዮሎንታ ሃይቂዴስ፤ ሄሳሶካ ሃኒሺን ማጫሳዮ ላፑንሳ ኢሻ ጌላዱስ። 27 ዉርሴሳን ማጫሳዮ ሃይቃዱስ። 28 ሄሳ ጊሽ ላፑናቲ ዉሪካ ኢዞ ኤኪዳ ሸን ሃይቆፕ ዴንሳ ጋላስ ማጫሳዮ ላፑንታፕ አዋይሳ ማሾ ጊዳኔ?” ጊዳ።

29 ዮሱሲካ ኢስታስ ዛሪዲ “ጌሻ ማግፋታኔ ያሳ ዎልቃ ኢንቴ ኤሮንታ ጊሽ ባሌቴታ። 30 ሃይቆፕ ዴንዲዳፕ ጉዮ አሳይ ሳሎ ኪታንቻታ ማላ ጊዳና አቲን ኤኪቴቴናኔ ጌሌቴና። 31-32 ሃይቂዳይታ ዴንሳ ጊሽ ጊዲኮ ያሲ ‘ታኒ አብራሃሜ ያሳ፣ ዩሳቃ ያሳ፣ ያቆቤ ያሳ’ ጊዲ ኢንቴስ ዮቶይሳ ናባቢቤኪቲ? ያሲ ፓግታ ያሳ አቲን ሃይቆሳታ ያሴ ጊዴና” ጊዴስ። * 33 ዴሬይካ ሄሳ ሲይዲ ኢዛ ቲሚርቴዛን ማላሌቲዴስ።

ዉርሶፕ አዲዛ አዛዞ
(ማር 12:28-34፤ ሉቃ 10:25-28)

34 ዮሱሲ ሳዱቃዌታ ጮው ሂስቲዳይሳ ሲይዲ ፋርሳዌቲ ኢሲ ቦላ ሸቂቲዳ። 35-36 ኢስታ ጊዶሬ ኢሲ ሙሴ ዎጋ ሎዔሲ

* 22:23 ሃዋ 23:8 * 22:24 ዛሬ 25:5 * 22:31-32 ኪሳ 3:6

ኤሪዛዴዬ ዮሱሳ ፓጫናስ ኮይዲ “አስታማሬ! ሙሴ ዎጋታ ጊዶን አባሬ አዲዛይ አዋይሴ?” ጊዲ አይቺዴስ። *

³⁷ ኢዚካ ዛሪዲ “ኔ ጎዳ ዎሳ ኔ ኩሜሳ ዎዝናፔ፣ ኔ ኩሜሳ ሼምፖሬ፣ ኔ ኩሜሳ ቆፋፔ ዶሳ፣”³⁸ ሃይሲ ኮይሮኔ አባሬ አዲዛ አዛዞ። ³⁹ ናምዓንጎሶይካ ኢዛ ሚሳቴስ፣ ሄሲካ ‘ኔ ሾሮ ኔ ሁዔ ማላ ዶሳ’ ጊዛይሳ። * ⁴⁰ ሙሴ ዎጋይኔ ናቤታ ቲሚርቴይ ወሪካ ሃይታ ናምዑ አዛዞታን ቃሼቴስ” ጊዴስ።

ኪርስቶሳ ጊሽ ሺቂዳ አይሾ
(ማር 12:35-37፤ ሉቃ 20:41-44)

⁴¹ ፋርሳዌቲ ኢሲ ቦላ ሺቂቲ ዲሺን ዮሱሲ ኢስታ፣
⁴² “ኪርስቶሳ ጊሽ ኢንቴ አይ ጌቲ? ኢዚ እና ና?” ጊ አይቺዴስ፤ ኢስቲካ ኢዛስ ዛሪዲ “ኢዚ ዳወቴ ና” ጊዳ።

⁴³⁻⁴⁴ ኢዚካ ኢስታስ
“ሂስቲን ዳወቴይ ዒሎ አያና ዎልቃን
‘ዎሳይ ታ ጎዳ’ ጊዲ ዋኒ ዌይጊዴ?
‘ታ ኔ ዋርኬታ ኔ ቶዎ ጊዶን ጉልባቲሳና ጋካናስ ኔ ታ ኡሻቻን
ኡታ!’ ጊዴስ። * ⁴⁵ ሄሳ ጊሽ ዳወቴይ ኢዛ ‘ታ ጎዳ’ ጊዲ ዌይጊኮ ዋኒዲ ኢዛስ ና ጊዳና ዳንዳዩዜ?”
ጊዴስ። ⁴⁶ ኢዛስ ኢሲ ቃላ ዛራና ዳንዳዩዳ አሲ ዎይኮ ሄ ጋላሳሬ ሲሚን ኢዛ አይሾ አይቻና ሃሊዳ አሲ አኒካ ቤቲቤና።

23

ዮሱሲ ፋርሳዌታኔ ሙሴ ዎጋ ታማርሲዛይታ ካዲዴስ
(ማር 12:38-39፤ ሉቃ 11:43-46፤ 20:45-46)

¹ ቃሴካ ዮሱሲ ዴሬዛሲኔ ባና ካሊዛይታስ፣ ² “ሙሴ ዎጋ ታማርሲዛይቲኔ ፋርሳዌቲ ሙሴ ዎምባራ ቦላ ኡቲዳ። ³ ሄሳ ጊሽ ኢስቲ ኢንቴስ ዮቲዛይሳ ወርሲ አሴቴኔ ናጊቴ፤ ጊዶ አቲን ኢስቲ ዱናን ሃሳዩዛይሳ ማላ አሶን ቤሶንታ ጊሽ ኢንቴ ኢስታ አሶ ካሎፍቴ።

⁴ “ሄሳሶካ አሲ ቶካናስ ዳንዳዮንታ ዴዎ ቶዎ ቃቺዲ አሳ ሃሼ ቦላ ዎሴቴስ ሺን ባሲ ጊዲኮ ቤራዴ ዌራንካ ቦቼቴና። ⁵ ኢስታ አሶ ወርሲ አሲ ቤያና ማላ አሴቴስ፤ ባ አሼንኪታቤ ጌሻ ማፃፋ ጊዶፋ ፃሬ ኤኪዳ ኢሲ ኢሲ ዒቂሴታ ኪታቤ ሲኪዲ ሊጴ ቦላ ዎይኮ ኩሼን ቃቺዛዝ አሴቴስ። ባ ማይዎ ማጫራ አዱሴቴስ። ⁶ ዲጊሳይ ዲዛሶን ቦንቾ ሶ አይሁዳ ዎሳ ኬላንካ ሲንላራ ኡታና

* 22:35-36 ሉቃ 10:25-28 * 22:37 ዛሬ 6:5 * 22:39 ሉቁ 19:18
* 22:43-44 ማዛ 110:1

ዶሴቴስ። 7 ሄሳሶካ ጊያ ጊዶን ሳር ጌቴታናሲኔ አሳይ ኢስታ 'አስታማሬ!' ጋና ማላ ኮዩቴስ።

8 “ኢንቴ ጊዲኮ 'አስታማሬ' ጌቴቲ ዌይጌቶፍቴ። ኢንቴ አስታማሬይ ኢሳ ሃላላ ጊዲሺን ኢንቴ ወ.ሪካ ኢሶይ ኢሳስ ኢሻንታ። 9 ሳሎን ኢንቴስ ኢሲ አዋይ ሃላላ ዲዛ ጊሽ ቢታ ቦላ አናካ 'አዋወ!' ጊዲ ዌይጎፒቴ። 10 ኢንቴ አስታማሬይ ኢሲ ኪርስቶሳ ሃላ ጊዲዳ ጊሽ ኢንቴ 'አስታማሬቶ!' ጌቴቶፍቴ። 11 ኢንቴ ጊዶን ኡባሬ አዲዛዴይ ኢንቴስ አሲዛዴ ጊዳና። *

12 ባና ደቂሲዛዴይ ካወያና፤ ባና ካወሸዛዴይ ቦንፔታና። *

13 “ኢንቴኖ ቆዴፔ ቆሞን ሃኒዛይቶ፤ ሙሴ ዎጋ ታማርሲዛይቶ፤ ኢንቴኖ ፋርሳዌቶ! አሳይ ያሳ ካዎቴስ ጌሎንታ ማላ አሳ ቦላ ኢንቴ ፔንጌ ጎርዲዛ ጊሽ ኢንቴና አዩ-አና! ኢንቴ ኢንቴስ ጌሌኬታኔ ጌላናስ ኮዩዛይታካ ጌልሴኬታ። 14 ኢንቴኖ ቆዴፔ ቆሞን ሃኒዛይቶ፤ ሙሴ ዎጋ ታማርሲዛይቶ፤ ቃሴካ ፋርሳዌቶ! ኢንቴስ አዩ-አና! አዚናይ ባይንዳ ማጫሳታ ኬሳ ካሎሲሼ አሳ አይሬ ሲንሳን አዱሳ ያሳ ኢንቴ ዎሲዛ ጊሽ ኢንቴ ኢታ ፒርዳ ፒርዴታና። *

15 “ኢንቴኖ ቆዴፔ ቆሞን ሃኒዛይቶ፤ ሙሴ ዎጋ ታማርሲዛይቶ፤ ቃሴካ ፋርሳዌቶ! ኢሲ አስ አይሁዳ አማኖን ጌልሳናስ አባ ቦላራኔ ቢታ ቦላራ ዩዩ ዳቡርዲኔ አማንሲዳ አሳ ኢንቴሬ ናምዑ ኩሼ አሲዲ ጋናሜ ና ኢንቴ ኬሲዛ ጊሽ ኢንቴና አዩ-አና!

16 “ኢንቴኖ! ኢንቴስ ቆቂ ኡቲዲ ሃራታ ካሌሲዛይቶ! ኢንቴስ አዩ-አና! 'አኒካ ያሳ ኬሳን ጫቂኮ አይኮይ ባ' ጊዶ አቲን 'ያሳ ኬሳ ጊዶን ዲዛ ዎርቃን ጫቂኮ ጫቆ ጎሜይ ጋካና' ጌታ። 17 ኢንቴኖ ቆቂዳይቶ! ባሌቲዳይቶ፤ ዎርቃሬኔ ዎርቃ ዱማሲዳ ያሳ ኬሳሬ አዋይሲ አዲዜ? 18 ሄሳሶካ 'አኒካ ያርሾ ያርሺዛሶ ቦላ ጫቂኮ አይኮይ ባዋ፤ ሺን ያርሺዛሶን ዲዛ ያርሾ ቦላ ጫቂኮ ጫቆይ ጎሜሰ' ጌታ። † 19 ኢንቴኖ ቆቂቶ! ያርሾፔኔ ያርሾ ሺሺዛሶፔ አዋይሴ አዲዛይ? 20 ሄሳ ጊሽ ያርሾ ሺሺዛሶ ቦላ ጫቂዛዴይ ያርሾሰዛ ቦላኔ ያርሺዛሶ ቦላ ዲዛ ኡባ ሚሻን ጫቂስ። 21 ሄሳሶካ ያሳ ኬሳዛ ቦላ ጫቂዳይ ያሳ ኬሳኒኔ ኢዛ ጊዶን አቂዛይሳን ጫቂስ። 22 ሳሎን ጫቂዛዴይካ ያሳ አልጋኒኔ አልጋ ቦላ ኡቲዳይሳን ጫቂስ። *

* 23:11 ማቶ 20:26-27፤ ማር 9:35፤ 10:43-44፤ ሉቃ 22:26 * 23:12 ሉቃ 14:11፤ 18:14 * 23:14 ኢሲ ኢሲ ጌሻ ማፃፋቲ ፓይዶ ታማኔ አይዱ ቦላ [14] ዲዛ ቆፋ ጉጅቴስ፤ ቆፋይካ ማርቆሳን ሸምፖ 12:40 ዲዛይሳ ሚሳቴስ። † 23:18 ያርሾ። አሲ ባ ጎዳስ ጊዲ አሲዛ አሶይ ወ.ሪ ያርሾ ጌቴቴስ። * 23:22 ኢሳ 66:1፤ ማቶ 5:34

23 “ኢንቴኖ ቆዴፔ ቆሞን ሃኒዛይቶ፥ ሙሴ ዎጋ ታማርሲዛይቶ፥ ፋርሳዌቶ! ኢንቴና አዩ አና! አሱታፔ፥ አኑጋፔኔ ካትካልዓፌ ታማፌ ኢሲኖ ኢሜታ ሺን ዎጋታፔ ዋናቲዛይታ ሄይቲካ ቱማ ፒርዳ፥ ማሮቴሲኔ አማኔቴስ ጊዲኮ ካዲዴታ፥ ሄይታ አጎንታ ዲሼ ሃይታንታ ኢንቴ አሳናስ ኢንቴስ ቤሴስ ሺን አጊዴታ፥ * 24 ኢንቴኖ ቆቂ ኡቲዲ ካሌሲዛይቶ! ኡዔ ጋጩዲ ኡዩታ ሺን ጋሚላ ሙሜ ሚቴታ!

25 “ኢንቴኖ ቆዴፔ ቆሞን ሃኒዛይቶ፥ ሙሴ ዎጋ ታማርሲዛይቶ፥ ፋርሳዌቶ! ኢንቴስ አዩ-አና! ፀዓሲኔ ኬሬስ ቦላ ባጋ ቁጩታ ሺን ኢዛ ጊዶን ዲዛይሳ ኢንቴ ቦንቃኒኔ ኡዜቴሳን ሺሺዴታ፥ 26 ኔኖ ቆቂ ፋርሳዌቶ! ኮይሮታዳ ፀዓሲኔ ኬሬስ ጊዶ ባጋ ጌሻ! ሄሳፌ ጉዩ ካሬ ባጋይ ጌሽ ጊዳና፥

27 “ኢንቴኖ ቆዴፔ ቆሞን ሃኒዛይቶ፥ ሙሴ ዎጋ ታማርሲዛይቶ፥ ቃሴ ፋርሳዌቶ! ቦላ ባጋይ ኖራራ ሜሼቲዲ ሎዒዛይቲ ጊዶይ ጊዲኮ ሃይቂዳይታ ሜቁሲኔ ዳሮ ቴናኔቴሳን ኩሚዳ ዱፎታ ሚሳቲዛ ጊሽ ኢንቴና አዩ-አና! * 28 ኢንቴካ ቦላ ባጋራ አሳስ ሂሎ አሳታ ሚሳቴታ፤ ኢንቴ ጊዶይ ጊዲኮ ጨሞኒኔ ኢታቴሳን ኩሚዴስ፥

29 “ኢንቴኖ ዱናን ጨሚዛይቶ! ሙሴ ዎጋ አስታማሬቶ፥ ቃሴካ ፋርሳዌቶ! ኢንቴስ አዩ-አና! ናቤታ ዱፎ ሎዒሲዛይቶ፥ ሂሎ አሳታ ዱፎ ሃወልቴራ ጊጊሲዛይቶ! 30 ኑ አዋቲ ናቤታ ዎዲዛ ዎዴ ኑ ዲዛኮ ኢስታራ ዙፔቶኮኮ ሺን፥ 31 ኢንቴ ናቤታ ዎዲዳ አሳታ ናይታ ጊዲዳይሳ ኢንቴ ዱናራ ኢንቴርካ ኢንቴ ኢንቴ ቦላ ማርካቴታ፥ 32 ሂስቲኮ አሴቲዲ ፖሌቶንታ ኦጌ ቦላ ዲዛ ኢንቴ አዋታ አሶ ፖሊቴ፥ †

33 “ኢንቴኖ ዱኪዛ ኢታ ሾሻ ናይቶ! ጋናሜ ታማ ፒርዳፌ ኢንቴ ዋኒ አታኔ? * 34 ሄሳ ጊሽ ናቤታኔ ኤራንቻታ አስታማሬታካ ታ ኢንቴስ ዩዳና፥ ኢንቴ ኢስታ ጊዶፌ ኢሲ ኢሲ አሳታ ዎዲና፥ ባጋይታ ኢንቴ ካቃና፤ ባጋይታ ኢንቴ አይሁዳ ዎሳ ኬሳን ጋራፋናኔ ሃ ካታማፔ ሃራ ኢንቴ ጎዳና፥ 35 ሄሳ ጊሽ ሂሎ አቤሌ ሱሳፌ ሃ ሲሚን ዎሳ ኬሳኒኔ ያርሾ ያርሺዛሶ ጊዶን ኢንቴ ዎዲዳ ባራኪዮ ና ዛካራሳ ሱሳ ጋካናስ ቤታ ቦላ ጉኪዳ ሂሎታ ሱሳ ኡባስ ኢንቴ አይሼታና፥ * 36 ታ ኢንቴስ ቱሙ ጋይስ፤ ካሴ አዲዳ ዮዎ ኡባስ ሃይሲ ሃ ዩሌታይ አይሼታና፥

* 23:23 ሌዌ 27:30 * 23:27 ሃዋ 23:3 † 23:32 ቦኔ፥ ኢስታ ዴሬን ሚላቲ ሃይስ ኬሲዛይኔ ጨሊሊዛይ ቦኔይ ማቲሺን ጊዶይሳ ቤሴስ፥ * 23:33 ማቶ 3:7፤ 12:34፤ ሉቃ 3:7 * 23:35 ሜዴ 4:8፤ 2ታር 24:20-21

37 “ሃኔ ዩሩሳሌሜ! ናቤታ ዎዲዛሬ! ኔኮ ኪቴቲዳይታ ሹቻራ ጫዲዛሬ! ሃኔ ዩሩሳሌሜ ኩቶ አያ ባ ጨዩታ ባ ቁፌ ጊዶ ሺሺዛ ማላ ታ ኔ ናይታ ሺሻናስ አፑን ዎዴ ኮያዲናሺን ኔ ጊዲኮ ኮያባካ።
 38 ሄኮ ኢንቴ ኬሲ ካይስ ጊዲ አታና። * 39 ታ ኢንቴስ ቱሙ ጋይስ፤ ኢንቴ ጎዳ ሱንሳን ዩዛዴይ አንጄቲዳዴ ጋና ዎዴይ ጋካናስ ናምግንሶ ታና ቤዩኬታ” ጊዴስ። *

24

ዎዴ ዉርሴሳ ማላታታ
 (ማር 13:1-2፤ ሉቃ 21:5-6)

1 ዩሱሲ ያሳ ኬሳፌ ኬዚ ቢሺን ኢዛ ካለዛይቲ ያሳ ኬሳዚ ሹቻን ኬዲቲዳይሳ ቤሳና ኮይዲ ዩሱሳኮ ሺቁዳ። 2 ኢዚካ ኢስታስ “ሃይሳ ዉርሴ ያሌቲ? ታ ኢንቴስ ቱሙ ጋይስ፤ ሃይሲ ኢንቴ ቤዩዛ ኢሶይ ኢሳ ቦላ ዲዛ ሹቻይ ላሌቶንታ ኢሲ ሹቹካ ሃይሳሶ ዴና” ጊዴስ።

3 ኢዚ ዳብራዛይቲ ጌቴቲዛ ዙማ ቦላ ኡቲ ዲሺን ኢዛ ካለዛይቲ ሃላላ ኢዛኮ ሺቁዲ “አኔ ኑስ ዮታ፤ ሃይሲ ኔ ጊዛይሲ አይዴ ሃናኔ? ኔ ዩሳሲ ኔ ዎዴ ዉርሴሳስ ማላታይ አዜ?” ጊ አይቺዳ።

4 ዩሱሲካ ዛሬዲ “አኒካ ኢንቴና ባሌሶንታ ማላ ናጌቲቱ። 5 ቡሮ ዳሮቲ ‘ታ ኪርስቶሳ’ ጊሼ ታ ሱንሳን ያና፤ ዳሮታካ ባሌሳና።

6 አላኔ አላ ጊሽ ሃሳዩቲዛ ዎሬ ኢንቴ ሲያና። ሃ ዮቦቲ ዉሪካ ዎልቃራ ፖሌታና ሺን ዉርሴሳ ቡሮ ጊዲዳ ጊሽ ኢንቴ ሃይሳን ዳጋሞንታ ማላ ናጌቲቱ። 7 ዴሬይ ዴሬ ቦላ፣ ካዎይ ካዎ ቦላ ዴንዳና፤ ዱማ ዱማ ዴሬን ኮሻይኔ ቢታ ቃሲ ሃናና። 8 ሄሲ ዉሪካ ሚፃስ ሌሶ ማላ። 9 ሄ ዎዴ ኢንቴና ዋዩስ አሲ ኢማና፤ ኢንቴና ዎዳና፤ ታ ሱንሳ ጌዶን ዴሬ ኡባን ኢንቴ ኢዲቲዳይታ ጊዳና። *

10 “ሄ ዎዴ ዳሮ አሳይ ዱጴታና፤ ኢሶይ ኢሳ አሲ አሲ ኢማናኔ ባ ጊዶን ኢዲታና። 11 ዳሮ ዎርዶ ናቤቲ ዴንዳናኔ ዳሮታ ባሌሳና። 12 ኢታቴሲ ዳሪዛ ጊሽ ዳሮታፕ ሲቆይ ኢርፃና። 13 ዉርሴሳ ጋካናስ ሚኒዳዴይ አታና። * 14 ዴሬ ኡባስ ማርካ ጊዳና ማላ ሃይሲ ካዎቴሳ ሚሺራቾ ቃላይ ኩሜሳ አላሜን ዮቴታና፤ ሄሳፌ ጉዩ ዉርሴሳ ያና።

15 “ሄሳ ጊሽ ናቤ ዳኔላን ዮቴቲዳይሳ ማላ ‘ሃራሲዛ ቱናቴሲ’ አንጄቲዳሶን ኤቂዳይሳ ኢንቴ ቤዩዛ ዎዴ ናባቢዛይይ ዎዝናን

* 23:38 ኤር 22:5 * 23:39 ማዛ 118:26 * 24:9 ማቶ 10:22 * 24:13 ማቶ 10:22

ዎሶ። * 16 ሄ ዎዴ ዩሁዳን ዲዛይቲ ፑዴ ዙማ ቦላ ጋንጌቶ።
 17 ኬላ ካራ ቦላ ዲዛዴይ ኦኒካ ባ ሚሽ ኬላፌ ኬሳና ጊዲ ዱጌ
 ዎድ። * 18 ጋዴ ጊዶን ዲዛዴይ ኦኒካ ባ ማይዎ ኤካና ጊዲ
 ሶ ሲሞ። 19 ሄ ጋላሳታን ቃንሳራ ዲዛ ማጫሳታሲኔ ና ዳንሲዛ
 አዩታስ አዩ-አና! 20 ሄሳ ጊሽ ኢንቴ ጋንጎይ ባልጎ ዎይኮ ሳምባታ
 ጋላስ ጊዶንታ ማላ ዎሲቴ። 21 ሄ ዎዴ አላሜይ ሜዴቶሳፕ
 ሃቺ ጋካናስ ሃኒ ኤሮንታ ሚሺ ሲንሳፌካ ኢዛ ሚሳቲዛይ ባይንዳ
 ዎልቃማ ሜቶይ ሃናና። 22 ሄ ጋላሳቲ ቃሞንታኮ አሾ ማይዲዳ
 አሲ ወሪ አቴና ሺን ዶሬቲዳይታ ጊሽ ሄ ጋላሳቲ ቃማና።

23 “ሄ ዎዴ ኦኒካ ‘ሄኮ ኪርስቶሲ ሃይሳን ዴስ!’ ዎይኮ ‘ሄሳን
 ዴስ’ ጊዛዴ አማኖ።” 24 ዎርዶ ኪርስቶሳኔ ዎርዶ ናቤቲ ቡሮ
 ዴንዲዲ ኢስታስ ዳንዳይቲኮ ዶሬቲዳይታ ባሌሳናስ ጊዲ ዎልቃማ
 ማላታቲኔ ካሴ አሴቲ ኤሮንታ ሚሽ አሳና።

25 “ሄኮ ሃይሳ ታ ኢንቴስ ካሴታ ዮታይስ። 26 ሄሳ ጊሽ ‘ሄኮ
 ሂርኪ ባዞን ዴስ’ ጊዲ ኢንቴስ ዮቲኮ ሄ ኬዞ።” ‘ሄኮ ኢልፒኔን
 ዴስ’ ጊኮ አማኖ። * 27 ዎልቃንሲ አዋ አርሼይ ሞኪዛሶራ
 ዎልቃሚዲ አዋ አርሼይ ወሊዛሶ ጋካናስ ፖሚዛይሳ ማላ አሳ ና
 ዩሳይካ ሄሳሶ ሃናና። 28 አሃይ ዲዛሶ አንኮ ካፎይ ሺቄስ። *

29 “ሄራካ ሄ ኢታ ሜቶ ጋላሳታፕ ጉዩ
 አዋ አርሼይ ዳማና፤

አጊናይ ባ ፖዎ ዲጋና፤
 ዎሊንቴቲ ሳሎፕ ቆቆፌታና፤

ሳሎ ዎልቃማቲካ ቃፃና። *

30 ሄ ዎዴ አሳ ና ማላታይ ሳሎ ቦላ ቤታና። ቢታ ቦላ ዲዛ
 ዴሬይ ወሪ ዩካና፤ አሳ ናይካ ሳሎ ሻራ ቦላ ዳሮ ዎልቃራኔ
 ጊታ ቦንቾራ ዩሺን አሳይ ቤያና። 31 ኪታንቻታካ ዳሮ ዎልቃማ
 ፁሩምባ ጊሪሳራ ዩዳና። ኢስቲካ ዶሬቲዳይታ አይዱ ማሂኬኔፕ
 ሳሎስ ሃ ባጋ ጋፃፕ ሄ ጋፃ ባጋ ጋፃ ጋካናስ ወርሲ ኢሲ ሶ ሺሻና።

32 “ባላሴ ጌቴቲዛ ሚሳፌ ሃይሳ ታማሪቴ፤ ባላሴ ሚሳይስ
 አንቁሎይ ጨሊሊዛ ዎዴ ኢዛ ሃይስ ኬሲሺን ቦኔይ ማቲዳይሳ
 ኢንቴ ኤሬታ።” 33 ሄሳሶ ሃይታ ኢንቴ ቤዩዛ ዎዴ ኢዚ ፔንጌ
 ማቲዳይሳ ኢንቴ ኤራና። 34 ታ ቱሙ ጋይስ፤ ሃይሲ ወሪ ፖሌታና
 ጋካናስ ሃ ዩሌታይ አዴና። 35 ሳሎይኔ ሳዓይ አዳና ሺን ታ ቃላይ
 ጊዲኮ ሙሌካ አዴና።

* 24:15 ዳኔ 9:27፤ 11:31፤ 12:11 * 24:17 ሉቃ 17:31 * 24:26
 ሉቃ 17:23-24 * 24:28 ሉቃ 17:37 * 24:29 ኢሳ 13:10፤ 34:4፤ ኢዩ
 2:10፤31፤ 3:15፤ አጁ 6:12-13፤ ሂዚ 32:7፤ ኢዩ 2:10፤ 3:15

ጎዳይ ያና ጋላስ አኒካ ኤሬና

(ማር 13:32-37፤ ሉቃ 17:26-30፤ 34-36)

36 “ሄ ጋላሳዮኔ ሄ ሳቴዮ አዋፔ አቲን ሳሎ ኪታንቻታ ጊዲንካ ናዛ ጊዲንካ አኒካ ኤሬና። 37 ኖሄ ዎዴ ሃኒዳይሳ ማላ አሳ ና ዩሲ ሄሳ ማላ ጊዳና። * 38 ዳይሲዛ ሃሳፌ ካሴ ኖሄይ ማርካቤን ጌሊዛ ጋላስ ጋካናስ አሳይ ሚሼኔ ኡዩሼ፣ ኤኪሼኔ ጌሊሼ ጋምዲዴስ። 39 ሄ ዎዴይ ጋካናስ አዚ ሃናናኮኔ አሳይ ኤሮንታኔ ቆፖንታ ባሻ ሃሳይ ዩዲ ሚቲዳይሳ ማላ ታ አሳ ናይ ዩዛ ዎዴይካ ሄሳሶ ሃናና። *

40 “ሄ ዎዴ ናምዑ አሳቲ ኢሲፌ ጎሻን ፔጻና ሺን ኢስታፌ ኢሳዴይ ኤኬታና፤ ኢሳዴይ አታና። 41 ናምዑ ማጫሳቲ ዎፃን ኢሲፌ ጋጫና ሺን ኢስታፌ ኢሲኔያ ኤኬታና ኢሲኔያ አታና።

42 “ሂስቲኮ ኢንቴ ጎዳይ ያና ጋላሳ ኢንቴ ኤሮንታ ጊሽ ቤጊዲ ናጊቴ። 43 ሃይሳ ዎዛናን ዎሲቴ፤ ካይሶይ ቃማፌ አፉንሳ ሳቴ ቦላ ያናኮኔ ኤሪዛኮ ኢዛ ሚሽ ካይሶይ ኤኮንታ ማላ ኬሳ አዋይ ቤጊዲ ናጋና። 44 አሳ ናይካ ኢንቴ ቆፖንታ ሳቴ ቦላ ያና፤ ኢንቴካ ሄሳሶ ጊጌቲዳይታ ጊዲቴ።

45 “ዎዴራ ሶ አሳ ቁማ ሚዛና ማላ ጎዳይ ባ ኬሳ አሳ ቦላ ሹሚዳ አማኔቲዛ ጨንጫ አሳንቻይ አኔ? 46 ኬሳ አዋይ ሲሚዲ ዩዛ ዎዴ ኢዛስ ኢሚዳ ሃዳራ አሲ ፖሊሼ ቤቲዳ አሳንቻይ አንጄቲዳይሳ። 47 ታ ኢንቴስ ቱሙ ጋይስ፤ ጎዳይ ኢዛ ባ ሃሪዳ ኡባ ቦላ ሹሜስ። 48 ጊዶ አቲን ሄ አሳንቻይ ኢታ ጊዲዲ ‘ታ ጎዳይ ጋምዲዲ ያና’ ጊ ቆፒዲ፣ 49 ዴንዲ ሃንኮ አሳንቻታ ዋዳ አይኪኮ ማሶቲዛይታራ ሚኮኔ ኡዩኮ፣ 50 ኢዚ ቆፖንታ ጋላሳኒኔ ሳቴን ኢዛ ጎዳይ ዩዲ፣ 51 ኢዛ ቃንዌሲ ካጻና፤ ኢዛ ኤፃ ቆዴፔ ቆሞን ሃኒዛይታራ አሳና። ሄንካ ዩዎይኔ አቻ ጋርጨኛ ሃናና።

25

ታሙ ጌላዎታ ሴሚሶ

1 “ሄ ዎዴ ሳሎ ካዎቴሲ ሚሺራ ሞካናስ ያምፔ አይኪዲ ኪዚዳ ታሙ ጌላዎታ ሚሳታዉስ። * 2 ሄ ታማታፔ ኢቻሹ ጌላዎቲ ኤያታ፣ ሃንኮ ኢቻሻቲ ቃሴ ጨንጫታ። 3 ኤያቲ ኩራዜ ያምፔ አይኪዳ ሺን ዉሪኮ ጉጃና ሃራ ናጌ ላምባ አይኪቤቴና። 4 ጨንጫቲ ጊዲኮ ባ ኩራዜዛራ ዉሪኮ ጉጃና ላምባ ሃራ ዓርሙሴን አይኪዳ። 5 ማቺዮ ኤካና ሚሺራይ ዮንታ ጋምዲን ዲስኮይ ዴፂን አሳይ ዉሪካ ዲስኪዴስ።

* 24:37 ሜዴ 6:5-8 * 24:39 ሜዴ 7:6-24 * 25:1 ሉቃ 12:35

6 “ሌላ ጊደስ ጊዲሺን ‘ሚሺራዚ ዩስ! ከዚዲ ሞኪ ኤኪቱ!’ ጊዛ ዌይሳ ቃላይ ሲዩቲደስ። 7 ሄሳ ዎዴ ጌላዎቲ ወሪካ ዴንዲዲ ባ ዎምፔ ዎምፔ አይሴሶኔ ጊጌቱስ አይኪዳ። 8 ኤያቲ ጨንጫታ ‘ኑ ዎምፔይ ቶዓና ጊዛ ጊሽ ኢንቱ ላምባፔ ኑስ ኢሚቱ’ ጊዳ።

9 “ጨንጫ ጌላዎቲ ኢስታስ ዛሪዲ ‘ኑስ ዲዛ ላምባይ ኑሳራኔ ኢንቱሳራ ጊደንታ ጊሽ ቢዲ ላምባ ባይዚዛይታፔ ኢንቱስ ሻሚቱ’ ጊዳ። 10 ኢስቲ ላምባ ሻማና ቢ ኪቺን ሚሺራዚ ጋኪ ዎዲደስ። ካሴ ጊጌቲ ኡቲዳ ጌላዎቲ ቡላቻሶ ኢዛራ ጌሊዳ፤ ካሬይካ ጎርዴቲደስ።

11 “ጉስ ጋምዲሽ ሃንኮ ጌላዎቲ ዩዲ ‘ጎዶ! ጎዶ! ካሬ ኑስ ዶያ!’ ጊዳ። 12 ኢዚካ ዛሪዲ ‘ታ ኢንቱስ ቱሙ ጋይስ፤ ታ ኢንቱና ኤሪኬ!’ ጊደስ። 13 ሄሳ ጊሽ ያና ጋላሳ ዎይኮ ሳቴዛ ኢንቱ ኤርንታ ጊሽ ጊጌቲዲ ናጊቱ።

ሄሹ አሳንቻታ ሌሚሶ
(ሉቃ 19:11-27)

14 “ዎሳ ካዎቱሴ ባሲ ዲዛዚ ወርሲ ባ አሽካራታስ ሃዳራ ኢሚዲ ሃራ ዴሬ ባና ዴንዲዳ ኢሲ አስ ሚሳቱስ። *

15 አሽካራታስ ኢሳስ ኢሳስ ኢስታ ዎልቃ ማላ ጊጊሲዲ ኢሳስ ኢቻሹ ሺ ቢራ፥ ኢሳስ ናምዑ ሺ ቢራ፥ ሃንኮይሳስ ቃሴ ኢሲ ሺ ቢራ ኢሚዲ ቢደስ። 16 ኢቻሹ ሺ ቢራ ኤኪዳ አደዚ ሄራካ ሚሻን ዛልዔ አይኪዲ ሃራ ኢቻሹ ሺ ቢራ ዎዲሲደስ። 17 ቃሴካ ናምዑ ሺ ቢራ ኤኪዳይሲ ሃራ ናምዑ ሺ ቢራ ዎዲሲደስ።

18 ኢሲ ሺ ቢራ ኤኪዳይሲ ባ ጎዳ ቢራ ቢታን ሞጊዲ ቆቲደስ።

19 “አሽካራታ ጎዳይ ባ ቢዳሶን ዳሮ ዎዴ ጋምዲ ሲሚዲ ሚሻ ኢስታራ ሳላዔቲደስ። 20 ኢቻሹ ሺ ቢራ ኤኪዳ አሽካራይ ሃራ ኢቻሹ ሺ ቢራ ዎዲሲዳይሳ ኤኪ ዩዲ ‘ጎዶ! ኔ ታስ ኢቻሹ ሺ ቢራ ኢማዳሳ ሺን ሄኮ ሃይሳ ታ ሃራ ኢቻሹ ሺ ቢራ ዎዲሳዲስ’ ጊደስ። 21 ኢዛ ጎዳይካ ‘ሎዎ አሳዳሳ፤ ኔኖ ሎዎ አማኔቲዳ አሽካራዞ! ኔ ጉሳ ሚሻን አማኔቲዳ አስ ጊዲዳ ጊሽ ታ ኔና ዳሮ ሚሻ ባላ ሹማና፤ ጌዴ ኔ ጎዳ ኡፋይሳሶ ጌላ’ ጊደስ።

22 “ሄሳሳካ ናምዑ ሺ ቢራ ኤኪዳይሲ ጎዳዛኮ ሺቀዲ ‘ጎዶ! ኔ ታስ ናምዑ ሺ ቢራ ኢማዳሳ ሺን ሄኮ ሃራ ናምዑ ሺ ቢራ ዎዲሳዲስ’ ጊደስ። 23 ጎዳዚካ ‘ሎዔሳዳሳ፤ ሃይሶ ሎዎኔ ታስ አማኔቲዳ አሽካራዞ! ኔኔ ጉሳን አማኔቲዳዴ ጊዲዳ ጊሽ ታ ኔና ዳሮ ሚሻ ባላ ሹማይስ፤ ጌዴ ኔ ጎዳ ኡፋይሳሶ ጌላ’ ጊደስ።

24 “ኢሲ ሺ ቢራ ኤኪዳ አሽካራይ ሺቀዲ ‘ጎዶ! ኔኔ ዜርንታሶፔ ማጊዛዴኔ ላሎንታሶፔ ሺሺዛ ሜንዌ ኢታ አስ ጊዲዳይሳ ታ

* 25:14 ሉቃ 19:11-27

ኤራይስ። 25 ሄሳ ጊሽ ታ ባባዳ ቢታ ቦካዳ ኔ ቢራ ቦኪዳ አላን ሞጋዳ ቆታዲስ፤ ኔ ሚሽ ሄሳ ቤያ! ጊዴስ።

26 “ኢዛ ጎዳይ ዛሪዲ ‘ሃይሶ ኢታ አዛላ አሽካራዞ! ታኒ ዜሮንታሶፕ ማጊዛዴ ላሎንታሶፕ ሺሺዛዴ ጊዲዳይሳ ኔ ኤራይ? 27 ሂስቲን ታ ሲማ ዪዛ ዎዴ ታ ሚሻ ዮሎራ ታ ኤካና ማላ ቲርፕሲ ዛልዲዛ አሳስ ኔ ኢማናስ ቤሴሴሺን? ጊዴስ።

28 “አኔ ሃዲ ኢዛፕ ሺ ቢራ ኤኪዲ ታሙ ሺ ቢራይ ዲዛዴስ ኢሚቱ። 29 ዲዛዴስ ጉጄታናኔ ዳሪ ዳሪ ባና፤ ባይንዳዴፌ ሄ ዲዛ ጉላያካ ኢዛፕ ኤኪታይቻና። * 30 ሃይሳ ጎዳይ ባይንዳ አሽካራ ጌዴ ዮኪዛሶኔ አቼይ ጋርጨቴዛሶ ሄን ካሬን ዲዛ ጴማን ኬሲ ዮጊቱ’ ጊዴስ። *

ዉርሴሳ ፒርዳ

31 “አሳ ናይ ባ ኪታንቻታ ኡባራ ቦንቾን ዪዛ ዎዴ ባ ቦንቾ አልጋ ቦላ ኡታና። * 32 ዴሬይ ዉሪ ኢዛ ሲንሱ ሺቃና፤ ኢዚካ ሜሄ ሄሚዛዴይ ዴይሺ ዶርሳፌ ቆሪ ሻኪዛ ማላ አሳ ኢሳ ኢሳፌ ቆሪ ሻካና። 33 ዶርሳታ ኢዛስ ኡሻቻ ባጋራ ዴይሻታ ሃዲርሳ ባጋራ ኤሳና። 34 ሄ ዎዴ ካዎይ ኡሻቻ ባጋራ ዲዛይታ ‘ኢንቴና! ታ አዋይ ኢንቴና አንጂዳይቲ ሃ ዪቴ! አላሜይ ሚዴቶሳፕ ኢንቴስ ጊጌቲዳ ካዎቴሳ ላቲቴ! ጋና። 35 ጋሶይካ ታኒ ጋፊን ታና ሚዚዴታ፤ ታ ሳሜቲን ታና ኡሺዴታ፤ ታ ኢማሳ ጊዳዳ ዪን ታና ሞኪ ኤኪዴታ። 36 ታ ካሎቲን ታና ማይዚዴታ፤ ታ ሳኬቲን ታና ሃርጊሲዴታ፤ ታ ቃሼቲን ታና አይቺዴታ’ ጋና።

37 “ዒሎቲካ ዛሪዲ ‘ጎይ! ኔ ጋፊን ኑ ኔና አይዴ ሚዚዶኒ? ዎይኮ ኔ ሳሞቲን አይዴ ቤዬዲ ኑ ኔና ኡሺዶኒ? 38 ኑ አይዴ ኔና ቤዬዲ ኢማሳቴስ ሞኪዶኒ? ዎይኮ አይዴ ኔ ካሎቲን ቤዬዲ ኔና ማይዚዶኒ? 39 ሄሳሶካ ኔ ሳኬቲን ዎይኮ ቃሼቲን አይዴ ቤዬዲ ኔና አይቺዶኒ?’ ጋና። 40 ካዎይካ ዛሪዲ ‘ታ ኢንቴስ ቱሙ ጋይስ፤ ሃይታ ላፋ ጊዲዳ ታ ኢሻታፕ ኢሳዴስ አሉዳይሲ ኢንቴ ታስ አሉዳ ማላ’ ጋና።

41 “ቃሴካ ሃዲርሳ ባጋራ ዲዛይታስ፤ ‘ኢንቴና ቃንጌቲዳይቶ! ታፕ ሻኪቲዲ ዳቡሎሳሲኔ ኢዛ ኪታንቻታስ ጊጌቲዳ ሜርና ታማን ቢቱ ጋና። 42 ጋሶይካ ታ ጋፊን ታና ሚዚቤኬታ፤ ታ ሳሞቲን ታና ኡሺቤኬታ፤ 43 ታና ኢማሳቴስ ሞኪቤኬታ፤ ታ ካሎቲን ታና ማይዚቤኬታ፤ ታ ሳኬቲን ቃሼቲን ታና አይቺቤኬታ’ ጋና።

* 25:29 ማቶ 13:12፤ ማር 4:25፤ ሉቃ 8:18 * 25:30 ማቶ 8:12፤ 22:13፤ ሉቃ 13:28 * 25:31 ማቶ 16:27፤ ማቶ 19:28

44 “ኢስቲካ ዛሪዲ ‘ጎዶ፥ ኔ ጋፊን ወይኮ ኔ ሳሞቲን ወይኮ ኔ ኢማስ ጊዲን ወይኮ ኔ ካሎቲኒኔ ኔ ሳኬቲን ወይኮ ኔ ቃሼቲን ኑ ኔና ቤዩዲ አይዴ ኔስ ጋኪቤኮኒ?’ ጋና።

45 “ሄ ወዴ ኢዚካ ኢስታስ ዛሪዲ ‘ታ ኢንቴስ ቱሙ ጋይስ፤ ሃንታ ላፋ ታ ኢሻታፔ ኢሳዴስ ኢንቴ አሶንታ አጊዳይሲ ታስ ኢንቴ አሶንታ አጊዳ ማላ’ ጋና። 46 ሄይቲ ጌዴ ሜርና ፒርዳን ባና፤ ጊሎቲ ጊዲኮ ሜርና ዴዎኮ ባና” ጊዴስ። *

26

አይሁዳቲ ዩሱሳ ወዳናስ ማቄቲዳ

(ማር 14:1-2፤ ሉቃ 22:1-2፤ ዮሃ 11:45-53)

1-2 ዩሱሲ ሄሳ ሃሳዩ ዉርሲዳፔ ጉዩ ባና ካሊዛይታስ “ናምዑ ጋላሳፌ ጉዩ ፓዚጋ ጊዲዳይሳ ኤሬቲ? አሳ ናይ ካቄታናስ አዲ ኢሜታና” ጊዴስ። *

3-4 ሄሳፌ ጉዩ ቄሴታ ሃላቃቲኔ ዴሬ ጨማቲ ቃያፋ ጌቴቲዛ ቄሴታ ሃላቃ ጊቤን ሺቂዲ ሂላራ ዩሱሳ አይሲዲ ወዳሳናስ ማቄቲዳ። 5 ጊዶ አቲን “አሳ ጊዶን አሺ ዴንዶንታ ማላ ባዓሌ ጋላስ ጊዶፖ” ጊዲ ቃቺዳ።

ዩሱሳ ሺቶ ቲዩዳ ማጫሳዮ

(ማር 14:3-9፤ ዮሃ 12:1-8)

6 ዩሱሲ ቢታኒያን ኢንቺራቻ ሃርጌራ ዲዛ ሲሞና ጌቴቲዛዴ ሶን ዲሺን፥ 7 ኢሲ ማጫሲ ዲዛራ ዋጋይ ኬሂ አልዎ ጊዲዳ አልባስዲሮሴ ጌቴቲዛ ሺቶ ቢልቃዔ ኩሜስ አይካዳ ዩሱሳኮ ሺቃዳ ኢዚ ማዳን ኡቲዲሺን ኢዛ ሁዔ ቦላ ሺቶዛ ጉሳዱስ። ** 8 ኢዛ ካሊዛይቲ “ሄሳ ቤዩዲ ሃይሲ አዛስ ሜላ ሞሬቲዜ? 9 ሺቶዚ ዳሮ ዋጋስ ባይዜቲዲ ሚሻይ ማንቆታስ ኢሜቲዛኮቺ?” ጊዳ።

10 ዩሱሲ ሄሳ ኤሪዲ “ሃና ማጫሳዮ አዛስ ዋይሴቲ? ኢዛ ታስ ሎዎ አሳዱስ። 11 ማንቆቲ ኡባ ወዴ ኢንቴናራ ዴቲስ፤ ታ ጊዲኮ ኡባ ወዴ ኢንቴናራ ዲኬ ጊዴስ። * 12 ኢዛ ሺቶዛ ታ ቦላ ጉሲዳይሲ ታና ሞጎስ ጊጊሳናሳ። 13 ታ ኢንቴስ ቱሙ ጋይስ፤ ሃይሲ ሚሺራቾ ቃላይ ሳባኬቲዛ አላሜ ዩሾን አዋንካ ኢዛ አሲዳይሲ ኢዞ ቆፊሲዛዝ ጊዲዲ ሃሳዩታና” ጊዴስ።

* 25:46 ዳኔ 12:2 * 26:1-2 ኬሳ 12:1-27 * 26:7 አልባስዲሮሴ ቦንቾ ሚሽ ኢዛፔ አሴቲዛ ቦላ አልዎ ሹቻ። * 26:7 ሉቃ 7:37-38 * 26:11 ዛሬ 15:11

የሁዳይ ዮሱሳ አሲ ኢማናስ ጊጌቲዴስ
(ማር 14:10-11፤ ሉቃ 22:3-6)

14 ሄሳፌ ጉዬ ታማኔ ናምዓታፔ ኢሶይ አስቆርንቶ የሁዳ ጌቴቲዛይሲ ቄሴታ ሃላቃታኮ ቢዲ፣ 15 “ታ ኢንቴስ ኢዛ አሳ ኢሚኮ ኢንቴ ታስ አይ ኢማኔ?” ጊዴስ። ኢስቲካ ኢዛስ ሄዡ ታሙ ቢራ ኢዛ ኩሼን ታዩቢ ኢሚዳ። * 16 ሄ ጋላሳፌ ሲሚዲ የሁዳይ ዮሱሳ ኢስታስ አሲ ኢማናስ ኢንጄ ዎዴ ናጊሼ ጋምዲዴስ።

ጎዳ ካዎ
(ማር 14:12-21፤ ሉቃ 22:7-13፤ ዮሃ 13:21-30)

17 ኡኬሳ ባዓሌ ጌቴቲዛ ባዓሌ ጋላስ ኢዛ ካሊዛይቲ ዮሱሳኮ ሺቂዲ “ኔ ፓዚጋ ማናሶ አዋን ጊጊሳና ማላ ኮያይ?” ጊዳ።

18 ኢዚካ ኢስታስ ዛሪዲ ጌዴ ካታማ ቢዲ ኤቤሎ ጌቴቲዛ አስ “አስታማሬይ ታ ዎዴይ ማቲዳ ጊሽ ታና ካሊዛይታራ ፓዚጋ ታ ኔ ኬላን ቦንቻና ጊዴስ’ ጊዲ ዮቲቴ” ጊዴስ። 19 ኢዛ ካሊዛይቲካ ዮሱሲ ኢስታ አዛዚዳ ማላ ፓዚጋ ካዎ ጊጊሲዳ።

20 ጋዴይ አማርሲሺን ዮሱሲ ታማኔ ናምዓታራ ማዳን አቲዴስ። 21 ኢስቲ ሙሳን ዲሺን ኢዚ ኢስታስ “ታ ቱሙ ጋይስ፤ ኢንቴፌ ኢሶይ አሲ ኢማና” ጊዴስ።

22 ኢስቲካ ኬሂ ሙዞቲዲ ታራን ታራን “ጎዶ ታኔሻ?” ጊዳ።

23 ኢዚካ ዛሪዲ “ታና አሲ ኢማናዴይ ኬሬን ታናራ ኩሼ ዮዲዛዴ። * 24 ኢዛ ጊሽ ካሴ ዓፌቲዳይሳ ማላ አሳ ናይ ባና፤ ጊዶ አቲን አሳ ና አሲ ኢሚዛዴስ አዩ-አና! ሄሳዴይ ዮሎቶንታ አቲዳኮ ኢዛስ ሎዎኮሺን” ጊዴስ። 25 ኢዛ አሲ ኢማና የሁዳይ “አስታማሬ! ታኔሻ?” ጊዴስ። ኢዚካ “ኤ፣ ኔ ጊዳ ማላ” ጊዴስ።

26 ኢስቲ ሙሳን ዲሺን ዮሱሲ ሚዛ ቁማፔ ኤኪዲ አንጄዴስ። ሜንሲዲኔ ባና ካሊዛይታስ ኢሚዲ “ሄዩቴ ሚቴ፤ ሃይሲ ታ አሾኮ” ጊዴስ። 27 ቃሴካ ኡሻ ዴንሲዲ ጋላቲዲኔ ባና ካሊዛይታስ ኢሚዲ “ወሪካ ሃይሳፌ ኡዩቴ፤ 28 ዳሮ አሳ ናጋራፔ ማራና ጉኪዛ ታ ኦራሳ ጫቆ ሱሳይ ሃይሳ። * 29 ታ ኢንቴስ ጊዛይ ታ አዎ ካዎቴሳን ታ ኢንቴናራ ኦራሳ ዎይኔን ኡሻዛ ኡያና ጋካናስ ሃይሳፌ ሲንሳን ሃይሳ ዎይኔ ኡሻ ኢንቴናራ ኡዩኬ” ጊዴስ።

30 ማዛሙሬ ዮጊዳፔ ጉዬ ፑዴ ዳብራዛይቴ ጌቴቲዛ ዙማ ቦላ ኬዚዳ።

* 26:15 ዛካ 11:12 * 26:23 ማዛ 41:9 * 26:28 ኬሳ 24:8፤ ኤር 31:31-34

ጴጥሮስ ኢዛ ካዳናይ ሱሉ ካሴቲዲ ዮቲዴስ
(ማር 14:27-31፤ ሉቃ 22:31-34፤ ዮሃ 13:36-38)

31 ዮሱሱ ኢስታስ “ኢንቴ ወሪ ሃቺ አማርሲ ታናን ጴጵቲዲ ታና ዮጊ ባና፤ ‘ሄሚዛይሳ ታ ሾጫና፤ ሜሄቲኔ ላሌታና’ ጌቲቲዲ ካሴ ሃፌቲዴስ። * 32 ጊዶ አቲን ታኒ ዴንዲዳፕ ጉዬ ኢንቴፌ ሲንሳታዳ ጌዴ ጋሊላ ባና” ጊዴስ። *

33 ጴጥሮስ ዛሪዲ “ሃንኮይቲ ወሪ ኔ ጌዶን ጴጵቲኮካ ታኒ ሙሌካ ጴጵቲኬ!” ጊዴስ። 34 ዮሱሱካ ኢዛስ ዛሪዲ “ቱሙ ጋይስ፤ ሃቺ ቃማ ኩቶይ ዋሶንታ ካሴታዳ ሄቩቶ ኔ ታና ካዳና” ጊዴስ። 35 ጴጥሮስ ቃሴ “ኔናራ ታ ሃይቃና ኮሺኮካ ሙሌካ ታ ኔና ካዲኬ!” ጊዴስ። ዮሱሳ ካሊዛ ሃንኮይቲካ ኩሜስ ኢዛይሳሶካ ጊዳ።

ጌቲሴማኔን ዮሱሳ ዎሳ
(ማር 14:32-42፤ ሉቃ 22:39-46)

36 ሄሳፌ ጉዬ ዮሱሱ ባና ካሊዛይታራ ጌዴ ጌቲሴማኔ ጌቲቲዛሶ ቢዴስ። ኢስታካ “ሄ ባዳ ታ ዎሲሺን ኢንቴ ሃይሳን ኡቲሺቲ” ጊዴስ። 37 ጴጥሮሳራ ዛቢዶሳ ናይታ ናምዓታ ባናራ ኡኪ ቢዲ ሙዞቴሴኔ ዳሮ ቆፎ አይኪዴስ። 38 ሄሳፌካ “ታ ሼምፖያ ሃይቃና ጋካናስ ዳሮ ሙዞታዱስ፤ ታናራ ሚኒዲ ሃኒን ታኪቲ” ጊዴስ።

39 ኢስታፌ ጉስ ጌዴ ሃኪ ቢ ጉፓንዲ “ታ አዋዉ! ኔስ ዳንዳዮቲኮ ሃይሲ ሜቶይ ታፕ አዶ፤ ጊዶ አቲን ታኒ ኮይዳ ማላ ጊዶንታ ኔኒ ኮይዳ ማላ ሃኖ” ጊ ዎሲዴስ። 40 ሄሳፌ ሲሚዲ ባና ካሊዛይታኮ ዩዲ ኢስቲ ጴስኪሺን ዴሚዴስ። ጴጥሮሳካ “ሃይቶ አሳቶ! ኢንቴ ታናራ ኢሲ ሳቴኮኔ ሚናናስ ዎኒዴ? 41 ፓጩን ኢንቴ ጌሎንታ ማላ ሚኒዲ ዎሲቲ፤ አያናይ ጊጌቲዴስ ሺን አሾይ ጊዲኮ ዳቡራንቻ” ጊዴስ።

42 ቃሴካ ናምዓንሶ ቢዲ “ታ አዋዉ! ሃይሳ ኡያናሲ ታስ አቶንታ ሚሽ ጊዲኮ ኔ ሼኔይ ፖሌቶ” ጊዲ ዎሲዴስ። 43 ቃሴካ ኢዚ ዩሺን ኢስታ አይፌን ጴስኮይ ዴዒዳ ጊሽ ኢቺዳይታ ቤዩዴስ። 44 ኢስታ አጊዲ ቃሴካ ቢዲ ሄዛንሶ ካሴ ዎሲዳ ቃላ ዛሪ ዎሲዴስ።

45 ሄሳፌ ባና ካሊዛይታኮ ሲሚዲ “ሃዲካ ሼምፕዲ ጴስኪዴቲ? ሄኮ ሃዲ ሳቴይ ማቲዴስ፤ አሳ ናይ ናጋራንቻታ ኩሼን አጲ ኢሜታና። 46 ዴንዲቴ አኔ ቦስ! ታና አሲ ኢሚዛይይ ዩሳ ቦላ ዴስ” ጊዴስ።

* 26:31 ዛካ 13:7 * 26:32 ማቶ 28:16

ዮሱሲ አይኪቲደስ

(ማር 14: 43-50፤ ሉቃ 22: 47-53፤ ዮሃ 18: 3-12)

47 ኢዚ ሃሳዩሺን ታማኔ ናምዓታፕ ኢሶይ ዮሁዳይ ዩደስ። ቄሴታ ሃላቃቲኔ ደሬ ጨማቲ ዮዲዳ ዳሮ አሳይ ቶራኔ ዱርቃ አይኪዲ ዮሁዳራ ኢሲፌ ደስ። 48 ዮሁዳይካ “ታ ዮሪዛደይ ኢዛ ጊዲዳ ጊሽ አይኪቱ” ጊዲ ካሴ ዮቲ ዎሲደስ።

49 ሲቲ ጊ ዮሱሳኮ ቢዲ “አስታማሬ! ሳሮ” ጊሽ ዮሱሳ ዮሪደስ። 50 ዮሱሲካ “ታ ላጌ! ኔ ዩዳ ቆፋ ፖላ” ጊደስ። ሄራካ አሳይ ሺቄቲዲ ዮሱሳ አይኪዲ ቃቺደስ። 51 ዮሱሳራ ዲዛይታፕ ኢሶይ ጊሳ ማሻ ሾዲዲ ቄሴታ ሃላቃዛ አሽካራ ሃይስ ቃንጊደስ።

52 ዮሱሲካ “አኔ ኔ ማሻ ኮሆን ዛራ ጌልሳ፤ ማሻ ሾዲዛይቲ ማሻን ዳያና። 53 ኮሺኮ ታኒ ታ አዎ አይቺዛኮ ዳሮ ሺዮን ቆደቲዛ አሊዛ ኪታንቻ ታስ ዮዶንታ አጋና ሚሳቲዜ? 54 ሄሳሶ አሲኮ ቃሴ ጌሻ ማፃፋታን ሃናና ጌቱቲዳይሲ ዋኒ ፖሌታኔ?” ጊደስ።

55 ሄ ዎደ ዮሱሲ አሳ “ፓንጋ አይኪዛ አሳሶ ማሻኔ ዱርቃ ኤኪዲ ታና አይካና ዩደቲ? ዎንቲን ዎንቲን ያሳ ኬሳን ኡታዳ ታ ታማርሲሺን ካሴ አይኪቤኪታ ሺን። * 56 ጊዶ አቲን ሃይሲ ወራካ ሃኒዳይሲ ካሴ ናቤቲ ጌሻ ማፃፋታን ዮቲዳይሲ ፖሌታናሳ” ጊደስ። ሄ ዎደ ዮሱሳ ካሊዛይቲ ኢዛ ዮጊዲ ዳዩዳ።

ዮሱሲ ፐርዳ ዱላታ ሲንስ አዲደስ

(ማር 14: 53-65፤ ሉቃ 22: 54-55፤ 63-71፤ ዮሃ 18: 13-14፤ 19-24)

57 ሄ ዎደ ዮሱሳ አይኪዲ አሳቲ ሙሴ ዎጋ አስታማሬቲኔ ደሬ ጨማቲ ኢሲፌ ሺቄዳሶን ቄሴታ ሃላቃ ቃያፋኮ ኤፊዳ። 58 ጊዶ አቲን ጳፅሮሲ ቄሴታ ሃላቃ ጊቤ ጋካናስ ሃሆራ ዮሱሳ ካሊደስ። ጊቤ ጊዶ ጌሊዲ ሃኒዛይሳ ወርሴስ ቤያናስ፤ ጊቤ ናጊዛይታራ ኡቲደስ።

59 ሄ ዎደ ቄሴታ ሃላቃቲኔ አይሁዳታ ዱላታይ ኩሜስ ዮሱሳ ዎዲሳናስ ዎርዶ ማርካ ኮዩደስ። 60-61 ዎርዶ ማርካቲ ዳሮቲ ሺቄኮካ ቤሲዛ ማርካቱስ ደሚቤቴና፤ ጊዶ አቲን ጉዬፕ ናምዑ አስ ዳይቲ ሺቄዲ “ሃይሲ አደዚ ‘ታ ያሳ ኬሳ ላላዳ ሄሽ ጋላሳራ ዛራዳ ኬፃና ዳንዳያይስ’ ጊደስ” ጊዲ ማርካቲዳ። *

62 ሄሳ ሲዩዳ ቄሴታ ሃላቃይ ኡቴሳፌ ደንዲ ኤቂዲ “ሃይቲ አሳቲ ኔ ቦላ ማርካቲዛይሳስ አይኮካ ዛሪኪ?” ጊደስ። 63 ዮሱሲካ ሮዑ ጊደስ። ቄሴታ ሃላቃይ “ታ ኔና ደዎ ያሳ ሱንሳን አይቻይስ! ኔኔ ኪርስቶሳ፤ ያሳ ና ጊዲኮ ታስ ዮታ!” ጊደስ።

* 26:55 ሉቃ 19: 47፤ 21: 37 * 26:60-61 ዮሃ 2: 19

64 ዮሱሲካ “ኔ ጎይሳካ ማላ፤ ጊዶ አቲን ኢንቴስ ኡባስ ታ የቲዛይ ሲንሳፌ አሳ ናይ ዎልቃማካ ኡሻቻን ኡቲዲ ሳሎ ሻራራ ዱዛ ዎዴ ኢንቴ ቤያና” ጊዴስ። *

65 ሄ ዎዴ ቁሴታ ሃላቃይ ባ ማይዎ ዳኪዲ “ዎሳ ቦላ ጫሻ ቃላ ሃሳዬዎስ፤ ኑስ ሃይሳፌ አዲዛ ሃራ አዛ ማርካ ኮሺዜ! ዎሳ ቦላ ጫሻ ቃላ ኢዚ ሃሳዬሺን ኢንቴ ኢንቴ ሃይሳራ ሲዱዴታ። 66 ኢንቴስ አይ ሚሳቲዜ?” ጊዴስ። ኢስቲካ ዛሪዲ ኢዛስ “ሃይቆይ ቤሴስ” ጊዳ።

67 ሄ ዎዴ ዮሱሳ አይፌሶን ጩቲሼ ኢጨዳ፤ ባጋይቲ ባቂሼ፥ 68 “ኪርስቶሳ! ኔ ኔና ናቤ ጋሳሺን ኔና ባቂዳይ አናኮኔ አኔ ኑስ የታ” ጊዳ።

ጴጥሮሲ ዮሱሳ ካዲዴስ

(ማር 14:66-72፤ ሉቃ 22:56-62፤ ዮሃ 18:15-18፥25-27)

69 ሃሳፌ ጉዮ ጴጥሮሲ ቁሴታ ሃላቃ ጊቤን ኡቲ ዲሺን ኢሲ ኪሳ ጊዶን አሲዛ ማጫስ ዲዛራ ኢዛኮ ሺቃዳ “ኔኒካ ጋሊላ ዮሱሳራ ዲዛዴ!” ጋዱስ።

70 ኢዚ ቃሴ “ኔ አይ ጊዛኔ ታ ኤሪኬ!” ጊዲ ኡባ አሳ ሲንሳን ካዲዴስ። 71 ጊቤዛፔ ኪዚዛ ፔንጌ ኢዚ ቢሺን ኢሲ ሃራ አሳንቻዎ ኢዛ ጸላዳ ሄን ጋዳን ዲዛይታስ “ሃይሲ አዴዚ ናዚሬቴ ዮሱሳራ ዲዛዴኮ!” ጋዱስ።

72 ኢዚካ “ታ ኢዛ ኤሪኬ!” ጊዲ ናምዓንጾ ካዲዴስ። 73 ጉስ ጋምዲሺን ሄን ኤቂዳ አሳቲ ሺቂዲ ጴጥሮሳ “ኔ ሃሳያይ ኔ ሃይታራ ዲዛይሳ ቆንጨሴስ፤ ቱማፔ ኔ ኢስታ ባጋ አሳ” ጊዳ። 74 ኢዚካ ጫቂሼኔ አማቲሼ ሄሳ አዴዛ “ታ ኤሪኬ!” ጊዴስ። ሄራካ ኩቶይ ዋሲዴስ።

75 ሄሳ ዎዴ ዮሱሲ ካሴ ጴጥሮሳስ “ኩቶይ ዋሳናስ ኔ ታና ሄሹቶ ካዳና” ጊዲ የቲዳ ቃላይ ቆፌቲን፥ ጴጥሮሲ ካሬ ኪዚዲ ጫሞ ዮሆ ዮኪዴስ።

27

የሁዳይ ካቂቲ ሃይቂዴስ

(ማር 15:1፤ ሉቃ 23:1-2፤ ዮሃ 18:28-32)

1 ማላዶ ዎንታራ ቁሴታ ሃላቃቲኔ ዴሬ ጨማቲ ዉሪካ ዮሱሳ ዎዳና ኦጌ ዞሬቲዳ። 2 ዮሱሳ ቃቺ ኤፊዲ ጋገፔ ጲላዎሳስ አሲ ኢሚዳ።

* 26:64 ዳኔ 7:13

3-4 ኢዛ አሰ. ኢሚዳ ዮሁዳይካ ዮሱሳ ቦላ ፐርዴቲዳይሳ ቤዬዲ “አሳ ኢሞንታ አጋርኪና” ጊዲ ባ ኤኪዳ ሄዡ ታሙ ቢራ ቁሴታ ሃላቃታሲኔ ዴሬ ጨማታስ ዛሪ ኢሚዲ “ዒሎ አስ አሳ ኢሚዳ ጊሽ ታ ሞራዲስ” ጊዴስ። ኢስቲካ “ሂስቲን ኑስ አይ ሜቶ! ኔ ኤራ ኤካ!” ጊዳ። 5 ሄሳ ጊሽ ዮሁዳይ ቢራ ኤሬዲ ዶሳ ኬሳ ጊዶን ዮጊዲ ኬዚ ቢዲ ጩሌቲ ሃይቂዴስ።

6 ቁሴታ ሃላቃቲ ቢራ ዴንሲዲ “ሱሳ ሞጋ ጊዲዳ ጊሽ ዶሳ ኬሳ ሚሻን ጉጃናስ ቤሴና” ጊዳ። 7 ባ ጊዶን ዞሬቲዲ ኢማስ ጊዲዳ አሳታስ ዱፎ ጊዳና ማላ ኢሲ ኡርቃ ሚሽ ሜዲዛ ሂላዛ ጋዴ ሻሚዳ። 8 ሄሳ ጊሽ ሄ ጋዴይ ሃቺ ጋካናስ ሱሳ ጋዴ ጌቱቴስ።

9-10 ኢዛስ ሞጋ ጊዳና ማላ “ኢስራዴሌ ናይቲ ሄሬጊዳ ሄዡ ታሙ ቢራ ቆዲ ኤኪዳ። ዶሲ ታና አዛዚዳ ማላ ኡርቃ ሜዲዛ ሂላዛ ጋዴስ ኢሚዳ” ጌቱቲዲ ናቤ ኤርማሳ ዱናን ዮቱቲዳይሲ ፖሌቲዴስ።

ዮሱሲ ጲላዶሳ ሲንሳን
 (ማር 15:2-5፤ ሉቃ 23:3-5፤ ዮሃ 18:33-38)

11 ሄ ዎዴ ዮሱሲ ዴሬ ሃሪዛይሳ ሲንሳ ሺቂዴስ። ዴሬ ሃሪዛይሲካ “ኔኒ አይሁዳ ካዎ?” ጊዲ አይቺዴስ። ዮሱሲካ “ኔ ጊዳ ማላ ጊዶ” ጊዴስ። 12 ቁሴታ ሃላቃቲኔ ዴሬ ጨማቲ ኢዛ ሞቲሺን ዮሱሲ ኢስታስ አይኔ ዛሪቤና። 13 ሄ ዎዴ ጲላዶሲ ዮሱሳ “አፑን ዮዶን ኔና ሞቲዛኮኔ ሲዩኪ?” ጊዴስ። 14 ዴሬ ሃሪዛይሲ ኬሂ ማላሌታና ጋካናስ ዮሱሲ ኢሲ ቃላካ ዛሪቤና።

15 ዴሬ ሃሪዛይሳስ ባዓሌ ጋላስ ዴሬይ ቃሾ አሳፕ “ኤቤሎይ ኑስ ቢርሼቶ!” ጊ አይቺኮ ኢሳዴ ቢርሺዛ ዎጋይ ዴስ። 16 ሄ ዎዴ ጌኔ አሶን ኤሬቲዳ ባርባኔ ጌቱቲዛ ኢሲ ቃሾ አሲ ዴስ። 17 ዴሬይ ሺቂዳ ማላ ጲላዶሲ “ባርባኔፔኔ ኪርስቶሳ ጌቱቲዛ ዮሱሳፕ ታ ኢንቴስ አና ቢርሻና ማላ ኮዮቲ?” ጊዴስ። 18 ጲላዶሲ ኢስቲ ጮ ቃናቴስ አሲ ኢሚዳይሳ ኤሪሼ አይቺዴስ።

19 ኢዚ ፐርዳ አልጋ ቦላ ኡቲ ዲሺን ኢዛ ማቼዶ “ኢዛ ጌዶን ሃቺ ታኒ አጉሞራ ዳር ሜቶታዲስ፤ ሄሳ ዒሎ አዴዛ ቦላ ኔ አይኮካ አሶንታ ማላ” ጊዛ ኪታ ጲላዶሳስ ዮዳዱስ።

20 ጊዶ አቲን ቁሴታ ሃላቃቲኔ ጨማቲ ኢስታስ ባርባኔይ ቢርሼታና ማላኔ ቃሴ ዮሱሳ ዎዳና ማላ ዎሳናስ ዴሬዛ ቃላይ ጋጋና ማላ አሲዳ። 21 ዴሬ ሃሪዛይሲ “ናምዓታፕ አና ቢርሻና ማላ ኮዮቲ?” ጊ አይቺን፤ ኢስቲ “ባርባኔ ቢርሻ!” ጊዳ።

22 ጲላዶሲካ “ሂስቲኮ ኪርስቶሳ ጌቱቲዛ ዮሱሳ ዎስቶ?” ጊዴስ። ዉሪካ “ካቂቶ!” ጊዳ።

23 ጲላዎሲካ አይሲ? “አይ ኢታ አሲዴ?” ጊዲ ኢስታ አይቺዴስ። ኢስቲካ ቃሴ ኬሂ ዋሲዲ “ካቁቶ!” ጊዲ። 24 ጲላዎሲ ሃሂዛይሲ ወሪካ አሳይ ባ ጊዶን ቡልዓኬቴሳፊ አቲን ሃራ አይ ጎዳይ ባይንዳይሳ ዩሺ ያሊዲ “ሃይሳ አዴዛ ሱሳ ጎሜፔ ታ ጌሻ፤ ሃይሳፊ ጉዩ ኢንቴ ሽኔ” ጊዲ ሃሲ ኤሂሲዲ ዴሬዛ ሲንሳን ባ ኩሺ ሜጩቲዴስ። *

25 ዴሬይ ወሪ “ኢዛ ሱሲ ኑ ቦላኔ ኑ ናይታ ቦላ ጋኮ” ጊዲ ዛሪዴስ። 26 ሄ ዎዴ ባርባኔ ኢስታስ ቢርሺዲ ዩሱሳ ጋራፊሲዳፔ ጉዩ ካቃና ማላ አሲ ኢሚዴስ።

ዎታዳራቲ ዩሱሳ ቦላ ቂሊጪዳ
(ማር 15:16-21፤ ዮሃ 19:2-3)

27 ሄሳፊ ዎታዳራቲ ዩሱሳ ጌዴ ዴሬ ሃሪዛይሳ ጊቤ ኤኪ ቢዲ ወሪ ሺቂዲ ዩሱሳ ጊዶ አሲዳ። 28 ኢዛ ማይዎ ቃሪዲ ሃራ ዘዎ ማይዎ ማይዚዳ። 29 አጉንሳ አክሊሴ ሃፂዲ ጊጊሲዳ፤ ኢዛ ሁዔ ቦላ ዎሲዳ፤ ሾምቦቆ ጉፊ ኡሻቻ ኩሺን አይሲዲኔ ኢዛ ሲንሳን ጉልባቲዲ “አይሁዳ ካዎ! ኢንቴስ ቶ!” ጊዲ ኢዛ ቂዲዳ። 30 ኢዛ ቦላ ጩቲዳ፥ ሾምቦቆ ጉፊዛ ኢዛ ኩሺፔ ኤኪዲ ዩሱሳ ሁዔን ዛሪ ዛሪዲ ሾጪዳ። 31 ኢዛ ቦላ ቂዲ ካዲዳይሳፊ ጉዩ ቃሴካ ዘዎ ማይዎዛ ቃሪ ኤኪዲኔ ካሴ ኢዛ ማይዎዛ ዛሪ ማይዚዲ ካቃናሶ ኤኪ ቢዳ።

ዩሱሳ ካቁቴሰ

32 ኢስቲ ኤኪ ቢሺን ቃሬና ጌቴቲዛሶፔ ዩዳ ሲሞና ጌቴቲዛይሳ ዴሚዲ ማስቃሌዛ ኢዛ ዎልቃራ ቶሲዳ። 33-34 ቢርሺቻይ “ሁዔ ጉጌ” ጌቴቲዛ ጎልጎታ ጋኪሺን ጪዩራ ዋላኬቲዳ ዎይኔ ጫጄ “ኡያ” ጊዲ ኢሚዳ፤ ጊዶ አቲን ኢዚ ጋንፂ ኤኪዲ ኡያና ኮይቤና። * 35 ኢዛ ካቂዳፔ ጉዩን ኢዛ ማይዎዛ ቦላ ሳማ ዩጊዲ ጊሺቲዳ። 36 ሄን ኡቲዲ ኢዛ ናጊዳ። 37 “ሃይሲ አይሁዳ ካዎ ዩሱሳ” ጊዛ ሞቶ ቃላ ኢዛ ሁዔፔ ቦላራ ዎሲዳ። 38 ናምቡ ዎምባዴታፔ ኢሶይ ዩሱሳፔ ኡሻቻ ባጋራ፥ ኢሶይ ሃዲርሳ ባጋራ ኢዛራ ኢሲፊ ካቁቴዳ።

39-40 አጌራ አዲ ቢዛ አሳይ ጫዩሺኔ ሁዔ ቃሲሺ * “ዎሳ ኬሳ ላላዳ ሄቩ ጋላሳን ሃራ ኬፃና ጊዛይሶ! አኔ ኔና አሻ፥ ኔ ዎሳ ና ጊዲኮ አኔ ማስቃሌ ቦላፊ ዎዳ” ጊዳ። *

* 27:24 ዛሬ 21:6-9 * 27:33-34 ማዛ 69:21 * 27:39-40 ማዛ 22:7፤ 109:25 * 27:39-40 ማቶ 26:61፤ ዮሃ 2:19

⁴¹ ቁሴታ ሃላቃቲ ደሬ ጨማታራ ጊዲዲ ኢዛ ቦላ ቀዲሼ፤
⁴² “ሃራ አሳ አሺዴስ ሺን ባና አሻናስ ዳንዳይቤና፤ ኢዚ ኢስራዔል ካዎ ጊዲኮ አኔ ሃዲ ማስቃሌ ቦላፌ ዎዶ፤ ኑካ ኢዛ አማናና። ⁴³ ዎሳን አማኔቲዴስ፤ ባና ዎሳ ና ጊዳ ማላ ዎሲ ኢዛ ደሲዛ ጊዲኮ አኔ ሃዲ ኢዛ አሾ” ጊዳ። * ⁴⁴ ኢዛራ ኢሲፌ ካቁቲዳ ፓንጋቲካ ሄሳሶ ጫሻ ቃላ ኢዛ ቦላ ቆቆፊዳ።

ዮሱሳ ሃይቆ

(ማር 15:33-41፤ ሉቃ 23:44-49፤ ዮሃ 19:28-30)

⁴⁵ ጋላሳፌ ኡሱፑን ሳቴፔ ቢዲ ኡዱፉን ሳቴ ጋካናስ ኩሜሳ ቢታይ ደሚዴስ። ⁴⁶ ኡዱፉን ሳቴ ጊዲሺን ዮሱሲ ቃላ ዶቁ ሂስቲዲ “ኤሎሄ! ኤሎሄ! ሳማ ሳባቁታን” ጊዲ ዋሲዴስ። ሄሳ ጉሳስ ቢርሼሳይ “ታ ዎሶ! ታ ዎሶ! ታና አይሲ አጋዲ?” ጉሳ። * ⁴⁷ ሄን ጋዳን ኤቂዳ አሳታፔ ኢሲ ኢሲ አሳቲ ኢዛ ዋሶዛ ሲይዲ “ኤሳሳ ያይገስኮ!” ጊዳ። ⁴⁸ ኢስታፌ ኢሳዴይ ዎዲ ቢዲ ዛንዛ ሚሳቲዛ ሴፊኔጌ ጌቲቲዛ ሚሽ ኤኪዲ ጫሊዳ ዎይኔ ጫጅን ዮጊ ጫጲሲዲኔ ሾምቦቆ ጌቲቲዛ ሚሳ ያራን ቃጲዲ ኡያና ማላ ዮሱሳ ዱናኮ ሺሺዴስ። * ⁴⁹ ሃንኮ አሳይ ቃሌ “አጋጊቱ አኔ፥ ኤሳሲ ዮዲ ኢዛ አሺን ቤያና” ጊዳ። ⁵⁰ ዮሱሲ ቃሌካ ዶቃ ቃላን ዋሲዲ ሼምፖ ኬዚዴስ።

⁵¹ ሄ ዎዴ ዎሳ ኬሳ ማጋላሻይ ቦላ ሁዔራ ዱጌ ሲሚ ዳኬቲዲ ናምዑ ኬዚዴስ፤ ቢታይ ቃዲዴስ፤ ዛላቲ ዛዲዳ። * ⁵² ዱፎቲ ዶዩቲዳ፤ ካሴ ሃይቂዳ ዎሳ አሳፔ ዳሮ ባጋይ ዴንዲዴስ። ⁵³ ዱፎፔ ኬዚዲ ዮሱሳ ዴንሳፌ ጉዩ ጌዴ ጌሻ ካታማ ጌሊዲ ዳሮታ አይፌን ቤቲዳ። ⁵⁴ ማቶ ሃላቃይኔ ኢዛራ ኢሲፌ ዮሱሳ ናጊዛይቲ ቢታ ቃላኔ ሃኒዳይሳ ዉርሲ ቤዩዲ ዳሮ ባቢዳ። ቃሌ “ሃይሲ ቱማፔ ዎሳ ናኮ!” ጊዳ። ⁵⁵ ጋሊላፔ ዮዲ ዮሱሳ ኮሺዛዛን አሲ ማዳናስ ካሊዛ ዳሮ ማጫሳቲ ሃኒዛይሳ ዉርሲካ ሃሆራ ያሊሼ ሄን ዴቲስ። ⁵⁶ ኢስታ ጊዶን ማግዳሌፔ ዩዳ ማራሚራኔ፥ ያቆቤኔ ዮሴፌ አዮ ማራሚራ፥ ቃሌካ ዛቢዶሳ ናይታ አዩዩራ ኢሲፌ ዴቲስ።

ዮሱሲ ሞጌቲዴስ

(ማር 15:42-47፤ ሉቃ 23:50-56፤ ዮሃ 19:38-42)

⁵⁷ ጋዴይ አማርሲሺን ዮሴፌ ጌቲቲዛ ኢሲ ዱሬ አዴ ዳይሲ አርማቲያሳ ጌቲቲዛሶፔ ዩዴስ። ኢዚካ ባ ባጋራ ዮሱሳ ካሊዛዴ። ⁵⁸ ኢዚ ጲላዎሳ ሲንሲ ሺቂዲ ዮሱሳ አሃ ኢዛስ ኢማና ማላ ዎሲን ጲላዎሲካ ኢዛስ ኢማና ማላ አዛዚዴስ። ⁵⁹ ዮሴፌይ አሃ ኤኪዲ

* 27:43 ማዛ 22:8 * 27:46 ማዛ 22:1 * 27:48 ማዛ 69:21 * 27:51 ኬሳ 26:31-33

ጊሺዛ ሞጎ አፋላን ሃሲዴስ።⁶⁰ ሹች ዎጪዲ ባሲ ጊጊሲዳ ዱፎን ኤሬ ዎሲዲ ጊታ ሹች ጊንዴርሲዲ ዱፎዛ ጎርዲዴስ።⁶¹ ሄሳ ዎዴ ማግዳሌ ማራሚራኔ ሃራ ማራሚራ ዱፎዛ ጊናን ኡቲዳ።

⁶² ሳምባታስ ጊጊቲዛ ዎንቴሳ ጋላስ ቁሴታ ሃላቃቲኔ ፋርሳዌቲ ጲላዎሳ ሲንስ ሸቂዲ።⁶³ “ጎዶ! ሄ ዎርዶይ ካሴ ፓፃ ዲሼ ሄዡ ጋላሳፊ ጉዩ ታ ዴንዳና” ጊዳ ቃላይ ኑ ዎዘናን ቱርቹ ጊዴስ። *

⁶⁴ ሄሳ ጊሽ ኢዛ ካሊዛይቲ ኢዛ አሃ ካይሶቲ ኤኪዲ ዴሬስ ‘ኢዚ ሃይቆፔ ዴንዲዴስ’ ጊዲ ዎሬሶንታ ማላ ሄዡንሶ ጋላስ ጋካናስ ዱፎይ ናጌታና ማላ አዛዛ፤ አካይ ጊኮ ካሴይሳፊ ጉዩ ባላይ አዴስ ጊዳና” ጊዳ።⁶⁵ ጲላዎሲ “ኢንቴስ ናጊዛይቲ ዴቴስ፤ ቢዲኔ ኢንቴስ ኤሬቲዳ ማላ ናጊሲቴ” ጊዴስ።⁶⁶ ኢስቲካ ቢዲ ዱፎዛ ዱና ማታሜን ጎርዲዲ ናጋና ዛቤ ኤሲዳ።

28

ዮሱሲ ሃይቆፔ ዴንዲዴስ (ማር 16:1-8፤ ሉቃ 24:1-12፤ ዮሃ 20:1-10)

¹ ሳምባታይ አዲዳፔ ጉዩ ሳሚንታፔ ኮይሮ ጋላስ ቡሮ ሳሎይ ዞዲሺን ማግዳሌ ማራማኔ ሃራ ማራማ ዱፎዛ ቤያና ቢዳ። *

² ቆፖንታ ዲሺን ጊታ ቢታ ቃሲ ሃኒዴስ፤ ጎዳ ኪታንቻይካ ሳሎፔ ዎዲ ዱፋኮ ቢዲ ሹቻ ጊንዴርሲዲ ኢዛ ቦላ ኡቲዴስ።

³ ኪታንቻስ ሜዳይ ዎልቃንሳ ፖፖ ማላ፤ ማይዎይካ ሻቻ ማላ ቦላ።

⁴ ዱፎ ናጊዛይቲ ኪታንቻዛስ ባቢዲ ኮኮሪዲኔ ሃይቆስ ሚሳቲዳ።

⁵⁻⁶ ኪታናቻይ ማጫሳታ “ባቦፍቴ፤ ኢንቴ ካቂቲዳ ዮሱሳ ኮዩዛይሳ ታ ኤራይስ፤ ኢዚ ሃዲ ሃን ባዋ፤ ኢዚ ካሴ ዮቲዳ ማላ ሃይቆፔ ዴንዲዴስ፤ ሃ ዩዲ ኢዚ ኢቺዳሶ ቤይቴ።⁷ ሃዲካ ኤሌሊ ቢዲ ኢዛ ካሊዛይታስ ‘ሃይቆፔ ዴንዲዴስ። ኢንቴፊ ካሴቲዲ ጋሊላ ቤስ፤ ኢንቴ ኢዛ ሄን ዴማና’ ጊዲ ዮቲቴ። ሂዳ ታ ኢንቴስ ዮታዲስ” ጊዴስ።⁸ ማጫሳቲካ ባቦኒኔ ኡፋይሳን ኩሚዲ ኢዛ ካሊዛይታስ ዮታናስ ኤሌሊዲ ዎሳን ዱፎይ ዲዛሶ ዩጊ አጊዲ ቢዳ።

⁹ ሄራካ ዮሱሲ ኢስታ ዴሚዲ “ሃይቶ ሳሮ” ጊዴስ። ኢስቲካ ዮሱሳኮ ሸቂዲኔ ኢዛ ቶሆ አይኪዲ ኢዛስ ጎይኒዳ።¹⁰ ዮሱሲ ኢስታ “ባቦፍቴ! ቢዲኔ ኢስቲ ጋሊላ ባና ማላ ታ ኢሻታስ ዮቲቴ። ኢስቲ ታና ሄን ቤያና” ጊዴስ።

* 27:63 ማቶ 16:21፤ 17:23፤ 20:19፤ ማር 8:31፤ 9:31፤ 10:33-34፤ ሉቃ 9:22፤ 18:31-33 * 28:1 ሳምባታ ሃይሳ ቦላ ሳምባታይ ቄራ ጋላላ።

ናጊዛይታ ማርካቴስ

¹¹ ማጫሳቲ ቡሮ አጌ ቦላ ዲሺን ናጊዛይታ፤ ጉሳ ባጋቲ ካታማ ቢዲ ሃኒዳይሳ ወርሲ ቁሴታ ሃላቃታስ የቲዳ። ¹²⁻¹³ ቁሴታ ሃላቃቲካ ዴሬ ጨማታራ ሺቁቲዲ ዞሬቲዳ፤ ዎታዳራታስ ጊዲዛ ሚሽ ኢሚዲ “ኑኒ ዲሲኪዳሺን ኢዛ ካሊዛይቲ ቃማራ ዩዲ ካይሶቲ ኤፊዳ’ ጊቴ ጊዳ። ¹⁴ ሃይሲ ዎሬይ ዴሬ ሃሪዛይሳ ማታን ሲዩቲኮካ ኑኒ ኢዛስ ሎጌሲ የታና፤ አይኮ ኢታይካ ኢጉቴ ቦላ ጋኮንታ ማላ ኑ አሳና” ጊዳ። ¹⁵ ዎታዳራቲካ ሚሻ ኤኪዲ ኢስቲ ጊዳ ማላ አሲዳ፤ ሃይሲ የጋዚ ሃቺ ጋካናስ አይሁዳታ አቻን ዳሮሶን የቴቲሼ ዴስ።

ዩሱሲ ባና ካሊዛይታ አይሬን ቤቲዴስ

(ማር 16:14-18፤ ሉቃ 24:36-49፤ ዮሃ 20:19-23፤ ሃዋ 1:6-

8) ¹⁶ ሄሳሬካ ዩሱሳ ካሊዛ ታማኔ ኢሲኔቲ ዩሱሲ ኢስታ ቤሲዳ ጋሊላን ዲዛ ዙማ ቦላ ኬዚዳ። ¹⁷ ዩሱሳ ቤዩዳ ማላ ኢዛስ ጎይኒዳ፤ ኢስታ ጋራሳሬ ጉጊዛ ባጋቲ ሲዲዳ። ¹⁸⁻²⁰ ዩሱሲካ ባና ካሊዛይታኮ ሺቁዲ “ሳሎኒኔ ሳዓን ጎዳቴሲ ታስ ኢሜቲዴስ። ሄሳ ጊሽ ቢዲ ዴሬ ኡባ አዋ፤ ናዛኔ ጊሎ አያና ሱንሳን ፃማቁሼ፤ ታና ካሊዛይታ አሲቴ፤ ታ ኢጉቴና አዛዚዳይሳ ወርሲ ናጋና ማላ ታማርሲቴ። ታካ አላሜ ወርሴስ ጋካናስ ታ ኢጉቴናራ ዳይስ” ጊዴስ። *

* 28:18-20 ሃዋ 1:8

አራሳ ጫቆ ማገፋ ጋሞላ

New Testament in Gamo (ET:gmw:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25
